

O LE EKALESIA A IESU KERISO O LE AU PAIA O ASO E GATA AI • APERILA 2013

O Le Liahona

**Iesu Keriso: O Le Togiola
ma le Faataitaiga, i. 18, 26**

O Uo o Tagata E . . . , i. 52

**Ua E Liua? Auala e 10
e Iloa Ai, i. 56**

**Talanoa ma Lau Fanau e uiga
i Malumalu, i. 62, 64**



*"O Le
Malamalama
o Keriso o le
mana paia
lena po o
uunaiga e afua
mai i le Atua e
ala mai ia Iesu
Keriso. Na te
aumaia le
malamalama
ma le ola i
mea uma."*

Elder Richard G. Scott o le
Korama a Aposetolo e
Toasefululua, "Filemu o le
Lotofuatiaifo ma le Filemu
o le Mafaufau," *Liahona*,
Nov. 2004, 15.



O SAVALI

- 4 Savali a le Au Peresitene Sili:
Ua Toetu o Ia**
Saunia e Peresitene Henry B. Eyring
- 7 Savali a Faiaoga Asiasi:
Feagaiga o le Malumalu**

TALA FAAALIA

- 12 Oti ma le Ola: Manatu Faaalia
o Paionia i le Toetutu**
*Ua molimau paionia ma perofeta
anamua i le mauaina o le faa-
moemoe i le toetutu.*

- 18 O Le Misiona ma le
Auaunaga a Iesu Keriso**
Saunia e Elder Russell M. Nelson
*E mafai ona tatou mulimuli i
vaega e lima o le soifuaga o le
Faaola a o tatou saili e mulimuli
ia te Ia ma malamalama i Lana
Togiola.*

- 26 Vaiaso o le Eseta**
*I le vaiaso mulimuli o Lona
soifua, sa faatino ai e le Faaola
le vavega silisili o vavega uma.*

- 30 Fesoasoani i Tamaiti
e Saunia mo le Papatisoga**
Saunia e Jessica Larsen
ma Marissa Widdison
*O a ni mea e mafai ona fai e
matua ia atili anoa ai le papati-
soga a sa la'ua tama?*

- 34 Tosina Atu i le Malumalu**
Saunia e Elder Jairo Mazzagardi
*Aoao pe mafai faapefea e le
malumalu ona aumai le liuaina.*


MATAGALUEGA

- 8 Tusigāmanatu Konafesi Aperila:
Suesue Faatasi i Saunoaga o le
Konafesi**
Saunia e Greg Batty
- 9 Aoao Atu Mo Le Malosi o le
Autalavou: O Le Taua o Uo Lelei**
- 10 O Le Mea Tatou Te Talitonu I Ai:
O Le Agaga Paia e Faamafana-
fana, Musuia, ma Molimauina**
- 36 O Leo o le Au Paia o Aso
e Gata Ai**
- 74 Tala Fou o le Ekalesia**
- 80 Seia Tatou Toe Feiloai: Feinu
mai le Punavai**
Saunia e Aaron L. West

I LE FAAVAA

Luma: Ata na tusia e Tim Taggart © IRI. Tua:
Ata na tusia e Matthew Reier. Totonu o le
faavaa i luma: Ata na pueina e Kristine Šumska.

40



- 40 Filifilia o le Vaega e Sili Atu**
Saunia e Matthew D. Flitton
*Ina ia tuuto atoatoa atu i le tala-
lelei a Iesu Keriso, sa tataua ai ia
Zoltán ona lafoai ni isi mea lelei.*

52



- 42 Fesili ma Tali**
*E faapefea ona ou faamalama-
lama atu i la'u uo o le soli o le
tulafono o le legavia o se mea
le lelei?*
- 44 Auala e Auauna Ai i
Valaauga o le Perisitua**
Saunia e Peresitene
Thomas S. Monson
*Iloa le auala e aapa, aoao,
ma pai atu ai i olaga o i latou
e te auauna atu i ai.*
- 45 O La Tatou Avanoa**
- 46 Mafuaaga Tatou Te Manaomia
ai le Tusi a Mamona**
*Mafuaaga e fa e taua ai le Tusi
a Mamona.*
- 48 Tuputupua'e i Elelee Lafulemu:
Talavou Faamaoni i Uganda**
Saunia e Cindy Smith
*O nei alii ma tamaitai talavou o
loo faamalolosia e ala i osigatau-
laga latou te faia mo le talalelei.*
- 52 Mo Le Malosi o le Autalavou: O
Le a le Mea e Ta'u o le Uo Moni?**
Saunia e Elaine S. Dalton
- 54 O Le Auala Na Ou Iloa Ai:
O La'u Valaaulia i le Faaolataga**
Saunia e Emerson José da Silva
*Ina ua ou taliaina mulimuli ane
lava le valaaulia a la'u uo, sa ou
iloina ua ou maua se mea taua.*
- 56 O Auala e Sefulu e Iloa
Ai Ua E Liua**
Saunia e Tyler Orton
*O le mea ua ou iloina e uiga i
le liua ua fesoasoani ia te a'u e
mataitu ai lo'u alualu i luma i le
talalelei.*
- 59 Pepa Lautele o I Ai se Savali:
O Le Galue Malosi e Tauia Lelei**



*Vaai pe mafai ona e maua-
ina le Liahona o loo natia
i le lomiga lenei. Faaiteite:
Faaaoga lau vaaiga
malosi faatagata autu.*

61



- 60 Faifeautalai Laitiiti
a Tinamatua Tene**
Saunia e Emília Maria Guimarães
Correa
*O le alofa o Vitor i le talalelei
sa faaosofia ai le liua o lona
tinamatua.*
- 61 Molimau Faapitoa: Aisea
Ua Soona Umī Ai le Igoa o le
Ekalesia?**
Saunia e Elder M. Russell Ballard
- 62 Faamanatuina o Malumalu!**
Saunia e Darcie Jensen
*I le lalolagi atoa, e fiafia tamaiti i
le i ai o se malumalu e latalata atu
ia i latou.*
- 64 Fesili ma Tali o le Malumalu**
*O tali i fesili e pei o le, Aisea
ua fai ai a tatou malumalu?
O a mea e fai ai i totonu?*
- 65 Musika: E Mafai
na Faavavau Aiga**
Saunia e Ruth Muir Gardner ma
Vanja Y. Watkins
- 66 Aumaia o le Peraimeri i le Fale:
Na Toefuatai mai e Iesu Keriso
Lana Ekalesia i Aso e Gata Ai**
- 68 I le Auala: O Le Nofoga sa
Faavaeina Ai le Ekalesia**
Saunia e Jan Pinborough
- 70 Mo Tamaiti Laiti**
- 81 Atatosi o le Perofeta:
Uilifoti Uutilafi**

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Shayne M. Bowen, Bradley D. Foster, Christoffel Golden Jr., Anthony D. Perkins

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr, LaRene Porter Gaunt

Lagolago o Lomiga: Melissa Zenteno

Au Tusitusi ma Faatonutonu: Susan Barrett, David Dickson, David A. Edwards, Matthew D. Flitton, Mindy Raye Friedman, Lori Fuller, Garry H. Garff, Jennifer Grace Jones, Hikari Loftus, Michael R. Morris, Richard M. Romney, Paul VanDenBerghe, Julia Woodbury

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball Bott, Thomas Child, Kerry Lynn C. Herrin, Colleen Hinckley, Eric P. Johnson, Scott M. Mooy, Brad Teare

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Connie Bowthorpe Bridge, Howard G. Brown, Julie Burdett, Bryan W. Gygi, Kathleen Howard, Denise Kirby, Ginny J. Nilson, Ty Pilcher, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Evan Larsen

Mo le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i le liahona.lds.org: pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonu" e) e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalatua, Siekisolovakia, Tenimaka, Take, Igilisi, Esitonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Latvia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafaigofieina), Silovenia, Sipaniolo, Suetena, Swahili, Tagaloka, Tahiti, Tai, Toga, Iukureini, Urutu, ma Viatename. (E eseese lava gagana.)

© 2013 Puletaofia e le Intellectual Reserve, Inc. Ua taofia aia tatau uma. Lomia i le lunaite Setete o Amerika.

E mafai ona kopi tala ma ata o le *Liahona* mo le toe faaogaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

April 2013 Vol. 37 No. 4. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Manatu mo Afiati Faaleaiga

O leni lomiga e aofia ai tusiga ma gaoioiga e mafai ona faaoga mo afiati faaleaiga. O nai faataitaiga nei.



AIA NA TUSIA E CODY BELL © IRI

"O Le Misiona ma le Auaunaga a

Iesu Keriso," itulau 18: Ua faasoa mai e Elder Russell M. Nelson ni vaega se lima o le soifuaga o Iesu Keriso e mafai ona tatou mulimuli i ai. Mafaufau e talanoa-ina vaega nei ma auala e faaoga ai i o tatou olaga. Atonu e te manao e faitau se tala mai tusitusiga paia o le soifuaga o le Faaola pe matamata se vitio o le Tusi Paia (biblevideos.lds.org) o loo faaalai ai se tasi o na vaega. Atonu foi e te faamaeaina i le tuuina atu o lau molimau e uiga i Lona soifuaga ma [Lana] galuega ma usu le pese "Faapaia Mai Au" (*Viaga*, nu. 70).

"O Le a le Mea e Ta'u o le Uo Moni?"

itulau 52: Atonu e te manao e amata i le fesili atu, o le a le mea e ta'u o le uo moni?

I LAU GAGANA

O loo maua le *Liahona* ma isi tusi a le Ekalesia i le tele o gagana i le languages.lds.org.

AUTU I LENEI LOMIGA

E ta'u mai e numera le itulau muamua o le tusiga.

Agaga Paia, 10, 36

Aiga, 30, 65

Aoa o atu, 8, 9, 30

Auauna atu, 44, 70

Faaaliga, 10, 46

Faamanatuga, 18

Faamoemoe, 12

Faapalepale, 59

Faataitaiga, 48

Faatuatua, 48

Faatulagaga o le Ekalesia, 61

Faauo, 9, 52, 54

Feagaiga, 7

Galuega faafaifeautalai,

34, 39, 48, 52, 54, 60

Galuega faalemalumalu,

7, 64, 38, 65, 80

Iesu Keriso, 4, 18, 26

Konafesi aoao, 8, 38

Legavia/Ola Mama, 42

Liua, 34, 54, 56, 60

Maliu, 4, 12, 39

Malumalu, 34, 62

Mea e faamuamua, 40

Musumusuga, 36, 38

Olioli, 38

Papatisoga, 30

Perisitua, 44

Samita, Iosefa, 66

Sauniga, 18

Tatalo, 18, 45

Taulaga, 40

Toefuataiga, 66

Toetu, 4, 12, 26

Togiola, 18, 26, 45

Tulaga faatonuina, 42, 45

Tusi a Mamona, 46

Uitilafi, Uilifoti, 81

Usiusitai, 40, 42, 56



Saunia e Peresitene
Henry B. Eyring

Fesoasoani Muamua
i le Au Peresitene Sili

Ua Toetu o Ia

O se molimau i le moni o le Toetu a Iesu Keriso o se puna lea o le faamoemoe ma le naunautai. Ma e mafai ona maua e soo se atalii/afafine o le Atua. Sa ou mauaina i se aso o le taumafanafana ia Iuni 1969 ina ua malii lo'u tina, ma sa ou mauaina lava i tausaga uma talu mai lena taimi, ma o le a ou mauaina lava seia oo ina ou toe vaai ia te ia.

O le faanoanoa ona o le valavala mo se taimi le tumau sa vave ona suia i le fiafia. Sa sili atu nai lo na o se faamoemoe mo se toe faatasiga fiafia. Ona o le tele o mea ua faaali mai e le Alii e ala i Ana perofeta, ma ona ua faamautu mai e le Agaga Paia le moni o le Toetutu ia te a'u, ua mafai ai ona ou vaai faalemafaufau foliga o le toe faatasia ma e e pele ia i tatou ua faapaiaina ma toetutu.

“O i latou ia o e o le a tutulai mai i le toetutu mai o e amiotonu. . . .

“O i latou ia o e o o latou igoa ua tusia i le lagi, i le mea e afifo ai le Atua ma Keriso o le faamasino o tagata uma.

“O i latou ia o e o tagata amiotonu ua faaatoatoaina e ala ia Iesu le puluvaga o le feagaiga fou, o lē na faia lenei togiaola ua atoatoa e ala i le faamaligiina o lona lava toto” (MF&F 76:65, 68–69).

Ona sa motusia e Iesu Keriso noataga o le oti, o fanau uma a le Tama Faalelagi e fananau mai i le lalolagi o le a toetutu i se tino o le a le toe oti. O la'u molimau la ma lau molimau e uiga i lena upumoni mamalu e mafai ona aveese ai le tiga o le malii o se tasi e pele o le aiga po o se uo ae suia i le faatalitali atu ma le olioli ma se naunautai mausali.

Ua tuuina mai e le Alii ia i tatou uma le meaalofoa o le toetu, e faapea ai ona tuu o tatou agaga i ni tino ua saoloto mai le le atoatoa faaletino (tagai i le Alema 11:42–44).

O lo'u tina o le a foliga talavou ma susulu, e aveesea aa-fiaga o le soifua matua ma tausaga o mafatiaga faaletino. O lena mea o le a oo mai o se meaalofoa ia te ia ma ia i tatou.

Peitai o i tatou o e moomoo ia faatasi ma ia e faavavau e ao ona faia filifiliga ia agavaa ai mo lena mafutaga, ia nonofo i le mamalu i le nofoaga o le a i ai le Tama ma Lona Alo Pele. E na o le pau lena o le nofoaga e mafai ona faaauau ai e faavavau le olaga faaleaiga. O se molimau o le upumoni ua faateleina ai lo'u naunau ia ou agavaa a'u lava ma i latou ou te alofa i ai mo le tikeri aupito maua luga o le malo selesitila e ala i le Togiola a Iesu Keriso o loo galue i o tatou olaga (tagai i le MF&F 76:70).

Ua ofoina mai e le Alii ia i tatou se taiala i lenei tausinioga mo le ola e faavavau i tatalo o le faamanatuga, o loo fesoasoani ia te au ma e mafai foi ona fesoasoani ia te oe. Ua valaauliaina i tatou e faafou a tatou feagaiga o le papatisoga i sauniga faamanatuga uma.

Tatou te folafola atu e manatua pea le Faaola. O faatusa o Lana taulaga e fesoasoani tatou te talisapaia ai le telē o le tau sa Ia totogia e motusi ai noataga o le oti, e ofoina mai ia i tatou le alofa tunoa, ma tuuina mai ai le faamagaloga o a tatou agasala uma pe afai tatou te filifili e salamo.

Tatou te folafola atu o le a tatou tausia Ana polo-aiga. O le faitauina o tusitusiga paia ma saunoaga a perofeta soifua ma faalogo i failauga musuia i a tatou sauniga faamanatuga e faamanatu mai ai ia i tatou a tatou feagaiga ina ia faia faapea. O le Agaga Paia na te aumaia i o tatou mafaufau ma loto ia poloaiga e sili ona manaomia ona tatou tausia i lena aso.

I tatalo o le faamanatuga, ua folafola mai e le Atua e auina mai le Agaga Paia e faatasi ma i tatou (tagai i le Moronae 4:3; 5:2; MF&F 20:77, 79). Sa ou iloa ina i lena taimi e mafai e le Atua ona tuuina mai ia te au se mea ou te lagonaina e pei





AOAO ATU MAI LENEI SAVALI

Etatau ona tatou
“faatatauina tusi-
tusiga paia uma ia te i
[tatou], ina ia avea ma
o [tatou] manuia ma
aoaoga” (1 Nifae 19:23).
Maufaufau e faitau ia
tatalo o le faamanatuga,
o loo maua i le Mataupu
Faavae ma Feagaiga
20:76–79. A uma ona fai-
tau aoaoga a Peresitene
Eyring e uiga i tatalo o
le faamanatuga, atonu
e te manao e fai atu ia
i latou o loo e aoaoina
e mauaufau i ni auala e
mafai ai e nei tatalo ona
taialaina o latou olaga
ma fesoasoani latou te
toe foi atu ai e nonofo
faatasi ma le Tama Faale-
lagi ma Iesu Keriso.

lava o se faatalanoaga patino. Na te ta’u mai ia
te au mea sa ou faia na faafiafiaina ai o Ia, o
lo’u manaomia ona salamo ma faamagalo atu,
ma igoa ma foliga o tagata e finagalo o Ia ou
te auauna atu i ai mo Ia.

I le aluga o tausaga, o lenei aafiaga tupu
soo ua liliuina le faamoemoe i lagona o le

alofa mama ma aumaia ai se faamautinoaga
o le alofa mutimutivale sa tatalaina mo au e
le Togiola ma le Toetu a le Faaola.

Ou te molimau atu o Iesu o le Keriso
toetu, o lo tatou Faaola, ma o lo tatou
faataitai atoatoa ma le taiala i le ola
faavavau. ■

O Lau Faatalanoaga Patino ma le Atua

Ua aoao mai Peresitene Eyring, pe a tatou faalogo i tatalo o le faamanatuga, e mafai ona tatou lagona ai e pei o loo fai sa tatou faatalanoaga patino ma le Atua. O itu nei e tolu e mafaufau i ai Peresitene Eyring. Mafaufau e tusi fesili nei i lau api o talaaga ma manatunatu loloto i ai i Aso Sa taitasi o le masina lenei. A o e manatunatu loloto ma maua uunaiga mai

le Agaga Paia, e mafai foi ona e tusia e uiga i na uunaiga i lau api o talaaga.


- O le a se mea na ou faia ua fiafia ai le Atua?
- O le a se mea e manaomia ona ou salamo ai pe talosagaina ai se faamagaloga?
- O ai ua finagalo le Atua ou te auauna atu i ai?

TAMAITI

Ia Manatua Pea Iesu

O loo taumafai lakopo e “manatua pea” le Faaola (MF&F 20:77). Vaavaai solo i lona potumoe.

O le a se mea e te matauina e ono fesoasoani ia te ia e manatua ai pea Iesu?



Suesue ma le agaga tatalo i mea nei, ma pe a talafeagai ai, ia talanoaina faatasi ma uso e te asia. Faagaoga fesili e fesoasoani ai ia te oe e faamalosia ai ou uso ma avea ai le Aualofa ma se vaega ola o lou lava olaga. Mo nisi faamatalaga, alu i le reliefsociety.lds.org.

Feagaiga o le Malumalu

“O sauniga faaola e maua i le malumalu e mafai ai i se aso ona tatou toe foi atu i lo tatou Tama Faalelagi i se mafutaga faaleaiga e faavavau, ma faaeeina ai i faamanuiaga ma le mana mai luga, e matuai aoga ai lava a tatou osigataulaga uma ma taumafaiga uma,”¹ na saunoa mai ai Peresitene Thomas S. Monson. Afai e te le'i alu i le malumalu, e mafai ona e saunia e maua sauniga paia o le malumalu e ala i le:

- Talitonu i le Tama Faalelagi, Iesu Keriso, ma le Agaga Paia.
- Atiina ae se molimau i le Togiola a Iesu Keriso ma le talalelei toefuataiina.
- Lagolago ma mulimuli i perofeta soifua.
- O le agavaa mo se pepa malumalu e ala i le totogiina o le sefuluai, o le ola mama, o le faamaoni, tausia o le Upu o le Poto, ma ola e tusa ai ma aoaoga a le Ekalesia.
- Tuu atu taimi, taleni, ma mea e maua e fesoasoani ai e fausia le malo o le Alii.
- Auai i le faatinoina o le galuega o talafaasolopito o aiga.²



Sa aoao atili mai Peresitene Monson, “a tatou manatua feagaiga tatou te osia i totonu [o le malumalu], o le a sili atu ona tatou mafaia ona onosaia tofotofoga uma ma faatoilaloina faaososoga taitasi.”³

Mai Tusitusiga Paia

Mataupu Faavae ma Feagaiga 14:7; 25:13; 109:22

FAAMATALAGA

1. Thomas S. Monson, “O Le Malumalu Paia—o se Sulu Taiala i le Lalolagi,” *Liahona*, Me 2011, 92.
2. Tagai i le *O Afafine i Lo'u Malo: O Le Talafaasolopito ma le Galuega a le Aualofa* (2011), 21.
3. Thomas S. Monson, *Liahona*, Me 2011, 93.
4. *O Afafine i Lo'u Malo*, 29–30.
5. Sarah Rich, i le *O Afafine i Lo'u Malo*, 30.



Faatuatua, Aiga, Toomaga

Mai lo Tatou Talafaasolopito

“E silia i le 5,000 le Au Paia sa lolofi atu i le Malumalu o Navu ina ua uma lona faapaiaiga. . . .

“O le malosiaga, mana, ma faamanuiaga o feagaiga o le malumalu [sa lagolagoina] le Au Paia o Aso e Gata Ai i le taimi o la latou faigamalaga [i sisifo], ina ua latou [pagatia] i le malulu, vevela, fiaaai, matitiva, ma'i, faa-lavelave faafuasei, ma le oti.”⁴

E pei o le toatele o uso o le Aualofa, o Sarah Rich sa auauna atu o se tagata e galue i le malumalu. Sa ia saunoa e uiga i ona aafiaga: “Ana leai le faatuatua ma le malamalama sa faapea ona faaeeina i o matou luga i lena malumalu e . . . le Agaga o le Alii, semanu le matou faigamalaga e faapei o le puna ifo i le pouliuli. . . . Ae sa ia i matou le faatuatua i lo tatou Tama Faalelagi, . . . o le lagonaina o i matou o Ona tagata filifilia . . . , ma nai lo le faanoanoa, sa matou lagonaina le olioli ona sa oo mai le aso o lo matou laveaiga.”⁵

O le faigamalaga umi sa le o se “puna ifo i le pouliuli” mo tamaitai faamaoni o le Au Paia o Aso e Gata Ai. Sa lagolagoina i latou e a latou feagaiga o le malumalu.

O Le a se Mea e Mafai Ona Ou Faia?

1. Pe o o'u tapuai i le malumalu e le aunoa?
2. Pe o o'u faamalosiau atu i o'u uso ia maua faamanuiaga o le malumalu?

SUESUE FAATASI I SAUNOAGA O LE KONAFESI

O le suia o le auala e toe faamanatu ai le konafesi e matuai faaleleia ai a tatou talanoaga faaleaiga e uiga i le talalelei.

Saunia e Greg Batty

Mo le tele o tausaga ua matou fialia ai i le faitauina o se aiga o lomiga o le konafesi, e tasi le tusiga i le taimi. Pe a matou amataina, matou te faapotopoto faatasi i le laulau ma feauauai e faitau leotele se parakalafa. Peitai, sa matou iloa ai sa matou faitauina ina ia faauma ai, e aunoa ma le taofi ae mafaufau ma malamalama i savali.

Ina ia matou aoaoina ni mea se tele mai mea sa matou faitauina, sa ma faatauina mai ai ma lo'u toalua se kopi se tasi o le lomiga o le konafesi mo tagata taitoatasi o le aiga ma fua-fua pe fia ni lauga o le a manaomia ona matou suesueina i vaiaso taitasi ina ia mafai ona matou faitauina uma a o le'i oo i le isi konafesi aoao e sosoo ai. O nisi vaiaso matou te faitauina ai se lauga se tasi, o isi vaiaso pe a ma le lua, ae e tatau i tagata uma ona suesue i le lauga ma faailoga vaega latou te fialia i ai. Ma mo afiafi faaleaiga, matou te aoaoina atu ai le tasi ma le isi mai a matou vaega na faailogaina.

E masani ona i ai ni fesili a le ma fanau e faapea ona amataina ai a matou talanoaga, pe ma te faia atu foi ma lo'u toalua ni fesili mai a maua suesuega. Ma te faatauina le faalogo atu i le ma fanau talavou o faamalamalama mai a latou tali i na

fesili, ma faasoa mai mea sa latou aoaoina i le seminare, i le lotu, pe i a latou foi suesuega patino. Sa avea lenei mea ma se auala sili lava e faalogologo atu ai i molimau le aloaia a le tasi ma le isi i se tulaga faisoo, i se siosiomaga sili ona lagolelei ma faasamasamanoa.

E le'i umi ae matou iloa ai o a matou suesuega o tusitusiga paia i taeao sa faapena foi lona agaga. O nisi aso pe na o ni nai fuaiupu lava matou te faamaeaina ae vave lava ona uma le taimi i talanoaga e uiga i na fuaiupu ma auala e faatatau atu ai i mea sa tutupu ia i matou.

O o matou taeao ua faatumulia i talanoaga, taliega, ma le lotogatasi ae matou te le'i taape taitasi atu i a matou fuafuaga fai. O loo i ai ni a matou molimau malolosi e uiga i fautuaga a lo tatou perofeta ia suesue ma tatalo faatasi i aso uma. Ua suia lo matou aiga i se aiga e aoao mai ma faamalosia e le tasi le isi. O nei mea uma o se taunuuga o le manao ia maua mai teisi ni mea aoga mai konafesi aoao. ■

O Greg Batty e aumau i Luta, ISA.



SUESUE MA FAAAOGA SAVALI O LE KONAFESI

“Ia manatua o savali ua tatou faalogo i ai i lenei konafesi o le a lolomiina i le lomiga o le mekasini o Me o le *Ensign* ma le *Liahona*. Ou te uunaia outou e suesue i savali, ia manatunatu loloto i a latou aoaoga, ona faatatau lea i lou olaga.”

Peresitene Thomas S. Monson, “Se Upu i le Faaiuga,” *Liahona*, Me 2010, 113.



O LE TAUO O UO LELEI

Ouo e malolosi tele a latou faatosinaga i a tatou amioga, ae maise lava i a tatou tupulaga talavou. “O le a latou faatosinaina lou mafau-fau ma amioga, ma e fesoasoani foi e iloa ai le ituaiga tagata o le a avea ai oe.”¹ Ma a e filifilia ni uo lelei, “o le a avea i latou ma se malosiaga ma se faamaniuaga sili ia te oe. . . . O le a latou fesoasoani ia te oe e avea ma se tagata lelei atu ma o le a faigofie ai foi ona e ola i le talalelei a Iesu Keriso.”²

I itulau e 52–53 o le lomiga lenei, o loo aoao mai ai Elaine S. Dalton, o le peresitene aoao o Tamaitai Talavou, i le tauo o le sailia ma le avea ma se uo lelei. Fai mai a ia, “o le sailia o uiga aupito sili ona lelei o le isi tagata o le ute lea o faauoga moni.”

O le fausia o faauoga i luga o nei mataupu faavae o le a fesoasoani ai i le autalavou e fausia ni mafutaga tumau ma ni tomai faaagafesootai o le a sili atu nai lo na o le avea ma ni “uo” i saite o upega o fesootaiga faaleagafesootai. I le avea ai ma matua e mafai ona e fesoasoani i lau fanau ia mala-malama i le tauo o le avea ma se uo lelei ma le filifilia o uo o le a uunaia i latou e ola i le talalelei. Atonu o le a aoga fautuaga nei.

Fautuaga mo le Aoaina o le Autalavou

- I le avea ai o se aiga, saili i tusi-tusiga paia mo faataitaiga o ni uo lelei. Talanoa po o a uiga na

faamallosia ai na faauoga. Mafau-fau ia Tavita ma Ionatana (tagai i le 1 Samuelu 18–23), Ruta ma Naomi (tagai i le Ruta 1–2), ma Alema ma atalii o Mosaea (tagai i le Mosaea 27–28; Alema 17–20).³

- Suesue le vaega e faatatau i uo i le *Mo Le Malosi o le Autalavou*. Faasoa atu i lau autalavou le ala na faatosinaina ai lou olaga e faauoga. Fai atu ia i latou e faasoa atu pe na faapefea ona latou faatosinaina [a latou uo] ma pe na faapefea foi ona faatosina i latou e a latou uo.
- Faitau le tusiga a Sister Dalton o loo i le lomiga lenei. Talanoa i le sini sa faatuina e lana tama teine o Emi, e saili ni [ana] uo lelei. Fesoasoani i lau fanau e faatutu ni sini e uiga i ituaiga uo latou te mananao e sue ma avea ai foi i latou.
- Mafau-fau e fai se afiafi faaleaiga e faasoa atu ai manatu mo le atiina ae o faauooga, e pei o le: “Ia i ai ni uo lelei, ia avea ma se uo lelei. Faaali atu le fiafia moni i isi; ata-ata ma faailoa atu ia i latou e te popole mo i latou. Fai tagata uma ma le agalelei ma le faaaloalo, ma ia aloese mai le faamasino atu ma le faitioina o i latou e siomia oe.”⁴

Fautuaga mo le Aoao Atu o Tamaiti

- O le avea ma se uo e aofia ai le fesoasoani atu i isi. Faitau le



MAU E UIGA I FAAUOOGA

Faataoto 17:17; 18:24

Failauga 4:9–10

Mataio 25:34–40

Luka 22:32

Mosaea 18:8–9

“Tu Atu mo Kalepo” o loo i le *Liahona* o Mati 2009, ma talanoa faatasi ma lau fanau e uiga i auala e mafai ona latou agalelei atu ai i tagata uma latou te feiloai i ai.

- I tulaga luma lava, e tatau ona tatou filifili po o le a le ituaiga uo o le a avea ai i tatou. Usu faatasi le pese “O Loo O’u Taumafai Avea e Pei o Iesu”⁵ ona outou talanoa lea ma lau fanau e uiga i auala e mafai ona latou filifilia e avea ai ma se uo lelei, e pei o le Faaola, i ni tulaga eseese. ■

FAAMATALAGA

1. *Mo Le Malosi o le Autalavou* (tamaitusi, 2011), 16.
2. *Mo Le Malosi o le Autalavou* 16.
3. Tagai i le Jeffrey R. Holland, “Real Friendship,” *New Era*, Iuni 1998, 62–66.
4. *Mo Le Malosi o le Autalavou* 16.
5. “O Loo Ou Taumafai e Avea e Pei o Iesu,” *Tusipese a Tamaiti*, 40–41

O LE AGAGA PAIA E FAAMAFANAFANA, MUSUIA, MA MOLIMAUINA

O le meaalofo o le Agaga Paia o se tasi o faamanuiaga silisili e mafai ona tatou maua i lenei olaga, aua o le Agaga Paia e faamafanafana, musuia, lapataia, faamama, ma taialaina i tatou. E mafai ona ia faatumuina i tatou “i le faamoemoe ma le alofa atoatoa” (Moronae 8:26). Na te aoao mai “le moni o mea uma lava” (Moronae 10:5). Tatou te maua faaaliga ma meaalofo faaleagaga mai le Atua e ala mai i le Agaga Paia. Ae o le mea e sili ona taua, tatou te maua a tatou molimau e uiga i le Tama Faalelagi ma Iesu Keriso e ala i le Agaga Paia.

Ae e te le'i papatiso, e mafai ona e lagona le Agaga mai lea taimi i lea taimi. Ae e na o le mauaina o le meaalofo o le Agaga Paia i le uma ai o lou papatisoga e mafai ai ona e olioli i le mafutaga tumau ma le Agaga

Paia, pe afai lena e te agavaa. O lenei meaalofo sa tuuina atu e se tasi o loo umia le Perisitua Mekisateko e ala i le faaee atu o lima (tagai i le Galuega 19:6; MF&F 33:15). O aso Sapati uma lava la e sosoo mai ai, e mafai ona e faafouina au feagaiga o le papatisoga pe a e tagofia le faamanatuga ma faapea ona maua ai faamanuiaga a le Alii ina ia mafai ona e “maua pea Lona Agaga” e faatasi ma oe (MF&F 20:77).

O le Agaga Paia, lea e masani ona ta'ua o le Agaga, o le sui lona tolu o le Aigaatua. Na aoao mai le Perofeta o Iosefa Samita: “Ua i le Tama se tino o aano ma ivi e mafai ona pa'i i ai e pei o le tagata; ua faapea foi le Alo, ae o le Agaga Paia e leai se tino o aano ma ivi, ae o se peresona Agaga. A na le faapea, e le mafai e le Agaga

Paia ona mau i totonu o i tatou” (MF&F 130:22).


E tataua ona tatou agavaa mo Lana mafutaga “aua e le afio le Agaga o le Alii i malumalu le paia” (Helamana 4:24). Tatou te faia lena mea, faatasi ai ma isi mea, i le i ai o mafaufauga mama, ola faamaoni, ma taumafai e tausi poloaiga. ■

Mo nisi faamatalaga, tagai i le 2 Nifae 31:13, 17; 32:5; 3 Nifae 27:20; Moronae 10:5–8; Iosefa Samita—Talafaasolopito 1:70.

E LE TATAU ONA TATOU MANATU FAATAUVAA I LENEI MEAALOFA


“E pei lava o isi meaalofo uma, o le meaalofo lenei e tataua ona mauaina ma taliaina ina ia fiafia ai. Ina ua tuu lima o le au perisitua i luga o lou ulu e faamauiina oe o se tagata o le Ekalesia, sa e faalogo i upu, ‘Talia le Agaga Paia.’ E le faapea la o lenei mea e faapea, o le a avea e le aunoa le Agaga Paia ma au soa tumau. O loo lapatai mai i tatou e tusitusiga paia e faapea, o le Agaga o le Alii o le a ‘le faavavau ona finau ma le tagata’ (Kenese 6:3). Pe a faamauiina i tatou, ua tuuina mai ia i tatou le *aia tataua* i le mafutaga a le Agaga Paia, peitai o se aia tataua lea e tataua ona faaauau pea ona tatou maua e ala i le usiusitai ma le agavaa.”

Elder Joseph B. Wirthlin (1917–2008) o le Korama a Aposetolo e Toasefululua, “O Le Meaalofo e Le Matalatalaina,” *Liahona*, Me 2003, 28.



A uma ona [tatou] maua le meaalofo o le Agaga Paia, e mafai ona tatou faia le tele o mea e valaaulia ai Lana uunaiga i o tatou olaga:

Tatalo.



Suesue i tusitusiga paia.



Aai ma feinu ma le agavaa i le faamanatuga.



Tapuai i le malumalu.



Matamata i faasalalauga lelei, faaoga gagana mama, ma ia mama mafaufauga.



Oti MA LE Ola

MANATU FAAALIA O PAIONIA I LE TOETUTU

A o malaga atu uluai tagata liliu mai o le Ekalesia i sisifo o le Iunaite Setete e faapotopoto ai ma le Au Paia, sa latou feagai ma le oti ae sa faamalosiaina i latou e lo latou faatuatua fou i le talalelei toefuataiina. O upusii o loo ta'ua i lalo mai tala a painoia sa faaalua ai le faamoemoe o le Au Paia i le Toetu, faatasi ai ma aoaoga faalaeiau mai uluai Peresitene e toailima o le Ekalesia.

O se tala e uiga i se tama Sikanetineivia e le mailoa le igoa o le Au Paia o Aso e Gata Ai o le sa maliu lona atalii i le malaga mai Niu Ioka i Iuta i le 1866:

“Faatasi ai ma se fesoasoani a se uo sa eliina ai se tuugamau itiiti ma tuu ai i totonu toega [o le tino maliu]. O le tamaitiiti ua oti mai se faama'i matautia, sa leai se potopotoga o ni tagata faavauvau, leai se sauniga aloaia, leai ni faatusa o fuagalaau, leai se pese faaleagaga, leai se upu o le talaaga o le olaga. Ae a o le'i aluese atu le tamā faavauvau, sa ia faia se tatalo puupuu o le faapaiaa i lana gagana (Faa-Tenimaka) faapenei: . . .

“Le Tama Faalelagi: Sa E aumaia ia te a'u lenei oa itiiti—lenei atalii pele, ae o lenei ua e toe aveeseina atu. Pe mafai ona e faatagaina ia mafai ona taoto iinei ona toega e aunoa ma

le faalavelaveina seia oo i le taeao o le toetu. Ia faia lou finagalo. Amene.’

“Ma o le tula'i a'e mai le eleele sa faapenei ana upu faamavae:

“Tofa, la'u pele Anisi laitiiti—si o'u atalii aulelei.' Ona savali punou atu ai lea ma se loto mafatia, a o taulai atu lona ala i le itu o lana tolauapiga.”¹

Peresitene Iosefa Samita (1805–44):

“E ese le faalaeiau i e e faanoanoa pe a valaauina i latou e tetea ma se tane, ava, tama, tina, tamaitiiti, po o se tagata pele o le aiga, o le iloa, e ui ina taatia i lalo ma pala le tino faalelagi, ae o le a latou toetutu e nonofo i nofoaga e tumau faavavau i le mamalu e le toe oti, e le toe faanoanoa, puapugatia, pe toe oo i ai le oti, ae o le a avea i latou ma sulii o le Atua ma sulii faatasi ma Iesu Keriso.”²



O Joseph Watson Young (1828–73), o le tei o Polika Iaga, o lē sa malamala mai Egelani i le Iunaite Setete i le 1853:

“Sa o se vaaiga faavauvau le tuuina o se uso a tagata i le moe gase i le leva o le po faatasi ai ma na o ni nai molimau faanoanoa. . . . Sa leai se isi o lona aiga sa i ai po o se tagata faapitoa e faavauvau mo ia sei vagana ai se uso a auauna. O faamoemoega alofa nei o le natura faaletagata sa faapāina i sina taimi. O lenei alii talavou sa lafoai ese mea uma ina ia alu ai i Siona, ma sa mu lona loto i faamoemoega ola o se lumanai, ma le le'i mafaufauina o le a tuu lona tino faaletino i le galu fiaai. Ae peitai, sa le'i oti o ia e pei o i latou o e sa leai se faamoemoe, aua o lona filemu sa faia faatasi ma le Atua, ma sa ia maua le faamautinoaga atoa o se toetu faamamaluina i le taeao o e amiotonu.”³



Tauagavale:
Peresitene
Polika Iaga Luga:
Joseph Watson
Young.

Peresitene Polika Iaga (1801–77):

“Oka se vanu ina a pogisa ma se ataata ua tatou ta'ua o le oti! Ina ia pasi atu mai lenei tulaga o le olaga e tusa ai lea ma le tino faaletino, i se tulaga o le gaogao ii, e ese lava!

Oka se pogisa o lenei vanu! Se auala ina a lilo, ae e tataua lava ona tatou uia taitoatasi. Ou te fia fai atu ia te outou, a'u uo o le usoga, afai e mafai ona tatou vaaia mea e pei ona o i ai, ma e pei ona o le a tatou vaaia ma malamalama i ai, o lenei ataata ma le vanu pogisa po o le oti e matuai itiiti lava, o le a tatou faliu ma vaai atu i ai ma mafaufau, pe a tatou oti, e moni lava o le aoga silisili la lenei o lo'u olaga atoa, aua ua ou laasia mai se tulaga o le faanoanoa, lototiga, faavauvau, pagatia, mafatia, tiga, ita, ma le le fiafia i se tulaga o le olaga, lea e mafai ai ona ou fiafia atoatoa i le olaga pe afai lena e mafai ona fai lena mea e aunoa ma se tino.”⁴





O Dan Jones (1811–62), o se tagata liliu mai mai Uelese, sa folau faatasi atu ma Mrs. Williams ma isi tagata o le Ekalesia, i le Iunaite Setete i le 1849:

“Mrs. Williams, o Ynysybont e lata i Tregaron [Uelese], ua vave ona oo i se tulaga leaga, ma o faailoga e foliga mai e le o toe umi se taimi e ola ai. . . . Fai mai o ia o le faamamaluga silisili sa ia mauaina o le mafai lea ona avea ma se tagata o le ekalesia moni a le Alo o le Atua, ma sa leai se fefe i lona loto e uiga i le isi olaga ma ua faamaonia e lana tapuaiga lona malosi e sili atu nai lo se isi lava taimi muamua. . . . Sa ia fautuaina ma le faamaoni ona atalii ia faaaauu ma le faatuatua seia oo i le oti, ina ia mafai ona latou maua faatasi ma ia se toetutu sili atu. . . . Sa faaaauu pea lana tautalaga manino seia oo i le po, ma i le kuata e te’a ai le fa i le taeao


na sosoo ai, sa aluese filemu atu ai lona agaga, ma tuua ai se ataata i ona laugutu.”⁵

Peresitene Ioane Teila (1808–87):

“E ese le faalaeiauina ia i latou o e ua filifilia e faanoanoa i le malaga a uo pele ona o le oti, e iloa o le a tatou toe mafuta ma i latou! E ese le faamalosiau ia i latou o e ola e tusa ai ma mataupu faavae o le upu-moni ua faaalua mai, atonu e sili atu le faapitoa ia i latou o e ua faaaogaina lelei o latou olaga, o e sa onosaia le vevela ma le faigata o le aso, ia iloa i se taimi o i luma o le a tatou solia ai i lalo papuipui o le tuugamau, ma o mai o ni agaga ola ma ola pea, e olioli i le faapotopotoga a a tatou uo sa tofotofoina ma faatuatuaaina, e le toe mafatia i fatu o le oti, ma faauma le galuega na tuuina mai e le Tama tatou te faia!”⁶




Taumatau:
Peresitene
Ioane Teila.
Luga: Dan Jones.



O Andrew Jenson (1850–1941), o se tagata malaga mai Tenimaka o lē sa malaga i le vaega o taavaletoso a Andrew H. Scott mai Nebraska, ISA, i luta i le 1866:

“Ina ua matou molimauina o latou [o matou uso a aumalaga] tino faalelalogi ua tuuina ifo i le tina o le eleeele, i le toga-vao, sa matou fetagisi uma, pe sa lagona foi le pei e fetagisi; ona o le mafaufau i le tanuina faapea o e pele, ae faavave ona o ese atu uo ma aiga, e aunoa ma le faamoemoe e toe asiasi atu i nofoaga ua lagomau ai o latou tagata oti, e moni sa matuai faanoanoa ma faigata. . . . Peitai o le a maua o latou tuugamau pe a ili e Kaperielu lana pu i le taeao o le uluai toetutu. O i latou nei ua maliliu ua faapea ona tuu ifo i lalo o latou tino a o latou savavali atu agai i Siona. Ua faafoi atu i latou e le Alii ae le'i oo atu i lo latou taunuuga; sa le'i faa-tagaina i latou e vaai ia Siona i le tino; ae o le a latou maua le mamalu ma le olioli i le lumanai; sa latou maliliu a o



Tauagavale:
Peresitene
Uilifoti Uutilafi.
Luga: Andrew
Jenson.



taumafai e usitai i le Alii ma tausi Ana poloaiga, ma amuia i latou o e oti o i le [Alii].”⁷

Peresitene Uilifoti Uutilafi (1807–98):

“A aunoa ma le talalelei a Keriso, o le teteaga e ala i le oti o se tasi o mataupu e sili ona faanoanoa e mafai ona mafaufau i ai; ae o le taimi lava tatou te maua ai le talalelei ma iloa le mataupu faavae o le toetutu, o le faanoanoa, faavauvau ma le mafatia lea e aumai e le oti e, i se vaega tele lava, e aveesea. . . . O le toetutu o e ua oti ua tuuina mai ai o ia lava i luma o le mafaufau aoaoina o le tagata, ma ua i ai sona faavae mo lona agaga e malolo i ai. O le tulaga lena o le Au

Paia o Aso e Gata Ai i le asō. Ua tatou iloa mo i tatou lava, tatou te le o i ai i le pogisa e faatatau i lenei mataupu; ua faaali mai e le Atua ia i tatou ma ua tatou malamalama i le mataupu faavae o le toetutu o e ua oti, ma o le talalelei ua aumaia ai i le malamalama le ola ma le tino ola pea.”⁸



Ina ia mafai ona faitauina, ua faalaugatasia ai nisi o sipelaga, faasa'oga ma faamataitusi lapopoa.

FAAMATALAGA

1. Robert Aveson, “Leaves from the Journal of a Boy Emigrant,” *Deseret News*, Mat. 12, 1921, 4:7; o loo maua i le [lds.org/churchhistory/library/pioneercompanysearch](https://www.lds.org/churchhistory/library/pioneercompanysearch).

2. Aoaoga a Peresitene o le Ekalesia: *Iosefa Samita* (2007), 52.

3. Joseph W. Young, *Journal*, Mat. 6, 1853, Church History Library, Salt Lake City, Utah; o loo maua i le initoneti i le



O William Driver (1837–1920), o le paionia sa malaga mai Egelani i Niu Ioka, ISA, i le 1866:

“Sa ma’i tigaina Uili, lo’u atalii pele, i le po atoa seia oo i le 7:30 i le taeao, lea sa faasaolotoina ai o ia mai ona puapuaga. Ia faamanuia le Atua i lona agaga pele. Oka sona tigaina. Sa maliu o ia ona o le malepe o le taavaletoso a Mr. Poulter i luga o le Mauga o St. Ann, Wandsworth, Surrey, Egelani. Ok, so’u faanoanoa i lenei puapuagatia tele. Le Alii e, fesoasoani mai ia te a’u e ala i lou mana e tauave ai e pei o loo aumai i lou lima ma faaosofia au ia ou auaina atu i Lau Afio i le



Taumatau:
Peresitene
Lorenzo Snow.
Luga: William
Driver.



mamalu ma le faamaoni sili atu, ma ia ou ola e saunia e feiloai ia te ia i se lalolagi fiafia atu ma sili atu faatasi ma lona tuafafine pele o Elisapeta Meleane, ma i le toetutu o e amiotonu ina ia ou i ai iina e faafeiloai i la’ua.”⁹

Peresitene Lorenzo Snow (1814–1901):

“I le isi olaga e sosoo ai o le a faamamaluina ai o tatou tino ma saoloto mai ma’i ma le oti. E leai se mea e sili ona matagofie nai lo o se tagata i se tulaga toetu ma faamamaluina. E leai se mea e sili atu ona matagofie nai lo le i ai i lenei tulaga ma tatou i ai faatasi ma a tatou avā ma fanau ma uo.”¹⁰ ■

mormonmigration.lib.byu.edu.

4. Aoaoga a Peresitene o le Ekalesia: Polika Iaga (1997), 273.

5. “O se Tusi mai ia Kapeteni D. Jones i le Faatonu o le Udgorn Seion,” i Ronald D. Dennis, *The Call of Zion: The Story of the First Welsh Mormon Emigration*, vol. 2 (1987), 164–65; o loo maua i le mormonmigration.lib.byu.edu.

6. Aoaoga a Peresitene o le Ekalesia: Ioane Teila (2001), 50–51.

7. Andrew Jensen, Api Talaaga, Aok. 20, 1866, i le *Journal History of The Church of Jesus Christ of Latter-day Saints*, Oke. 8, 1866, Church History Library, Salt Lake City, Utah, 6; o loo maua i le lds.org/churchhistory/library/pioneercompanysearch.

8. Aoaoga a Peresitene o le Ekalesia: Uilifoti Uutilafi (2004), 82–83.

9. Frank Driver Reeve, ed., *London to Salt Lake City in 1866: The Diary of William Driver* (1942), 42; o loo maua i le mormonmigration.lib.byu.edu.

10. Lorenzo Snow, i le Conference Report, Oke. 1900, 63.



**Saunia e
Elder Russell M. Nelson**

O Le Korama a
Aposetolo e Toasefululua

O Le Misiona ma le Auaunaga a **IESU KERISO**

*O le faamaoniga sili lava o lo tatou
alolofa ia Iesu o lo tatou faataitai ia te Ia.*

Ile avea ai ma se tasi o “molimau faapitoa o le suafa o Keriso i le lalolagi atoa” (MF&F 107:23), ou te talitonu e sili atu ona lelei la’u auaunaga pe a ou aoao atu ma molimau atu e uiga ia te Ia. Muamua, atonu ou te fai atua ia fesili lava e tasi ia sa Ia fetalai atu ai i le au Faresaio: “Se a lo outou taofi ia Keriso? se atalii ea ia o ai?” (Mataio 22:42).

O nei fesili e masani ona manatua pe a ou feiloai atu i taitai o malo ma aulotu o tapuaiga eseese. E fai mai nisi “O Iesu o se faiaoga maoae.” E fai mai isi, “O Ia o se perofeta.” O isi latou te matuai le iloa lava o Ia. E le tatau ona tatou matuai tete’i ai. Aua foi, e toalaiti ni tagata ua latou maua upumoni o le talalelei toefuataiina lea ua tatou maua. O tagata o Le Ekalesia a Iesu Keriso o le Au Paia o Aso e Gata Ai, ua na o se aofaiga laitiiti lava ua aofia ai i e ua fai mai o i latou o ni Kerisiano.

O lo tatou tulaga i aso nei sa muai vaaia i seneturi ua mavae e Nifae:

“Ma sa oo ina ou vaai atu i le ekalesia a le Tamai Mamoe a le Atua, ma sa toaitiiti ona aofai . . . ; e ui i lea, sa ou vaai o le ekalesia a le Tamai Mamoe, o i latou ia o le au paia a le Atua, ua i ai foi i latou i luga o le lalolagi atoa; ma sa itiiti a latou puleaga i luga o le lalolagi. . . .

“Ma sa oo ina a’u vaai a’u o Nifae, i le mana o le Tamai Mamoe a le Atua, ua alu ifo i luga o le au paia o le ekalesia a le Tamai Mamoe, ma luga o tagata o le feagaiga a le Alii, o e sa faataapeapeina i luga o le lalolagi atoa; ma sa faaauppegaina i latou i le amiotonu ma le mana o le Atua i le mamalu tele” (1 Nifae 14:12, 14).

O lena amiotonu, lena mana, ma lena mamalu—e moni, o o tatou mau faamanu-iaga—e afua mai lo tatou malamalama e uiga, usiusitai i le, ma le agaga faafetai ma le alofa mo le Alii o Iesu Keriso.

I le taimi puupuu sa Ia afea ai le lalolagi nei, e lua ni faamoemoega taua sa ausia e le Faaola O le tasi o Lana “galuega ma [Lona] mamalu—ia aumaia le tino ola pea



ma le ola faavavau o le tagata” (Mose 1:39). O le isi sa Ia fetalai mai ai faapea: “Aua ua ou avatu le faaaoao ia te outou, e pei ona ou faia ia te outou, ia faapea lava e outou ona fai” (Ioane 13:15).

O Lona faamoemoega muamua ua tatou ta’ua o le Togiola. O Lana misiona maoae lenei i le tino. I tagata o Amerika anamua, sa tuuina atu i ai e le Alii toetu le faamatalaga o Lana misiona:

“Ua ou sau i le lalolagi e fai le finagalo o lo’u Tama, aua na auina mai a’u e lo’u Tama.

“Ma na auina mai a’u e lo’u Tama, ina ia sii ae a’u i luga o le satauro; ma a mavae ona sii ae o a’u i luga o le satauro, ina ia mafai ona ou aumai o tagata uma ia te au” (3 Nifae 27:13–14).

I le faaauau ai o Lana saunoaga, sa Ia faaalia ai Lona faamoemoega lona lua—ia avea ma o tatou faataitaiga: “Ua outou iloa mea e tatau ona outou faia . . . ; aua o mea na outou vaai ua ou faia o mea lava ia ia outou faia” (3 Nifae 27:21).

O Lona faamoemoega muamua ua ou faamatalaina o Lana *misiona*. O Lona faamoemoega lona lua ou te fia faailoa atu o Lana *auaunaga*. Sei o tatou iloiloinei nei vaega o Lona soifuaga—Lana misiona ma Lana auunaga.

O Le Misiona a Iesu Keriso—o le Togiola

O Lana misiona o le Togiola. O lona misi-ona o Lana lava e tulaga ese. O le soifua mai i se tina faaletino ma se Tama e faavavau, sa na o Ia ai lava e mafai ona ofo mai e tuuina ifo Lona soifua ma toe aumai ai (tagai i le Ioane 10:14–18). O taunuuga mamalu o Lana Togiola e le gata mai ma e faavavau. Ua Ia aveese mai le tui o le oti ma faia ai ia na o se taimi le tumau le faanoanoa o le tuugamau (tagai i le 1 Korinito 15:54–55). O Lona tiutetauave mo le Togiola ua loa ona iloa a o le’i oo i le Fofoaga ma le Pau. E le gata ina tuuina mai ai le toetutu ma le tino ola pea i


tagata uma, ae ina ia mafai ai foi ona faamagaloinei i tatou ia tatou agasala—e tusa ai lea ma tulaga sa Ia faatulagaina. Ma o lea, o Lana Togiola ua tatalaina ai le ala lea e mafai ai ona tatou toe faatasi ma Ia ma faatasi ai ma o tatou aiga e faavavau. O lenei vaaiga tatou te taua o le ola faavavau—o le meaalofo silisili a le Atua i le tagata (tagai i le MF&F 14:7).

E leai se isi tagata e mafai ona aumaia le Togiola. E leai se isi tagata, e tusa lava pe sili ona mauoa ma malosi, e mafai ona laveaiina se tagata se toatasi—e oo foi ia te ia lava (tagai i le Mataio 19:24–26). Ma e leai se isi tagata o le a manaomia pe faatagaina e faamaligi le toto mo le faolataga e faavavau o se isi tagata ola. Sa “fai faatasi” e Iesu (Eperu 10:10).

E ui ina sa faamaeaina le Togiola i le taimi o le Feagaiga Fou, ae na muai ta’u soo mai i mea na tutupu i le Feagaiga Tuai ia lona taua. Na poloaia Atamu ma Eva e osi ni taulaga e avea ma “se faatusa o le taulaga a le Toatasi na Fanaua e le Tama” (Mose 5:7). Faapefea? E ala i le faamaligiina o le toto. Mai o latou lava aafiaga sa latou faamautinoaina ai le mau e faapea “o i le toto le ola o le tino” (Levitiko 17:11).

Ua iloa e fomaia soo se taimi lava e le tafe atu ai le toto i se totoga, ua amata le faalavelave. Afai e faalavelaveina le tafe atu o le toto i le vae, o le mea e sosoo ai o le matutu o le vae. Afai e taofia le tafe atu i le faiai, e mafai ona tulai mai ai le pe o le faiai ma le tino. Afai e le tafe lelei atu le toto i se alatoto o le fatu, e ono tulai mai ai se fatu pe. Ma afai foi e le mafai ona utu le palapala, o le oti e sosoo ai.

Sa aoaoina e Atamu, Eva, ma augatupulaga e mulimuli mai, soo se taimi lava latou te faamaligi ai le toto o se meaola, ua faamuta ai foi ma lona ola. Mo a latou osigataulaga, ae le o soo se meaola. Sa tatau ona o se uluai manu lava o le lafu ma o se meaola e leai sona pona (tagai, mo se faataitaiga i le, Esoto



SENA E, FAALUA O LAU TAMA (STABAT MATER), SAUNIA E JAMES TISSOT © BROOKLYN MUSEUM, BROOKLYN, NEW YORK; ATA FAAPOOFO: FAAMATALAGA MAI LE LE FAATOAGA O KETESEMANE, NA SAUNIA E CARL HEINRICH BLOCH

*S*a amata e
le Faaola
ona faa-
maligi Lona toto
mo tagata uma,
e le o luga o le
satauro, lea sa
faamaeaina ai
tiga o le Togiola,
ae o totonu o
le Faatoaga i
Ketese mane.



12:5). O nei tulaga manaomia o se faatusa o le taulaga faaiu a le Tamai Mamoe e leai se pona a le Atua.

Sa tuuina atu ia Atamu ma Eva se poloaiga: “O le mea lea, ia e faia mea uma e te faia i le suafa o le Alo, ma ia e salamo ma valaau atu i le Atua i le suafa o le Alo e faava-vau” (Mose 5:8). Mai lava i lena aso seia oo mai i le tauloto-aiga o taimi, sa faaaauu lava ona avea taulaga i manu ma se ituaiga ma faatusa o le Togiola faaiu a le Alo o le Atua.

Ina ua faataunuuna le Togiola, o lena osigataulaga tele ma faaiu ua faataunuuna ai le tulafono a Mose (tagai i le Alema 34:13–14) ma faaleaogaina ai le faiga masani o le osi o taulaga i manu, lea sa aoao mai ai “[sa] i le toto le ola o le tino” (Levitiko 17:11). Sa faamalamalama mai e Iesu le ala na faitaulia faatasi ai elemene o taulaga anamua i le Togiola ma le faamanatuina faafaatusa e le faamanatuga. Ia matau foi mau faasino i le ola, o le tino, ma le toto:

“Ona fetalai atu lea o Iesu ia te i latou, E moni e moni, ou te fai atu ia te outou, afai tou te le aai i le tino o le Atalii o le tagata, a le inu foi i lona toto, ua le i totonu ia te outou le ola.

“O lē ai i lo’u tino ma inu i lo’u toto, ua ia te ia le ola e faavavau; ou te toe faatuina foi o ia i le aso gataaga” (Ioane 6:53–54).

Ona o le Togiola a Iesu Keriso, o tagata uma—e tusa lava po o le a le toatele o le a—o le a togiolaina. Sa amata e le Faaola ona faamaligi lona toto mo tagata uma, e le o luga o le satauro ae i totonu o le Faatoaga i Ketesemane. O iina sa Ia tauaveina ai i Ona luga le mamafa o agasala a i latou uma o le a ola. I lalo o lena avega mamafa, sa tafe toto ai Ona pu afu uma (tagai i le MF&F 19:18). O le tiga o le Togiola sa faamaeaina i luga o le satauro i Kalevaria.

Sa aoteleina e le Perofeta o Iosefa Samita le taua o le Togiola. Na ia fai mai, “O mataupu faavae autu o lo tatou talitonuga o le molimau a le au Aposetolo ma Perofeta, e faatatau ia Iesu Keriso, e faapea na maliu o Ia, ma tanumia, ma toetu mai i le aso tolu, ma afio a’e i le lagi; ma o isi mea uma e faatatau i lo tatou talitonuga ua na o ni faaopoopoga i ai.”¹

Faatasi ai ma lena mana ma lena agaga faafetai o’oo’o, ou te aoao atu ma molimau atu ai ia te Ia.

O Le Auaunaga a Iesu Keriso—o le Faaaoao

O le faamoemoega alualu mamao lona lua a le Alii i le olaga nei o le auauna atu lea e fai ma se faataitaiga mo

i tatou. O Lona soifuaga faaa'oa'o sa aofia ai Lana auunaga i le tino. Na aofia ai Ana aoaoga, faataoto, ma lauga. E aofia ai Ana vavega, agalelei-alofa, ma le talitiga i le fa-nauga a tagata (tagai i le 1 Nifae 19:9). E aofia ai Lona faaaogaina ma le agaalofa o le mana o le perisitua. E aofia ai Lona toata-mai tauamiotonuina ina ua Ia faasalaina ai le agasala (tagai i le Roma 8:3) ma ina ua Ia fuli i lalo laulau a e na faatau tupe (tagai i le Mataio 21:12). Na aofia ai Lona lotomafatia. Sa tauemuina, itagia, ma teenaina e Ona lava tagata (tagai i le Mosaea 15:5)—na oo lava ina faalaina e se tasi o soo ae faafitia e le isi (tagai i le Ioane 18:2–3, 25–27).

E ui i le matagofie o Ana galuega auuna atu, ae sa le avea o ni mea e tulaga ese ia te Ia. E leai se tapulaa o le aofai o tagata o e e mafai ona mulimui i le faataitaiga a Iesu. E faapena foi ni galuega ua faia e Ana perofeta ma aposetolo ma isi o Ana auuna faatagaina. E toatele na onosaia sauaga ona o Ia (tagai i le Mataio 5:10; 3 Nifae 12:10). I o tatou lava taimi, ua e iloa ni tuagane ma ni uso o e sa taumafai ma le naunautai—e oo lava i se tau matautia—e mulimuli i faataitaiga a le Alii.

O le mea lena e tatau ona i ai. O Lona faamoemoe lena mo i tatou. Na fetalai mai le Alii ia tatou mulimuli i Ana faataitaiga. E manino lelei Lana augani:

- “Pe faapefea la outou amio e tatau ai? . . . E pei lava o a'u nei” (3 Nifae 27:27; tagai foi i le 3 Nifae 12:48).
- “Ina mulimuli mai ia ia te a'u, ou te faia oulue ma fai faiva i tagata” (Mataio 4:19).
- “Aua ua ou avatu le faaa'oa'o ia te outou, e pei ona ou faia ia te outou, ia faapea lava e outou ona fai” (Ioane 13:15; tagai foi i le Ioane 14:6).

O nei mau ma isi mau faapenei sa le'i tusia o ni fautuaga. O ni tulaga manaomia paia! E tatau ona tatou mulimuli i Ana faataitaiga!

Ina ia fesoasoani i lo tatou naunau e mulimuli ia te Ia, atonu e mafai ona tatou mafau-fau i itu nei e lima o Lona soifuaga e mafai ona tatou mulimuli i ai.

Alofa

Afai ou te fesili atu po o le fea o uiga auumama o Lona soifuaga e te ta'uina mai muamua, ou te manatu e te ono ta'u mai Lona uiga faaalua o le alofa. O lena e aofia ai Lona agaalofa, agalelei, alofa mama, tuuto, faamagalo atu, alofa tunoa, faamasino tonu, ma le anoano o isi mea. Sa alofa Iesu i Lona Tama ma Lona tina (tagai i le Ioane 19:25–27). Sa alofa o Ia i Lona aiga ma le Au Paia (tagai i le Ioane 13:1; 2 Tesalonia 2:16). Sa alofa o ia i le tagata agasala ae le ta'uamiotonuina le agasala (tagai i le Mataio 9:2; MF&F 24:2). Ma sa Ia aoao mai ia i tatou le ala e mafai ona faaali atu ai lo tatou alolofa ia te Ia. Na fetalai o Ia, “Afai tou te alolofa mai ia te au, ia outou tausi mai i au poloaiga” (Ioane 14:15). Ma, ina ia faamamafa mai o Lona alofa sa le *le faatuaia*, sa Ia faaopoopo mai, “Afai tou te tausia a'u poloaiga ona tumau lea o outou i lo'u alofa; pei ona ou tausia poloaiga a lo'u Tama, ma ou tumau i lona alofa” (Ioane 15:10; tagai foi i le MF&F 95:12; 124:87).

O le isi faailoaga o le alofa o lo tatou Faa-ola o Lana auunaga. Sa Ia auuna atu i Lona Tama, ma sa Ia auuna atu i tagata sa mafuta ma galulue faatasi ma Ia. I nei auala uma e tatau ai ona tatou mulimuli i Lana faataitaiga. E tatau ona tatou auuna atu i le Atua, “ina ia e savali i ona ala uma lava, ma ia e alofa atu ia te ia” (Teuteronomie 10:12; tagai foi i le 11:13; Iosua 22:5; MF&F 20:31; 59:5). Ma e tatau ona tatou alolofa i o tatou tuaoi e ala i le auuna atu ia i latou (tagai i le Kalatia 5:13; Mosaea 4:15–16). Tatou te amata i o tatou aiga. O le alofa loloto lea e fusia ai matua i a latou fanau, e fausia e ala i le auuna atu ia i latou e ala i le taimi o le faalagolago atoa-toa i ai. Mulimuli ane i le olaga, e maua ai e



O le tulaga na lauiloa ai Ana aoaoga e sili atu nai lo isi faiaoga uma, sa Ia aoao mai upu-moni e faavavau o latou taua. E na o Ia lava e mafai ona faaalua mai lo tatou faamoemoe e i le olaga.





tamaiti usiusitai le avanoa e toe totogi atu ai lena alofa pe a latou tautuaina o latou matua matutua.

Sauniga

O le vaega lona lua o le soifuaga o faataitaiga a le Faaola o Lana faamamafa i sauniga paia. I Lana auaunaga i le tino, sa Ia faaalua ai le taua o sauniga o le faaolataga. Sa papatisoina o ia e Ioane i le Vaitafe o Ioritana. E oo lava foi ia Ioane sa fesili, “Aisea?”

Sa faamalamalama atu e Iesu, “Aua e faapea ona tatau ia te i *tatou* ona faataunuaina o mea tonu uma” (Mataio 3:15; ua faaopoopo le faamamafa). Sa le gata ina taua le sauniga, ae o le faataitaiga foi sa faia e Iesu ma Ioane sa faapena foi ona taua.

Mulimuli ane sa faailoa mai ai e le Alii le sauniga o le faamanatuga. Sa Ia faamalamalamaina le faatusa o le faamanatuga ma tufa atu ona faatusa paia i Ona soo (tagai i le Mataio 26:26–28; Mareko 14:22–24; Luka 24:30).

Sa tuuina mai foi e lo tatou Tama Faalelagi faatonuga e uiga i sauniga. Na fetalai o Ia: “E faapea lava ona tatau ona toe fanauina o outou i le malo o le lagi, i le vai, ma le Agaga, ma faamamaina i le toto, o le toto lava lea o la’u Toatasi na Fanaua; ina ia mafai ona faapaiaina outou mai agasala uma, ma olioli i afioga o le ola faavavau i le lalolagi a sau, o le mamalu ola pea lava” (Mose 6:59).

I le taimi o le galuega a le Alii ina ua mavae lona soifuaga i le tino, sa faapea ona faaali mai ai sauniga maualuluga atu o le faaeaga (MF&F 124:40–42). Ua Ia tuuina mai nei sauniga i totonu o Ona malumalu paia. I o tatou aso, o le mulumuluga, faauuina, ma faaeega paia e tuuina atu i tagata taitoatasi o e e saunia lelei (tagai i le MF&F 105:12, 18, 33; 110:9; 124:39). I totonu o le malumalu, e mafai ona faamauina ai se tagata i le tane po o le ava, i tuua, ma i fanau (tagai i le MF&F 132:19). O lo tatou Matai o se Atua o le tulafono ma le maopoopo lelei (tagai i le MF&F 132:18). O Lana taulaiga i sauniga o se vaega mamana o Lana faataitaiga ia i tatou.

Tatalo

O se vaega lona tolu o le auaunaga faafaataitaiga a le Alii o le tatalo. Sa tatalo Iesu i Lona Tama oi le Lagi ma aoao mai foi i tatou i le ala e tatalo ai. Tatou te tatalo i le Atua le Tama Faavavau i le suafa o Lona Alo, o Iesu Keriso, e ala atu i le mana o le Agaga Paia (tagai i le Mataio 6:9–13; 3 Nifae 13:9–13; Faaliliuga Iosefa Samita, Mataio 6:9–15). Ese lo’u fiafia i le Tatalo Faatoga sa fofogaina e le Alii o loo

tusia i le Ioane, mataupu e 17. O iina o loo saoloto lava le talanoa a le Alo ma Lona Tama e fai ma sui o Ona soo, o e e alofa tele i ai o Ia. O se faataitaiga o tatalo anoa ma le agaalofoa.

Atamai

O le vaega lona fa o le faataitaiga a le Alii o le faaaoga-ina o Lona atamai faalelagi. E pei ona ta'ua muamua atu, e toatele tagata e le o ni Kerisiano ua latou ta'ua e faapea o Iesu o se faiaoga maoae. Ioe, e sa'o lelei. Ae peitai, o le a le mea sa lauiloa moni ai Ana aoaoga? Pe sa avea o Ia ma se faiaoga atamai o le faaenisinia, matematika, po o le faasaienisi? I le avea ai ma Foafoa o lenei lalolagi ma isi lalolagi (tagai i le Mose 1:33), e mautinoa lava e mafai ona avea ai o Ia. Po o o le, avea ai ma Tusitala o tusitusiga paia, semanu foi e sili atu le lelei o lona aoaoina o tusiga tala fatu.

O le tulaga na lauiloa ai Ana aoaoga e sili atu nai lo isi faiaoga uma, sa Ia aoao mai upumoni e *faavavau* le taua. E na o Ia lava e mafai ona faaalua mai lo tatou faamoemoega i le olaga. E na o Ia lava e mafai ona tatou aoao ai i o tatou olaga i le *muai olaga* ma o tatou gafatia i le *olaga pe a mavae lenei olaga*.

I se tasi taimi sa fetalai atu ai le Matai Faiaoga i Ana au faalogologo masalosalo e faapea, o loo ia i latou ni moli-mau se toatolu e uiga ia te Ia.

- Ioane le Papatiso.
- O faatinoga sa faataunuuina e Iesu.
- O le afioga a le Atua le Tama Faavavau (tagai i le Ioane 5:33–39).

Ona Ia tuuina atu ai lea o le molimau lona fa: “E sue-sue outou i tusi; aua ua outou manatu tou te maua ai le ola e faavavau: o tusi foi ia o loo molimau ia te au” (Ioane 5:39).

O le upu *manatu* o loo i le fuaitau lena e pei e foliga mai i le taimi muamua e sese le mea o loo i ai. Ae e taua tele i le uiga sa taumafai Iesu e faailoa atu. Sa Ia silafia o le toatele o Lana au faalogologo sa *manatu* moni lava o le ola faavavau o loo i totonu o tusitusiga paia. Peitai, sa sese i latou. O tusitusiga paia lava ia e *le mafai* ona tuuina maia le ola faavavau. Ioe o loo i ai le mana i tusitusiga paia, ae o lena mana e sau mai ia Iesu lava Ia. O Ia o le Upu: *Lokou*. O le mana o le ola faavavau o loo i totonu ia te Ia, o lē “sa i le amataga le Lokou, sa i le Atua le Lokou,

o le Atua foi le Lokou” (Ioane 1:1; tagai foi i le 2 Nifae 31:20; 32:3). Ona, talu ai o le le maluelue o le tulaga o Lana au masalosalo, o lea sa aoai ai i latou e Iesu: “A e le mafafai outou ina o mai ia te au, ia outou maua ai le ola [faavavau]” (Ioane 5:40).

E mafai lava e le Matai ona lofituina i tatou i Lona poto faalelagi, ae Na te le faia. E faamamalu o Ia i lo tatou faitalia. Na te tuu i tatou e olioli pe a iloina se mea. Na te uunaia i tatou ia salamo i a tatou lava mea sese. Na te faata-gaina i tatou e oo i le saolotoga lea e maua mai le usiusitai ma le naunautai i Lana tulafono paia. Ioe, o le auala Na te faaaogaina ai Lona atamai ua tuuina mai ai se faataitaiga maoae mo i tatou.

Tumau

O le vaega lona lima o le auunaga a le Alii o Lona tau-tino e tumau seia oo i le iuga. E le'i faapea lava na aluese mai o Ia mai Lona tofiga. E ui ina sa oo o Ia i mafatiaga e sili atu nai lo mea tatou te malamalama i ai, ae sa le o Ia o se tagata e fugofie. E ui lava i tofotofoga o'oo'o, ae sa tumau lava o Ia seia oo i le iuga: ia togiola mo agasala a tagata ola uma. O Ana fetalai faaii a o tautau o Ia mai le satauro o le, “Ua taunuu” (Ioane 19:30).

Faatatuga i o Tatou Olaga

O nei vaega e lima o Lana auunaga e mafai ona faatatau i o tatou lava olaga. E mautinoa lava o le faama-oniga sili o lo tatou faamemelo ia Iesu o lo tatou faaaoao ia te Ia.

A amata ona tatou iloa ai po o ai Iesu, ae o a foi mea ua Ia faia mo i tatou, e mafai ona tatou malamalama, i se itu, i le alagataua o le poloaiga muamua ma le sili: “Ia e alofa foi i le Alii lou Atua ma lou loto atoa, ma lou agaga atoa, ma lou manatu atoa, ma lou malosi atoa” (Mareko 12:30). I se isi faa-upuga, o mea uma tatou te mafaufau i ai ma fai ma tautatala ai e tatau ona lofiaina i lo tatou alolofa ia te Ia ma Lona Tama.

Fesili ifo ia te oe lava, “E i ai se isi e sili atu ona ou alofa i ai nai lo o le Alii?” Ona faatusatusa lea o lau tali i tulaga faatonuina nei ua faatulagaina e le Alii:

- “O lē ua tele lona alofa i lona tama po o lona tina a e itiiti ia te a'u, e le aoga lea ia te a'u.”
- “O lē ua tele foi lona alofa i lona atalii po o lona afafine, a e itiiti ia te a'u, e le aoga foi lea ia te a'u” (Mataio 10:37).



O le soi-fuaga faafaa-taitaiga a le Alii na aofia ai Lana auauunaga i le tino. Na aofia ai Ana aoaoga, faataoto, ma lauga. E aofia ai Lona faaaogaina ma le agaalofo o le mana o le perisitua.

O le *alofo* mo aiga ma uo, po o le a lava le tele, e sili atu ona loloto pe a taula i le alofa o Iesu Keriso. O le alofa faamatua mo tamaiti e sili atu ona anoa iinei ma le olaga a sau ona o Ia. O mafutaga alofa uma e faateteleina ona o Ia. O le alofa i lo tatou Tama Faalelagi ma Iesu Keriso e tuuina mai ai le malamalama, musumusuga, ma uunaiga ia alofa atu ai i isi i se auala e sili atu le mamalu.

O *sauniga* e tuuina mai ai se taulaiga mo auauunaga e faavavau le taua. E tatau i matua ona tagai po o le fea sauniga e sosoo ai e manaomia e tamaiti taitoatasi. E tatau i faiaoga o aiga ona mafaufau i se sauniga talafeagai e sosoo ai e manaomia e aiga taitoatasi o loo latou tautuaina.

O le faataitaiga a le Faaola o le *tatalo* ua faamanatu mai ai ia i tatou o tatalo faaletagata lava ia, tatalo faaleaiga, ma le taumafaiga i le agaga tatalo o o tatou tofiga i le Ekalesia e tatau ona avea ma se vaega o o tatou olaga. O le iloa ma le faia o le finagalo o le Tama e aumai ai le malosia faaleagaga tele ma le talitonu o le tagata ia te ia lava (tagai i le MF&F 121:45). O le itu a le Alii o le itu lena tatou te fia i ai.

O le *Atamai* “o mea e pei ona i ai moni lava, ma e uiga i mea e pei o le a i ai moni lava” (Iakopo 4:13) e mafai ai ona tatou galulue i luga o mataupu ma aoaoga faavae moni. O lena atamai o le a siitia ai le maua luga o amioga. O amioga lea e ono faaosofia e le manao ma lagona o le a suia i galuega faatino e mamanuina e mafuaaga ma le sa’o.

O se tautinoga e *tumau seia oo i le iuga* o lona uiga o le a tatou le fesili mo se faamalologa mai se valaauga e auuina atu ai. O lona uiga o le a tatou tumau i le sailiga o se sini tauaogaina. O lona uiga o le a tatou le fiu lava i se tagata tatou te alolofa i ai ua se ese. Ma o lona uiga o le a tatou teufatuina e le aunoa a tatou sootaga faaleaiga e faavavau, e oo lava i aso faigata o faama’i, lē atoatoa, po o le oti.

Faatasi ai ma lo’u loto atoa, ou te tatalo ai mo lena uunaiga a le Alii e suia ai, ina ia mafai ona faia se eseese o’oo’o i lou olaga. O Lana misiona ma Lana auauunaga e mafai ona manuia ai i tatou taitoatasi i le taimi nei ma le faavavau. ■

Mai se saunoaga i le faigalotu sa faia i le aso 18 Aokuso, 1998, i le Iunivesite o Polika Iaga. Mo le tusiga atoa i le gagana Peretania, asiati i le speeches.byu.edu.

FAAMATALAGA

1. Aoaoga a Perisitene o le Ekalesia: Iosefa Samita (2007), 49.

Vaiaso o le Eseta

Sa faataunuuina e lo tatou Faaola o Iesu Keriso le Togiola—lea na aofia ai Lona mafatia i Ketesemane, Lona Faasatauroga i Kolokota, ma Lona Toetu mai le tuugamau—i le vaiaso faaiu o Lona soifuaga.

I le Fono i le Lagi ao le'i foafoaina le lalolagi, sa faailoa mai ai e le Tama Faalelagi Lana fuafuaga mo i tatou, o Lana fanau. Sa tatou alalaga fialia ina ua filifilia e le Tama Faalelagi ia Iesu Keriso e faataunuu le ata o le faaolataga (tagai i le Iopu 38:7 ma le Aperaaamo 3:27). Sa fanau mai ia Maria i Peteleema, sa soifua Iesu e aunoa ma se agasala. Ona o Lana Togiola, ua mafai ai ona tatou toe foi atu e nonofo faatasi ma lo tatou Tama Faalelagi ma maua le ola e faavavau. O le a toe afio mai Iesu Keriso i le mana ma le mamalu e afio i luga o le foga-eleele i le taimi o le Meleniuma, ma o le a tu o Ia o le Faamasino o tagata uma i le aso mulimuli.

O loo i lalo ni ata mai vitio o le Tusi Paia o loo faaalua ai le vaiaso mulimuli o le soifuaga o le Faaola. Fuafua e faitau ia mau o loo lisi atu i ata taitasi. Mo se faasologa atoa o mea na tutupu, tagai i le ogatasi o Tusi/Talalelei e fa i le Lomifefiloi o le Tusi Paia po o le Taiala i Tusitusiga Paia. O loo maua vitio o le Tusi Paia i le biblevideos.lds.org.

ATA © IRI



I le aso lona lima a o lumanai le Paseka, sa tietie atu ai Iesu i Ieruselema i se asini e pei ona sa valoiaina. Sa iloa e tagata o la o lo latou Tupu, ma alalaga ai "Osana," ma tuu o latou ofu ma laupama i luga o le palapala i luma atu o le asini. (Tagai i le Mataio 21:1-11; Mareko 11:1-11; Sakaria 9:9.)



Mo le taimi lona lua a o i ai i Lana galuega i le tino, sa faamama ai e Iesu lotoa o le malumalu. "E ta'ua lo'u fale, o le fale tatalo; a ua faia e outou ma ana o e faomea," o Lana fetalaiga lea i e faatau oa (Mataio 21:13). Ona o mai ai lea o le toatele o e tauaso ma e pipili ia te la i le malumalu, ma sa la faamaloloina i latou. Ae ina ua vaai faitaulaga sili ma le au tusiupu i Ana vavega, sa latou feita ma taumafai e saili e fasioti o la. (Tagai i le Mataio 21:12-17; Mareko 11:15-19.)

O Iesu Keriso, le Alo e Toatasi na Fanaua e le Tama, sa lotomauualalo e afio mai i le lalolagi e togiola tagata uma mai le Pau. (Tagai i le 1 Nifae 11:16-22, 26-33; Alema 7:10-13.)




I le aluga o le vaiaso atoa, sa fofogaina ai e le Faaola ia nisi o Ana fetalaiga e sili ona manatua pea, e aofia ai Lana aoaoga e uiga i le tupe iti a le fafine ua oti lana tane. (Tagai i le Mareko 12:41–44; Luka 21:1–4.)

I le Faatoaga o Ketesemane, sa tootuli ai le Faaola ma tatalo, o Lona tiga ona o agasala a le lalolagi sa mafua ai ona la “le gatete ona o le tiga, ma tafe toto ai i pu afu uma, ma mafatia ai i le tino atoa ma le agaga” (MF&F 19:18). E le’i leva ae pueina Iesu e luta le Sekara ma se motu o tagata faaaaupegaina, ma sa lafoaia e le au soo uma le Alii ae sosola. (Tagai i le Mataiao 26:36–56; Mareko 14:32–50; Luka 22:39–53.)



I Lana talisuaga mulimuli, sa folafola atu ai e Iesu i Ana aposetolo o le a latou maua le Fesoasoani, po o le Agaga Paia, pe a aluese o Ia. Sa Ia aoaoina i latou ia manatua o Ia e ala i le aai ma feinu i le faamanatuga. Ina ua maea lea afiafi, sa ofoina atu ai e Iesu le Tatalo Faatoga, lea sa la tatalo ai ina ia mafai ona tasi le au soo. (Tagai i le Mataiao 26:17–30; Mareko 14:12–26; Luka 22:14–32; Ioane 13–17.)





Ina ua uma se faamasinoga le faamaoni ma faasalaga faalealofa, sa faatagaina e Iesu Keriso o la lava ina ia faasatauroina, ma faamaeaina ai le “taulaga sili ma faaii” e mafai ai ona maua e fanau uma a le Atua le faaolataga (tagai i le Alema 34:14–15). A o le'i po, sa aveese mai e e na mulimuli ia Iesu ia Lona tino mai le satauro, 'au'i o la i ie ma mea faamanogi, ma tuu o la i totonu o se tuugamau. (Tagai i le Mataio 27; Luka 23; Mareko 15; Ioane 19.)



Na tafa mai ata o le taeao o le Aso Sa, ma sa taunuu atu Maria le Makatala ma isi tamaitai faamaoni i le tuugamau e toe uu le tino o Iesu. Latou te o atu ua fuli ese le maa o le tuugamau ma ni agelu se toalua sa tau maia le tala fiafia: “E le o iinei o ia: aua ua toe tu mai o ia” (Mataio 28:6). Ua manumalo le Faaola toetu i le oti faaletino ma ua mafai ai e i tatou taitoatasi ona toe ola: “Aua faapei ona oti uma ia Atamu, e faapea foi ona faaolaina uma ia Keriso” (1 Korinito 15:22). (Tagai i le Mataio 28; Mareko 16; Luka 24; Ioane 20). ■

Fesoasoani i Tamaiti

E SAUNIA MO LE PAPATISOGA

Saunia e Jessica Larsen ma Marissa Widdison

Mekasini a le Ekalesia

O le olaga faatamaitiiti o se vaitau o uluai fiafiaga O le taimi muamua o le tietie i se uila, alu i le aoga, po o le faataitaia o se meaai fou o ni nai mea mananaia ia e fiailoa e faapea ona mamanu ai le olaga o se tamaitiiti. I le avea ai ma ni tagata matutua tatou te maua le avanoa e fesoasoani ai i tamaiti i lena ala o le iloaina o mea. I le avea ai o ni tagata matutua i le Ekalesia, ua ia i tatou foi le avanoa e fesoasoani ai ia latou tutupu ae i le talalelei (tagai i le MF&F 68:25). O le a se mea e mafai ona tatou faia ia mautinoa ai o le papatisoga o se tamaitiiti—o le uluai feagaiga e faia e se tagata faatasi ma lo tatou Tama Faalelagi alofa—o se mea matagofie ma anoa?

Na aoao mai Peresitene Boyd K. Packer, “o le faavae autu o le Ekalesia lenei o le aoao lea o le autalavou: e muamua i totonu o le aiga ona sosoo ai lea ma totonu o le ekalesia.”¹

I faataitaiga o loo i lalo, o loo faasoa mai ai e matua auala sa latou saunia ai a latou fanau mo sauniga ma feagaiga paia o le papatisoga ma le faamauga.

Tatou te Vave Amata

“O le tausaga e atoa i ai le taifitu tausaga o tamaiti taitoatasi o se taimi lea e fiafia ai,” o le tala lea a Lori, o se tina a se fanau e toafa. La te aoaoina ma lona toalua le la fanau e uiga i le papatisoga mai lava i le aso e fananau mai ai. Ae peitai, a atoa loa le fitu o tausaga o le tamaitiiti, ona amata loa lea e lo latou aiga ona faia ni sauniuniga e sili atu ona patino. Latou te faia se lesone o le afiafi faaleaiga i masina taitasi e uiga i autu eseese e faatatau i le papatisoga, e pei o feagaiga ma faataitaiga a Iesu.

Fai mai Lori, o lesone i le masina o le aso fanau e atoa i ai le valu tausaga o le tamaitiiti e sili atu ona pele. Na te faaali atu i tamaiti ia ofu sa latou ofuina ina ua latou maua se igoa ma se faamanuiaga, ma e talanoa o ia e uiga i le aso sa faataunuuina ai lena sauniga.

“O le taimi lelei lava lea e taulai atu ai i faamanuiaga o feagaiga o le malumalu,” o le tala mai lea a Lori. “Matou te faia i taimi uma se faamamafaga o le aoao atu e faapea, o



le filifiliga ina ia papatisoina o le sitepu muamua lea o le saunia ai mo faamanuiaga o le malumalu.”

Matou te Faia o se Mataupu a le Aiga

O Monika, o se tina o se fanau e toafa, ua ia fautuaina mai le faaafua ai o tamaiti matutua atu e fesoasoani i nai o latou tei laiti e saunia i soo se taimi e mafai ai. “O le faalogo atu o molimau ma faasoa mai e lo latou tuagane po o le uso matua ia ona aafiaga e matuai faaopoopo ai le malosi,” o lana tala



lea. Fai mai Lori o nisi taimi la te fai atu ai i tamaiti ua sauni e papatiso e aoao atu mea ua latou iloina i nai o latou tei laiti ifo.

Matou te Faaaogaina o se Meafaigaluega Faafaifeautalai

Ina ua atoa le valu tausaga o le afafine o Tanielu, sa ia iloina o le a manao o ia e ta'u atu le aso o lona papatisoga i ana uo o e le auai i le Ekalesia. O lea sa tonu ai i lo latou aiga e tuuina atu le valaaulia mo le papatisoga o Allison i uo

mai le aoga ma le pitonuu. Sa talosagaina ia nei uo e aumai ni fuaitau e sili ona fiafia i ai mai le Tusi Paia i le papatisoga. Ina ua uma le papatisoga, sa faailoga e Allison ia fuaitau i lana seti fou o tusitusiga paia ma tusi ai igoa o ana uo i autafa o le mau.

“Toe, i le aveai ai ma lona aiga, sa matou aofia uma ai lava i lena aso. Ae sa matou tuu atu foi ia te ia ia faatasi ma ana uo mo sina taimi mulimuli ane ma talanoa atu ia i latou i ona lagona sa i ai,” o le tala lea a Tanielu. “Sa o se taimi sa sili ona pelega le vaaia o le ma tama o faia se faataitaiga.”

Sa Matou Faataitaia le Faatalanoaga ma le Epikopo

O Kimberly, o se tina a se fanau o vaitausaga ua latalata ina papatiso, e manatua le savali atu i totonu o le ofisa o le epikopo mo le faatalanoaga mo lona papatisoga ina ua atoa lona valu tausaga. “Sa matuai ou fefe lava!” o le tala lea a Kimberly.

O le taimi nei ua taumafai ai o ia ia mautinoa e le fetaiai lana fanau ma lagona o le popolevale. E talanoa atu i laua ma lona toalua i le la fanau e uiga i faatalanoaga ma le epikopo ma fai atu ia i latou fesili e uiga i le papatisoga i se tulaga e foliga o se faatalanoaga. O nei faatalanoaga e sili atu nai lo na o le faamasani o tamaiti i le faiga o le faatalanoaga—la te uunaia ai foi tamaiti e mafaufau loloto i le uiga ia i latou o le feagaiga o le papatisoga.

Ua Ia Te i Tatou se Avanoa Matagofie

E vave lava ona faailoa mai e nei matua latou te le o faia ni mea e sili atu i le saunia o a latou fanau mo le papatisoga ma le faamauga, ae o le toatele o i latou sa faaaogaina ia upu e pei o le “maeaea” ma le “faia e le aunoa” e faamatala ai lesone sa latou aoaoina i le aluga o tausaga. “Ma te faia ia mautinoa na malamalama le ma fanau o se laasaga aupito taua lena o o latou olaga, ma o se mea e sili ona maoae,” o le tala lea a Kimberly. “Sa ma faamautinoa i taimi uma o i maua tagata e saunia i latou, ae le na o le faamoemoe sa aoaoina i latou e o latou faiaoga o le Peraimeri.”

O se avanoa matagofie ua tuuina mai ia i tatou e fesoa-soani ai e saunia fanau tatou te alolofa i ai mo le papatisoga ma le faamauga! A o tatou faia ma le agaga tatalo lea tulaga, o le a faatasi mai le Alii ia i tatou e faatulaga lena aafiaga o le osi-feagaiga o se faavae mausali mo le tupu-tupu ae faaleagaga i le lumanai. ■

O itulau e lua o loo sosoo mai o loo taliina ai nisi o fesili a tamaiti e uiga i le papatisoga ma le faamauga.


FAAMATALAGA

1. Boyd K. Packer, “Aoao Atu le Fanau,” *Liahona*, Me 2000, 16.

Malamalama i le Papatisoa

Saunia e Marissa Widdison

Mekasini a le Ekalesia



O ai o le a papatisoina a'u?

O ai lava e papatisoina oe e tatau ona umia le perisitua—o le pule e galue ai i le suafo o le Atua. Ina ua finagalo Iesu e papatiso, sa alu o la ia loane le Papatiso, o lē sa i ai le perisitua (tagai i le Mataio 3:13).

O le tagata o le a papatisoina oe, o le a maua mai le faatagaga mai lou epikopo po o le peresitene o le paranesi.



Pe e tatau ona ou alu i lalo o le vai ina ia papatisoina?

Sa papatisoina Iesu e ala i le faatofuina, o lona uiga, sa alu ifo atoa o la i lalo o le vai ma toe vave alu ae ai i luga (tagai i le Mataio 3:16). O le auala foi lenei o le a e papatiso ai. O le papatisoina i le auala lenei e faamanatu mai ai ia i tatou, ua tatou tuua i tua o tatou olaga tuai ae amata se olaga fou e tuuto atu i le auauna atu i le Atua ma Lana fanau.



O a folafolaga ou te faia pe a ou papatiso?

Pe a e papatiso, e te osia se feagaiga, po o se folafolaga e lua ona itu, ma le Tama Faalelagi. E te folafola atu ia te la o le a e faia ni mea faapitoa, ae e folafola mai e la e faamanuia oe. O lenei feagaiga o loo faamalamalamaina i tatalo o le faamanatuga lea e faia i Aso Sa taitasi (tagai i le MF&F 20:77–79). E te folafola atu:

- la manatua pea Iesu Keriso.
- la tausia Ana poloaiga.
- la tauave i ou luga le suafo o Keriso, o lona uiga o le faamuamua o Lana galuega i lou olaga ma fai mea e finagalo ai o la nai lo mea e manao ai le lalolagi.

Pe a e tausia lenei folafolaga, ua folafola mai e le Tama Faalelagi o le a faatasi le Agaga Paia ma oe ma o le a faamagaloina au agasala.



O le a le Agaga Paia?

O le meaalofo o le Agaga Paia o se tasi o meaalofo e sili ona taua a le Tama Faalelagi. O lou papatisoga i le vai e le atoatoa seiloga e tuuina atu e alii ua umia le Perisitua Mekisateko ia te oe se faamanuiaga e maua ai le Agaga Paia (tagai i le Ioane 3:5).

O le Agaga Paia o se sui o le Aiga-atua. E molimau mai o ia i le Tama Faalelagi ma Iesu Keriso ma e fesoasoani ia i tatou ia tatou iloa le mea moni. E fesoasoani o ia ina ia tatou malolosi faaleagaga. Na te lapataia i tatou i mea matautia. E fesoasoani o ia ia tatou aoao. E mafai ona fesoasoani le Agaga Paia ia tatou lagona le alofa o le Atua.

A faamauina oe o se tagata o le Ekalesia, e mafai ona faatasi le Agaga Paia ma oe e le aunoa pe afai e te filifilia le mea sa'o.



Aisea e tatau ai ona le itiiti ifo ma le valu o ou tausaga ona faatoa ou papatiso lea?

Ua aoao mai le Alii o tamaiti e le tatau ona papatisoina seia oo ina lava lo latou matutua e malamalama ai i le eseese i le va o le sa'o ma le sese, lea fai mai tusitusiga paia o le valu o tausaga (tagai i le Moronae 8:11-12; MF&F 29:46-47; 68:27).



Saunia e Elder Jairo
Mazzagardi
O Le Fitugafulu

Tosina Atu i le Malumalu

Mo le toatele o tagata lelei, o le malumalu e musuia ai lagona lea e mafai ona tuia ai le loto i le taimi lava lena.

A o le'i valaauina au o se tasi o le Korama Lona Lua a Fitugafulu, sa ma faaaluina ai ma lo'u toalua ni tausaga e galulue ai i Malumalu o Campinas ma São Paulo Pasila I nei malumalu uma, e masani ona ou maofa ai ona o tagata e ui ane i talaane o le malumalu e matuai tosina lava i ai, o lea latou te tutu ai, ulufale, ma fesili e uiga i ai.

A latou ulufale mai, matou te logoina i latou e le mafai ona latou o mamao atu atu e aunoa ma sauniuniga e tatau ai. Ona matou faamalamalama atu lea o faamoemoega o malumalu, faasoa atu nisi o aoaoga faavae o le talalelei, ma valaaulia i latou e feiloai atu i faifeautalai. Mo le toatele o tagata lelei, o le malumalu lava ia o se faifeautalai maoae, aua e musuia ai lagona lea e tuia ai le loto i le taimi lava lena.

Ua ma iloa lelei lava ma lo'u toalua o Elisapeta le mana o na lagona. Ua toeitiiti 40 tausaga talu ai, sa amata lagalaga ae ai e se uo lelei ma se paaga, o se tagata o le Ekalesia le mataupu o le talalelei i se matou talanoaga faasamasamanoa. I ni nai taimi, sa ia auina mai ai faifeautalai e asiasi mai ia i maua. Sa ma fiafia i faifeautalai ma sa ma ioe ai e fai a ma lesone, ae sa ma le fia faalogo moni i mea sa la aoaina mai.



Sa suia lena mea ia Oketopa 1978, ina ua valaaulia e la'u uo nisi o uo, e aofia ai i maua, ina ua tatala le Malumalu o São Paulo Pasila mo maimoaga. Sa totogi lava e ia ni pasi ina ia mafai ona auai atu o ia ma ana uo i le malumalu, pe a ma le 50 maila (80 km) le mamao.

Ina ua ulufale atu Elisapeta i le potu mo papatisoga, sa ia lagonaina se mea na te le'i oo muamua lava i ai, o le mea sa ia iloina mulimuli ane o le Agaga Paia. O le lagona o se fiafia tele i totonu o lona loto. Sa ia iloina i lena lava taimi e moni le Ekalesia ma o le Ekalesia lea sa manao e auai.

Sa oo mai ia te au se lagona faapena ina ua maea le maimoaga, ina ua faasino atu i matou i le potu mo faamauga ma aoao mai ai le aoaoga faavae o aiga e faavavau. Sa faagaetia au i le aoaoga faavae. Sa faamanuiaina au i la'u galuega, ae ua leva ona ou lagonaina le gaogao o lo'u agaga. Sa ou le iloina po o le a se mea e mafai ona faatumulia ai lena gaogao, ae sa ou lagonaina o se mea e uiga i le aiga. O iina, i le potu mo faamauga, sa amata ona taatitia mai ai mea i o latou tulaga e tatau ai i totonu o lo'u mafaufau ma lo'u loto.

I totonu o ni nai aso, na toe faafesootai mai ai i maua e faifeautalai. O le taimi lenei sa ma matuai fia faalogologo i le la savali.

Sa uunaia i maua e alii faifeautalai e tatalo faatauanau e uiga i le mea moni. Sa tonu ia te au ua na o le pau lenei o le auala e *mafai* ai ona ou tatalo. Sa ou iloa e le mafai ona ou faia se tautinoga e auai i le Ekalesia e aunoa ma le mauaina o se molimau moni. Sa ou popole i le alu atu i le Tama Faalelagi e fesili atu mo se faamautinoaga mai ia te Ia, ae o le taimi foi lea, sa ou mautinoaga o le a Ia tali mai ia te au. Sa ou faasoa atu ia te Ia manaoga loloto o lo'u loto ma fesili atu ia te Ia e aumai ia te au se tali o le a faamautu ai o lo'u auai i le Ekalesia o le auala sa'o lea.

O le vaiaso sa sosoo ai i le Aoga Sa, sa nofo ai i o'u tua la'u uo lea sa valaaulia i matou i le

maimoaga i le malumalu. Sa faalagolago mai agai i luma ma amata ona talanoa mai ia te au. O upu sa ia fai mai ai sa tali lelei ai lava le mea sa ou tatalo e fia iloa. Sa leai so'u masalosalo sa fetalai mai le Tama Faalelagi ia te au e ala mai ia te ia. I le taimi lena, o au o se tagata pāū, ma le faigata, ae sa liusuavai lo'u loto ma sa amata ona ou tagi. Ina ua uma ona talanoa mai la'u uo, sa ia valaaulia i maua ma lo'u toalua ina ia ma papatiso. Sa ma taliaina.

I le aso 31 o Oketopa, 1978, e le itiiti ifo ma se masina talu ona mavae lo ma aafiaga i le Malumalu o São Paulo, sa faapea ona papatisoina ma faamauina ai i maua. O le aso na sosoo ai, sa ma auai i le sauniga lona lua o le faapaiaga o le Malumalu o São Paulo Pasila. O le tausaga mulimuli ane, sa ma toe foi atu ai i le malumalu faatasi ma o ma atalii e toalua ina ia faamauina o se aiga. O nei taimi uma e tolu sa o ni aafiaga matagofie, ma e le mafaagaloina. O loo faaauau pea ona ma teuteuina na lagona i tapuaiga e le aunoa i le malumalu i le aluga o tausaga.

Ua luasefulu-valu tausaga i le asō talu ona ma papatiso, ua ma toe tutu ai ma lo'u toalua i totonu o le Malumalu o São Paulo Pasila. Na faatoa valaauina lava a'u e avea ma peresitene o le malumalu. Sa o se aafiaga faapelepele mo i maua le savavali i puipui o le maota o le Alii ma toe maua lagona faapelepele ia sa avea ma auala o lo ma'ua liua.

E faaauau pea ona aumai e le malumalu le fiafia tele ia i maua ma lo'u toalua. A ma vaai i se ulugali talavou e ulufale mai i le malumalu ina ia faamauina o se aiga e faavavau, ma te lagonaina se faamoemoe maoae.

E toatele tagata i le lalolagi atoa ua sauni e faalogo i le savali o le talalelei. Latou te lagonaina le galala e tutusa lava ma le mea sa ou lagonaina i le silia ma le 30 tausaga ua mavae. O le malumalu ma ona sauniga ua lava le mamana e faamalieina ai le gagala ma faatumulia ai mea o gaogao. ■

SA I AI SE MEA SA FAALETONU O LA'U VAALELE

I se tasi afiafi a o o'u aveina atu la'u vaaalele e tumu i le pasese agai i le auala e masii ese ai vaaalele, sa ou maua se lagona e i ai se mea ua faaletonu o le vaega e uli ai le vaaalele. Ina ia faamaonia la'u uunaiga faaleagaga, sa ou alu ese mai le auala e ui ai le vaaalele ma fai ni nai liliuga faataamilo e 360 tikeri Sa foliga mai sa leai se mea na faaletonu.

Sa ou mafaufau, "Pe e tatau ona ou masii loa e momoli le pasese i lo latou nofoaga e faataunuu i ai i le taimi e tatau ai, pe e tatau ona ou toe foi i le faitotoa?" Sa ou iloaina o le toe foi o le a umi ai ona faatali. O auala e ui atu ai vaaalele e tasi lava le ituala; o lea e tatau ai ona ou faatalitali i le pulega o le laueleele e fai se avanoa mo a'u e

ui atu ai i le pisi o le auala. Ona matou faatalitali lea mo le vaega o enisinia e siaki le vaaalele. O le tuai e ono aliae ai ni faafitauli mo le kamupani vaaalele ma mo le pasese o e sa i ai tagata e faatalia i latou ma tagata e toe pue isi vaaalele. Sa ou mafaufau foi pe o le a se tali mai a le matagaluega enisinia i la'u lipoti e faapea, sa i ai se faaletonu o le vaaalele ae leai se mea e faamautu ai vagana ai se faalogoga malosi.

I le avea ai ma kapeteni o le vaaalele, o a'u sa nafa ma lo matou saogalemu, o lea sa ou filifili ai e mulimuli i le uunaiga ma toe foi mai.

Ina ua matou taunuu i le faitotoa, sa ou fai atu i le enisinia sa ou maua se lagona sa i ai se mea na faaletonu

i le vaaalele ae sa ou le iloa po o le a le faafitauli. Sa le'i talitonu o ia sa i ai se faafitauli.

"Atonu ai lava ona o le susū o le auala," o lana tala mai lea. "Atonu foi sa e sesee i le ta." E ui i lea, sa malie e tilotilo i le kia o le ave i le pa'u pito i luma. Ina ua uma ona ia siakia, sa talosaga mai e toe o uma i fafo le pasese ina ia mafai ona ia aveina le vaaalele e faataitai ai.

Ina ua foi mai i le 30 minute mulimuli ane, sa matuai popole lava o ia, I le taimi na alu ai e faataitai, sa ia faalogoina ai se pao motumotu o le oloia. Ina ua ia oomia taofi a o liliu e foi mai i le faitotoa, sa le mafai ona ia taofiofia le vaaalele ma sa toetiiti lava oso ese mai le auala e sesee ai le vaaalele.

O se suesuga maeaea na faalia ai sa le lelei le siakiina o taofi i le afiafi na muamua atu. Ana faapea ona ou faatulaueleeleina le vaaalele i le taunuu ai o le matou faigamalaga, semanu e le aai taofi, ma le mafai ai ona ou taofiofia le vaaalele.

Sa ou maua se isi vaaalele e ave, ma sa ou momoliina ai ma le saogalemu la'u pasese i o latou nofoaga na faataunuu i ai e tolu itula na tuai ai.

Ua ou fiafia sa ou faalogo i musumusuga a le Agaga. Ou te iloa o le a taitaia i tatou e le Agaga pe afai tatou te sailia le taitaiga a le Alii ma faalogo i musumusuga. ■

Craig Willie, luta, ISA

Sa ou mafaufau pe o a ni manatu o le matagaluega enisinia i la'u lipoti e faapea, sa i ai se faafitauli i le vaaalele ae na leai se mea na faamaonia ai vagana ai se faalogoga malosi.



MAUAINA O LE OLIOLI I LE OLAGA

I se tasi taimi sa ou faitau ai i se lauga o le konafesi aoao na saunia e Elder Richard G. Scott o le Korama a Apose-tolo e Toasefululua. E ui sa ou faalogo ma faitau muamua i lenei lauga, e tasi se fuaitau sa ou tosina i ai ma nofo ai i lo'u mafaufau.

O ni nai itula mulimuli ane, sa sau ai lo'u atalii o lē sa nonofo ma ana uo i se fale mautotogi, e asiasi mai. Sa avea o ia o se faifeautalai faamissiona ma sa auai foi i le kolisi mo ni nai semesa. Sa le mautonu o ia po o le fea le itu faaleaoaoga e tatau ona ia uia ae pe o le a foi le matata e tatau ona ia tulitulumatagauina. Talu ai ona sa le fiafia o ia ma manatu faapea o le aoga, mo le taimi nei, sa o se faamaumau taimi ma tupe, sa ia taofia ai ana aoga ma amata ai ona faigaluega tumau.

Sa ia fai mai ia te a'u, sa fautua atu e se tasi o ana uo la te o i se motu i le Bahamas po o le Karepiane, sue ni galuega, ma fiafia ai mo ni nai masina. Sa fiafia lo'u atalii e uiga i lea faamoe-moe. Sa faigofie ona ou iloa le i ai o le faatosina o sea aafiaga saoloto i se alii talavou.

O le taimi tonu lena, sa oo mai ai i lo'u mafaufau le savali musuia a Elder Scott. Sa ou aumai le *Ensign* ma faitau atu i lo'u atalii le vaega lenei: "Ua e i ai iinei i le lalolagi mo se faamoemoega paia. E le ina ia faafiafiaina e le muta po o le ia tulitulumatagauina atoa i taimi uma ia tuinanau. Ua e i ai iinei ina ia tofo-tofoina, ia faamaonia oe lava ina ia mafai ona e maua faamanuiaga faaopoopo o loo i ai i le Atua mo oe. E manaomia ai le faatosinaga agavaivai

o le onosai" ("Mauaina o le Olioli i le Olaga," *Ensign*, Me 1996, 25).

E aunoa ma se upu, sa ave e lo'u atalii le mekasini, savali ese atu, ma faitau le lauga atoa. Mulimuli ane, na pau lava lana tala na fai mai, o le a le alu i lana sailiga fiafia i le motu.

E le'i umi ae ulufale loa i le aoga faaleoleo, o se auala sa faapea ona taitaiina atu ai o ia e feiloai i lana avā o le lumanai. Sa la faaipoipo i le Malumalu o Mesa Arisona ma o le asō o loo la tausia ai se fanau aulelei e toatolu. I le 2010 sa faamaea ai e lo'u atalii lona tikeri o le tagatamalgaga ma ua ia "mauaina [moni] le olioli i le olaga."

O le malaga saili fiafia sa fuafuaina e lo'u atalii atonu o se aafiaga manaia; ae i le isi itu, atonu e ono matautia foi faaleagaga. O taimi uma ou te tomanatu ai i lenei aafiaga, e pai mai ai le Agaga i lo'u loto.

Ou te faafetai mo saunoaga a perofeta ma sa musuia a'u e manatua se saunoaga sa faapea ona fesoasoani ia te a'u e tuuina atu ai le taitaiga. Ou te matuai faafetai ona sa faalogo lo'u atalii i se avefeau a le Alii ma faataga le Agaga e musuia o ia. Ou te iloa e oo mai faamanuaiga e tele ma musumusuga pe a tatou faalogo atu ma mulimuli i aoaoga a le Faaola ma Ana auauna. ■

Karen Rockwood, Idaho, ISA



I na ua fai mai lo'u atalii sa fautua atu se tasi o ana uo la te o i Bahamas po o le Karepiane, ia fiafia ai mo ni nai masina, sa oo mai i lo'u mafaufau le savali a Elder Scott.

SA PE LE TELEFONI

Ia Mati 1997, a o ma nonofo ai i le laai o Rusia o Rostov-on-Don, sa ma papatiso ai ma lo'u toalua i Le Ekalesia a Iesu Keriso o le Au Paia o Aso e Gata Ai.

A o ou susesue i aoaoga faavae o le Ekalesia, e tele ni a'u fesili sa taliina ai. Sa manaia le aoao e uiga i le ata o le faaolataga, e aofia ai le faiga o le papatisoga mo e ua maliliu. Sa ou te'i i le iloa e mafai ona tatou papatiso mo o tatou tuua ua maliliu.

O le tausaga talu ona uma ona ma papatiso, sa valaaulia ai i maua e le peresitene o le misiona e sauni

e o atu i le malumalu. O se vaega o le ma sauniuniga, sa amata ai ona ma faia le sailiga o talafaasolopito o aiga. I se tasi aso a o ou mafau-fau i le faiga o lenei galuega, sa tatagi le telefoni. O le tina o lo'u toalua. Sa ou fai atu i ai pe mafai ona ia auina mai se lisi o tuua ua maliliu o le aiga o lo'u toalua. Sa ofo o ia ma fai mai ia te a'u o le papatisoina mo e ua oti e le o se aoaoga faavae a Keriso ae o se mea na faatupu fua e tagata Mamona. Sa ou le mautinoa pe faapefea ona ou tali atu ia te ia aua sa ou le masani i

mau faaletusipaia sa lagolagoina ai le aoaoga faavae.

A o ou mafaufau i le auala e tali atu ai, sa pe le telefoni. Sa ou le mautinoa mo se minute po o le a le mea na tupu, ae sa ou tuuina i lalo le telefoni ae ou alu i lo'u potumoe. Sa ou uuina mai le Feagaiga Fou, tootuli e tatalo, ma ole atu i le Tama Faalelagi e faaali mai ia te a'u le mea e mafai ona ou maua ai le tali.

Ina ua uma la'u tatalo, sa ou susueina le Tusi Paia. Sa ou lagonaina le pei na ta'u mai e se isi ia te a'u e faitau le fuaiupu e 29 o le itulau tonu lea sa ou susue i ai. Sa ou i ai i le mataupu e 15 o le 1 Korinito, lea e talanoa mai ai e uiga i le aoaoga faavae o le papatisoina mo e ua oti.

Sa ootia lo'u loto ma faateia i le tali mai o le Tama Faalelagi i la'u tatalo i lena lava taimi. Sa o se faalogoga matagofie.

Sa ou mafaufau loloto e uiga i lenei aafiaga ae faafuasei ona toe tatagi mai le telefoni. O le tina o lo'u toalua, na fesili mai pe aisea na pe ai le telefoni. Sa ou fai atu i ai ou te le iloa ona ou fai atu lea e sue lana Tusi Paia ma faitau le 1 Korinito 15:29.

O ni nai aso mulimuli ane na taatia ai i luga o la'u laulau se lisi o tagata o aiga ua maliliu. Sa faitau le tina o lo'u toalua i le mau ma ua talitonu nei o le Faaola, e ala mai i le Aposetolo o Paulo, sa aoaoina mai le aoaoga faavae o le papatisoga mo e ua maliliu.

Ua folafola mai e le Atua ni faamanuiaga silisili ia i latou o e faia lenei galuega faaola. Ou te iloa e moni lea mea. ■

Seda Meliksetyan, Aremania



Sa fai mai le tina
O lo'u toalua o le
papatissoga mo e ua
maliliu sa le o se aoaoga
faavae a Keriso ae o se
mea sa faatupu fua e
tagata Mamona.

O FEA E MAFAI ONA OU MAUA AI SE MEKASINI E PEI O LENEI?

A o malaga le matou aiga mai Nevada, ISA, agai atu i Alaska, ISA, sa ma talanoa ai ma se tamaitai umi, lalelei, ma matamasani sa faasaga mai i le isi itu.

Sa fesili mai ia te au pe o fea sa ou alu i ai, ma sa ou fai atu sa matou o atu i Juneau, Alaska, e asi lo ma atalii ma lona aiga. Sa fai mai o ia e sau mai Las Vegas. Ma, o lona lagonaina o le ootia, sa faaopoopo mai ai o loo alu atu o ia i Juneau e asi matua o lona toalua e fai le sauniga faamanatu mo lona toalua, o lē sa faaipoipo i ai mo le 20 tausaga. E le'i leva atu ona maliu o ia i le kanesa.

Sa ou tilotilo atu i le isi itu ma ou mafaufau ifo ia te a'u lava, i lo'u laki i lo'u iloina o le ata o le faaolataga ma le avea ai ma se tagata e galue i le Malu-malu o Las Vegas Nevada. Sa ou mafaufau po o le a se mea e mafai ona ou faia mo lenei tamaitai e siitia ai lona agaga.

Sa faafuasei, i le manino e pei o se logo, ona ou manatuaina se upusii a le Perofeta o Iosefa Samita, sa ou tufaina atu i le Aualofa. Ina ua ia faavaeina le Aualofa, sa ia ta'ua e faapea o uso "o le a felelei atu i le toomaga o se tagata ese; o le a latou liligi atu le suauu ma le uaina i le loto mafatia o le tagata puapugatia; o le a latou soloia loimata o le tamaitiiti matuaoti ma faafiafia le loto o se tina ua oti lana tane" (*Teachings of Presidents of the Church: Joseph Smith* [2007], 452).

Sa ou toe tilotilo atu i le isi itu o le auala. Sa ou vaaia ai se tagata ese



Sa ou mafaufau pe o le a se mea e mafai ona ou faia e siitia ai le agaga o lenei tamaitai, o lē e le'i leva atu ona maliu lona toalua.

ua pagatia, se tina ua oti lana tane ma se loto mafatia. Sa ou manatua se mea sa ou faitauina i le *Ensign* o Iulai 2011 i se taimi na muamua atu o lona aso. Sa i ai ni tusiga faagaetia sa ou manatu o le a mafai ona tuuina atu ai ia te ia ni faamalosiuga ma le faamanafanafaga.

Sa ou aofaiina mai lo'u lototele, susue le mekasini i se tusiga, ma fai atu ia te ia e faitau i ai. Sa ou matuai mataituina o ia ma sa faateia au ona sa ia faitauina ma le totoa— lina uma. Ina ua uma, sa ia toe faitauina se isi tusiga.

E mautinoa lava sa pai atu se mea sa ia faitauina i lona loto. Sa ia opo-mauina le mekasini i lona fatafata ma

soloi ese lomiata mai ona mata.

"O fea e mafai ona ou maua ai se mekasini e pei o lenei?" sa ia fesili mai ai. Sa ou fai atu ia te ia e mafai ona tuu ma ia. Ona ia faitau atili ai lea.

Ina ua matou taunuu i Juneau, sa tago mai o ia uu atu lou lima, ma tilotilo sa'o mai i o'u mata, ma fai mai, "Faafetai lava."

Sa ou aoaoina se lesona maoae mai lona aafiaga. O loo siomia i tatou e tagata ese o i ai ni loto mafatia o e manaomia se upu agalelei faamalosiua ma o e e tataua ona iloa mea le mea ua tatou iloa i le avea ai o ni Au Paia o Aso e Gata Ai. ■

Sharon Rather, Nevada, ISA

*O nisi taimi e tatau ai ona
e tuua se mea lelei mo se
mea e sili atu le lelei.*

FILIFILIA O LE VAEGA E Sili ATU

Saunia e Matthew D. Flitton

Mekasini a le Ekalesia

I se tasi aso, sa faateaia ai e Zoltán Szücs o Szeged, Hanikeri, lona faiaoga vaaalo i le tauina atu ia te ia o le a le alu i Siamani mo se tauvaga.

“Sa faia i le aso tonu lava o lo’u papatisoga, o lea sa ou fai atu ai e leai,” o le tala lea a Zoltán.

I le 17 o ona tausaga, sa manumalo ai Zoltán i le tele o tauvaga i alogavaa. O se taaloga lauiloa i Hanikeri, ma sa lelei ai Zoltán—sa lelei tele ma o le avea ma se tagata polofesa o se mea e mafai moni lava. I tua atu o le filifili e misi mai le na o se tauvaga se tasi, o le a le umi ae tuu atoa e Zoltán le alovaa. Sa i ai se mea e sili atu le lelei na te faia.

Sa manaia lava le alovaa ia Zoltán. I tausaga sa galulue faatasi ai ma lona faiaoga, sa ia aoaoina ai le amio-pulea, usiusitai, ma le galue malosi. Sa aoao ai foi e Zoltán ia aloese mai fualaau faasaina ma vaisu e faaleaga-ina ai ana taumafaiga. Sa le o se olaga faigofie; sa tuuatoatasi, ma o le alu e taalo faapolofesa o le a sili atu se taimi e alu ai. O faataitaiga faapolofesa e tai 12 itula i le aso ma e tatau ona tauva i Aso Sa.

“O le alovaa sa alu ai le tele o lo’u taimi,” o le tala lea a Zoltán. “Sa matuai ou naunau lava i ai. Ona o

lena mea, sa tele ai ni mea sa ou le faia i lo’u olaga.”

O le pogai lena sa filifili ai Zoltán e le mafai ona tuuto atu o ia lava i le talalelei ma le alovaa. I le 2004 sa ia ta’u atu ai i lona faiaoga na te le toe faia lava le taaloga o le alovaa.

O le amataga o le tausaga lena, sa amata ai ona aoao e faifeautalai le tina o Zoltán. Sa le’i auai o ia i lesona. Sa ia taliaina ma le musuā le valaaulia a lona tina i lona papatisoga. Ae sa ootia lona loto i mea sa ia lagonaina i le taimi lava na ia ulufale ai i le falelotu. Sa malie Zoltán e feiloai i faifeautalai, o se vaega ona e mafai ona talanoa atu ia i laua.

“Sa manaia faifeautalai ia te a’u aua o i latou o tagata masasni ae sa ola i se tulaga faatonuina maua-luga atu,” o lana tala lea.

Ona o le tulaga faatonuina maua-luga atu ua ola ai Zoltán i le avea ma se tagata alovaa, o lea sa ia talia fiafia ai aoaoga o le talalelei o ni mea taua. Sa papatisoina o ia i le lua masina mulimuli ane.

O le taimi muamua sa faapea o ia e mafai ona faaauau pea ona alovaa ae e le tauva i Aso Sa. Ae peitai, talu ai o ia o se ituaiga o tagata o lē, o le taimi lava e tautino ai i se gaoioiga po o se

kosi, e manao ia maua-luga lona tau-mafai i ai, o lea sa filifili ai e tuu ese atoa le alovaa.

E faatasi talu ona uma ona papatiso sa taumafai ai e alovaa tau lava o se mea e faapasi ai le taimi. Ina ua ia faia, sa talosaga atu lona faiaoga e fesoa-soani i isi ma faatulaga malaga aua o le a le toe tauva o ia. Peitai sa le’i manao o ia e fai ni tautinoga i le alovaa—po o se isi lava gaoioiga—lea e ono faalavelave i le avea o ia ma se soo.

O lea sa tautau ai e Zoltán lana foe ae tuuto atu o ia lava e auauna i le Ekalesia i se filifiliga taua e pei o le filifiliga sa faia e Peresitene Howard W. Hunter (1907–95) ina ua faaipoipo o ia. O Peresitene Hunter o se tagata musika lauiloa o lē sa iloa ta ni mea-faifaili se tele. I afiafi sa tātā ai o ia i se au faili toatele, ae peitai o ituaiga o olaga o i latou sa latou fegalegaleai faatasi sa feteenai ma tulaga faatonuina o le talalelei. O lea sa faataatiaese ai e Peresitene Hunter ana meafaifaili ma na o taimi lava e pepese ai lona aiga na te aumaia ai i fafo.¹

E misia lava e Zoltán le alovaa, ae ua ia iloa lona fiafia i le alovaa sa malosi tele e faatautavā ai, ma atonu e manumalo ai, i lona alofa mo le Alii pe afai e latalata tele atu o ia i le taaloga.



*Sa tuua e Zoltán Szűcs,
o Szeged, Hanikeri,
le alovaa ina ia lava
ai lona taimi mo le
talalelei.*



O lena lava foi mataupu faavae e mafai ona faatatau i soo se gaoioiga lea e aveesea mai ai i tatou mai ituaiga tagata e finagalo le Atua ia avea ai i tatou. Mo i tatou taitoatasi atonu e sili atu ona uia le olaga e aunoa ma nisi o mea faapitoa—e tusa lava pe o ni mea lelei—nai lo le lamatia o lo tatou ola e faavavau ina ia maua ai na mea.

“Sa avea le Ekalesia ma o’u olaga,” o le tala lea a Zoltán. “O le iloina o le alovaa e le mafai ona avea ma se mea e ola ai pe afai ou te manao ia malosi [i le Ekalesia] ma o le a na o se mea faapasi taimi, o lea sa faigofie ai ona ou tuua. Nai lo lena, sa ou manao ia avea le Tama Faalelagi ma o’u taulaiga.”

Sa amata ona suesue Zoltán i le talalelei ma lena lava malosi lea sa ia aumaia i soo se taumafaiga. Sa ia faatuina se sini e fai se misiona. Sa manao e nofo pea i lona atunuu e aoao atu i isi.

Sa auauna atu o ia i Hanikeri ma o loo faigaluega nei o se faiaoga o le gagana Faaperetania i se aoga maua-luga. O loo faaauau pea ona ia faatuina mea e ave i ai lana faamuamua i le talalelei. “E i ai mea e tatau ona tatou tuua ona e faalavelave i le ala a le Atua,” o lana tala lea. “E faigofie ona faataatia ese mea leaga i le taimi lava tatou te iloa ai e tatau ona tatou tuua. E masani ona tatou le iloa le taimi e tatau ona tatou tuua ai se mea lelei mo se mea e sili atu le lelei. Tatou te manatu faapea e le o se mea leaga, e mafai ona tatou taofimau i ai ma mulimuli pea i le fuafuaga a le Atua.” Ae ua iloa e Zoltán e ao ona tatou tuua le mea lelei pe afai e taofia ai i tatou mai le mulimuli atu i le fuafuaga a le Atua mo i tatou. ■

FAAMATALAGA

1. Tagai i le Eleanor Knowles, *Howard W. Hunter* (1994), 81.

“E faapefea ona ou faamalamalama atu i la’u uo o le soli o le tulafono o le legavia o se mea le lelei?”

E finagalo le Tama Faalelagi ina ia tatou fiafia ma agavaa mo Lona Agaga, o lea ua Ia tuuina mai ai tulafono e fesoasoani e faatumau ai o tatou mafau-fauga, upu, ma amioga i totonu o tuaoi e tatau ai. O le tulafono o le ola mama e fesoasoani e taofia ai mana o le foafoaga i totonu o tuaoi o le faaipoipoga. O se tasi o mafuaaga ua Ia poloai mai ai ia tau lava o le va o le tane ma le ava e faaaga ai le mana o le foafoaga aua e “alagataata ona fananau mai fanau i totonu o noataga o le faaipoipoga.”¹

E mafai ona e faasoaina atu se kopi o le *Mo Le Malosi o le Autalavou* i lau uo. O loo tuuina mai ai ni isi o mafuaaga e lelei ai le tausia o le tulafono o le ola mama: “A e mama mai i feusuaiga, ua e saunia oe lava e osia ma tausia feagaiga paia i le malumalu. E te saunia oe lava e fausia se faaipoipoga malosia ma aumai fanau i le lalolagi o se vaega o se aiga e faavavau ma alolofa. E te puipuia oe lava mai faata-maiaaga faaleagaga ma faalelagona lea e oo mai i le faia o uiga feusuai i fafo atu o le faaipoipoga. E te puipuia ai foi oe lava mai faama’i leaga. O le tumau o le mama mai feusuaiga e fesoasoani ia te oe ia e talitonu ia te oe lava ma fiafia moni ma faaleleia ai ou gafatia i le faia o filifiliga lelei i le taimi nei ma i le faavavau.”²

O Le Malumalu



Ua i ai i lo tatou Tama Faalelagi se faamoemoega e paia mo i tatou uma, ma o lena faamoemoega e mafai ona faataunuuna i le malumalu. E tatau ona tatou agavaa e ulu atu i le malumalu ina ia mafai ona faamauina ai e faavavau o tatou aiga.

O le a tatou toe nonofo faatasi ma lo tatou Tama Faalelagi, ma o le mea e sili ona taua o le a tatou maua se fiafia e le gata, lea e le mafai ona maua e i latou e le agavaa.

Alofa M., 18 tausaga, Samoa

Faaipoipoga ma le Aiga



Ua uunaia i tatou ia mama mai feusuaiga ina ia mafai ona tatou agavaa e ulu atu i le malumalu ma tausia feagaiga paia. Afai tatou te mulimuli i le tulafono o le

ola mama, e mafai ona tatou fausia se faaipoipoga ma se aiga malosia i le lumanai. E i ai lava iina i taimi uma Satani e faaosooso i tatou, ae e ala atu i le tatalo, tusitusiga paia, ma uo lelei, e mafai ai ona tatou faatoilalo o ia.

Resty M., 16 tausaga, Filipaina

Taunuuga Le Lelei

E tele taunuuga le lelei o le solia o le tulafono o le ola mama, ae e te le aoina na mea uma i le vasega o le soi-fua maloloina. O le solia o le tulafono o le ola mama e mafai ona tulieseai le Agaga mai lou olaga, faatiga ai ia i latou e te latalata i ai, ma e te maua ai ni lagona leaga e uiga ia te oe lava. Ou te fautuaina e matamata i se vitio o Savali Faamamona e ta’u o le “Ola Mama: O A ia Tua’o?” [i le youth.lds.org i le Faapere-tania, Faapotukale, ma le Faasipaniolo].

Matthew T., 17 tausaga, Iuta, ISA

Mama ma le Faaaloalo

O le mulimuli i le tulafono o le ola mama, tatou te tumau ai i le mama i le silafaga a le Atua, tatou te faaaloalo ai ia i tatou lava, ma tatou fesoasoani ai i isi ia faaaloalogia foi i tatou. Afai tatou te usitai i le tulafono o le ola mama, tatou te faaaloalo atu o i tatou o fanau a le Atua ma tatou te taofimau ai i o tatou tulaga faatonuina. O le a tatou aloese ai mai le faanoanoa. Pe a tatou usitai i lo tatou Tama Faalelagi, ae maise lava e faatatau i lenei tulafono, o le a fiafia atu o tatou olaga iinei i le lalolagi ma i le olaga a sau.

Ahyana G., 19 tausaga, Filipaina

O tali ua faamoemoe e mo se fesoasoani ma ni manatu, ae e le o se faalauiiloaga aloaia o aoga faavae o le Ekalesia.

O Se Meaalofa Paia

Afai e manatu mama i le meaalofa o le foafoaga, o le a taulimaina e pei o se mea masani lenei meaalofa taua mai le Atua. O le tuuina atu o se meaalofa e le lagonaina ai se tauia pe afai o le tagata sa e tuuina i ai e le manatu e taua. E tatau i se tagata ona tausia ma le paia le mana o le foafoaga; auā o i tatou uma o malumalu o le Atua ma e tatau ona tumau lo tatou mama ma le le pona e pei o se malumalu.

Jaron Z., 15 tausaga, Idaho, ISA

O Le Agaga faatasi ma i Tatou



A tumau lou mama mai agasala, o le a sili atu ona e fiafia ma o le a faamanuaina oe. O o tatou tino e pei o malumalu, ma o le Tama Faalelagi

“e le afio o ia i ni malumalu ua le paia” (Alema 7:21). O lea la, a tumau lo tatou mama mai agasala, e mafai e le Agaga ona mafuta ma i tatou.

Maryann P., 14 tausaga, Arkansas, ISA

Fesili Taua

Tali i fesili a lau uo e ala i le fesili atu o nisi o fesili: “Ae faapefea pe afai o loo mataituina oe i le taimi nei e lou toalua i le lumanai?” O tagata uma ua ou faalogo i ai o e ua solia le tulafono o le ola mama ua latou salamo ai. “Ae faapefea pe afai e fesili atu lau tama i le lumanai pe sa e solia le tulafono o le ola mama?” E tatau ona iloa e au uo le taua o le tulafono o le ola mama i le taimi nei, a o le’i fesiliga e se atalii po o se afafine lena fesili. E tatau ona e tausia oe lava ia mama ma lē pona ia e oo atu ai i se olaga fiafia, ma maloloina e aunoa ma ni mea e tausailaina ai i le solia o le tulafono paia.

Robyn K., 13 tausaga, Iuta, ISA

Amio Mama ma le Ola Mama



E fiafia le Alii i le amio mama ma le ola mama, ma e tatau ona tutupu mea uma i lona taimi e tatau ai. O le tulafono o le ola mama o se polo-

aiga mai le Alii. O le tatalo ma le mafutaga a le Agaga o le tuufaatasiga atoatoa lea e iloa ai o le nofomama o se faamanuiaga.

Selene R., 18 tausaga, Nikarakuā

I Totonu o le Faaipoipoga

Ou te faamalamalama atu i la’u uo o le solia o le tulafono o le ola mama o se mea leaga ona o le mana o le foafoaga ua faia mo na o ulugalii ua faaipoipoina faaletulafono. A tatou solia le tulafono o le ola mama, e aluese le Agaga Paia mai i o tatou olaga.

Augustina A., 15 tausaga, Ghana

FAAMATALAGA

1. “O Le Aiga: O Se Folafolaga i le Lalolagi,” *Liahona*, Nov. 2010, 129.
2. *Mo Le Malosi o le Autalavou* (tamaitusi, 2011), 35.



O LE SOLIA O LE TULAFONO O LE OLAMAMA E AFUA AI MANU-AGA OGAOGA

“I totonu o le feagaiga tumau o le faaipo-

ipoga, ua faatagaina ai e le Alii le tane ma le ava e faaoga mana paia o le mana o le foafoaga i o latou matagofie uma ma le manaia i totonu o tuaoi ua la faatulagaina. . . .

“Ae peitai, o na amioga faatutupu lagona ua faasāina e le Atua i fafo atu o le tautinoga tumau o le faaipoipoga ona latou te faavaivaia ai Ona faamoemoega. I totonu o le feagaiga paia o le faaipoipoga, o mafutaga faapena ua tusa ai ma Lana fuafuaga. A faia i se isi lava auala, ua faasagatau i Lona finagalo. E afua ai ni tiga ogaoga faalelagona ma le faaleagaga. E ui lava o i latou e auai latou te le iloina o loo tupu i le taimi nei, o le a latou iloa mulimuli ane. O le le mama i feusuaiga e faia ai se pa pupuni i le uunaiga a le Agaga Paia.”

Elder Richard G. Scott o le Korama a Aposeolo e Toasefululua, “O Le Faia o Filifiliga Sa’o,” *Liahona*, Ian. 1995, 44.

FESILI O LE A SOSOO MAI

“O le a se mea e tatau ona ou faia pe a aliae mai se mataupu i le aoga e le tusa ai ma aoaoga a le ekalesia, e pei o le faapau pepe?”

Auina mai lau tali a o le’i oo i le aso 15 o Me i le liahona@ldschurch.org pe meli mai i le:

Liahona, Questions & Answers 5/13
50 E. North Temple St., Rm.2420
Salt Lake City, UT 84150-0024, USA

E ono faapupuina tali mo le uumi po o le manino.

O le faamatalaga ma le faatagaga o loo i lalo e tatau ona aofia mai i lau i-meli po o le tusi: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e itiiti ifo i le 18 ou tausaga, o le faatagaga tusitusia a ou matua (e talia foi le i-meli) e lolomiina ai lau tali ma lou ata.



Saunia e Peresitene
Thomas S. Monson

AUALA E AUAUNA AI I VALAAUGA O LE PERISITUA

Pe ua e manatunatu loloto ea i le taua o le agaga o se tagata? Pe na e mafau fau ea e uiga i le **gafatia** lea o loo taoto i totonu o i tatou taitoatasi?

Sa i ai se taimi sa ou auai ai i se konafesi faalesiteki lea sa susue ai e lē sa avea ma o’u peresitene o le siteki o Paul C. Child le Mataupu Faa-vae ma Feagaiga e 18 ma amata ona faitau: “Ia manatua **ua tele lava le taua o agaga** i le silafaga a le Atua” (fuaiupu e 10).

Ona fesili lea o Peresitene Child, “O le a le taua o le agaga o se tagata?” Sa ia le valaau atu i se epikopo, peresitene o le siteki, po o se fautua maua luga mo se tali. Ae, sa ia filifilia le peresitene o se korama a le au toeaia.

Sa gugu le tamaloa na faateia mo se taimi na pei o se taimi umi lava ona faapea atu lea, “O le taua o le agaga o se tagata o lona **gafatia lea ona avea faapei o le Atua.**”

Sa manatunatu loloto uma tagata sa auai i lenei tali. Sa faaaau e Peresitene

Child lana savali, ae sa faaaau pea ona tomanatu i lenei tali musuia.

Ina ia aapa atu, ia aoao atu, ia pai atu i agaga faapelepele ua saunia e lo tatou Tama mo Lana savali, o se galuega tele lea. O le faamanuiaina e seāseā ona faigofie. O le mea masani lava e muamua atu i **loimata, tofotofoga, talitonuina, ma le molimau.**

E maua e auauna a le Atua le mafanafana mai le faamautinoaga a le Matai: “Ou te ia te outou i aso uma lava” (Mataio 28:20). O lenei feagaiga matagofie e lagolago ai outou usoga o le Perisitua Arona o e ua valaauina i tulaga faaleautaitai i korama a tia-kono, aoao, ma ositaulaga. E uunaia ai outou i a outou sauniuniga e auauna atu i le galuega faamisi-ona. E faamafanafanaina outou i na taimi o le lotovaivai, lea e oo mai i tagata uma.

“O le mea lea, **aua le faavai-vai i le faia o mea lelei,**” ua fetalai mai ai le Alii, “ona o loo oulua faataatiaina le faavae o se galuega tele. Ma o mea iti e tutupu mai ai mea tetele.

Faauta, e manaomia e le Alii le loto ma le mafau fau malie” (MF&F 64:33–34). **O se faa-tuatua mausali, o se talitonu faifaiepea, ma se naunau faamaoni** o uiga ia ua iloa ai i taimi uma i latou o e auauna atu i le Alii ma o latou loto atoa.

Afai e i ai se uso o faalogo mai i lo’u leo e

lagona e le o saunia, pe le gafatia foi ona tali atu i se valaau e auauna atu, e ositaulaga, e faamanuia olaga o isi, manatua le upumoni: “**O ai lava e valaauina e le Atua, e faaagavaaina e le Atua.**” ■

Mai se saunoaga i le konafesi aoao ia Aperila 1987.

NA FAAPEFEA ONA E FAAOGAINA LENEI MEA?

“O le iloina o loo i ai le Alii i la’u itu e fesoasoani lea ia te a’u e manatua ai le pogai ou te alu ai i le misiona: ia auauna atu i le Alii ma aumai isi i le Faaola, o Iesu Keriso. Ua ou iloa Na te le tuuina au i se mea e le mafai ona ou taulimaina a o o’u i ai i la’u misiona.”

Dilan M., luta, ISA



FILIFILI MA LE ALII

I na ua 15 o'u tausaga, sa ou fia alu ai i se teineititi o la'u vasega i le aoga ma ou manao ai e tafao faamasani ma ia. Sa lalelei o ia, ae sa ou mafaufau pe e tatau ona ou fai i ai ma te eva faamasani a o le'i atoa lo'u 16 tausaga. Sa ou manatuaina le Alema 37:37, e faapea, "Filifili faatasi ma le Alii i au mea uma e fai, ma o le a ia taitai oe mo le lelei." O le mea la lena sa ou faia. Sa ou tatalo ma faatalitali mo ni nai aso mo le tali a le Alii ae ou te le'i faia se faaiuga.

I se tasi aso i le lotu, sa aami mai ai a'u e lo'u epikopo i totonu o se potu ma valaaulia au ou te lauga i le Aso Sa e sosoo ai. Mate mai la po o le a le autu? Aua le tafao faamasani seiiloga ua le itiiti ifo ma le 16 tausaga le matua. Sa ou lagonaina o le tali lenei a le Alii ia te a'u, ma o le leai. E faapefea ona ou aoao atu se mea ou te le'i faataitaia?

Ona sa ou filifili faatasi ma le Alii, sa mafai ai ona ou iloa le finagalo o le Alii mo lo'u olaga ma faapea ai foi ona ou solaese mai le faaososoga. Ou te iloa afai tatou te filifili faatasi ma le Alii, o le a Ia ta'u mai ia i tatou Lona finagalo ma o le a faamanuaina tele i tatou.

Eduardo Oliveira, Ceará, Pasila

O LE MAU E SILI ONA OU FIAFIA I AI MATAUPU FAAVAE MA FEAGAIGA 24:8.

O lenei mau, ou te maua ai lagona lelei pe a ou ui atu i se tofotofoga ona o loo fai mai, "Ou te faatasi ma oe, e oo lava i le iuga o ou aso." O le uiga o lenei mea ia te a'u, afai ou te sailia o la, o le a faatasi mai e le aunoa le Tama Faalelagi ia te a'u seia oo i le iuga o lo'u ola.

Alex Ortiz, Nuevo Casas Grandes, Mekisiko



O LE MANA O LE TOGIOLA

I na ua aoaoina au e faifeautalai, o autu faapitoa lava o a latou lesonea i taimi uma lava o Iesu Keriso ma Lana Togiola. Sa latou faamalalama mai o le Togiola o se meaalofo mai ia Iesu Keriso mo i tatou taitoatasi. O se meaalofo e mafai ona tatou faaaogaina i o tatou olaga i aso taitasi pe a tatou feagai ma tofotofoga po o le pe a tatou agasala foi. O le mana o le Togiola e siitia, faamalololo, ma fesoasoani ia i tatou e toe foi atu ai i le ala sa'o

ma le vaapiapi lea e tau atu i le ola e faavavau.

A o faasoa mai e faifeautalai lenei mea, sa ou maua se lagona malosi sa molimau mai ia te a'u e moni, o lea sa ou filifili ai loa e auai i le Ekalesia.

Mulimuli ane sa ou filifili ai e faia se misiona ona sa ou manao e fesoasoani atu i isi ia iloa lenei meaalofo matagofie. E ala i le aoao atu ma le faasoa atu e uiga i le Togiola, ua ou vaaia ai le suia o isi i se auala fou o le olaga. Na oo mai se suiga atoa, e le na ona ala mai i le faalogo e uiga i le Togiola ae e ala i le faaaogaina foi i lo'u olaga.


Ua ou iloa e moni le Togiola. A tatou valaauina lana uunaiga i o tatou olaga, po o a lava tulaga tatou te feagai, e mafai ona taulimaina mea uma ma o le a tatou lagonaina le olioli.

Ioriti Taburuea, Kiripati





Tusi Paia



O Le Tusi A Mamona

MAFUAAGA TATOU
TE MANAOMIA AI LE

TUSI A MAMONA

A tonu e fesili atu ni isi o tagata pe aisea tatou te manaomia ai le Tusi a Mamona ae o lea ua i ai le Tusi Paia. O le mea moni, ua molimau mai Iesu Keriso o le a tupu lenei mea (tagai i le 2 Nifae 29:3). E tele mafuaaga e taua ai le Tusi a Mamona i o tatou aso (mo se faataitaiga, tagai i le 2 Nifae 29:7–11). O ni nai mafuaaga nei o le pogai e taua ai.

O Se Tasi Molimau ia Iesu Keriso

Ua faaali mai e tusitusiga paia ia i tatou se mamano o le faaagaina o molimau e tele e faamautu ai upu-moni i le Ekalesia a Keriso. O le Tusi a Mamona ua faapoopo ai se molimau lona lua i le Tusi Paia o se molimau ia Keriso Sa saunoa Elder Mark E. Petersen (1900–84) o le Korama a Aposetolo e Toasefululua e faapea,



O MOLIMAU E TOALUA

O le Tusi Paia o se molimau e tasi ia Iesu Keriso; o le Tusi a Mamona o le isi lea. Aisea e matuai taua ai lenei molimau lona lua? Atonu o le a fesoasoani le faataitaiga vaaia lenei: E fia ni laina sasao e mafai ona e tusia e ui atu i se togi se tasi i luga o se fasipepa? O le tali e le mafaitaulia. A faapea la mo se taimi, o lena togi e tasi ua faatusa i le Tusi Paia, ma o le faitau selau o na laina sasao e tusia e ui atu i lena togi e faatusa i faauigaga eseese o le Tusi Paia, ae o na faauigaga taitasi e faatusa i ekalesia eseese.


Ae peitai, o le a se mea e tupu, pe afai e i ai se togi lona lua i luga o lena fasipepa, e faatusa i le Tusi a Mamona? E fia ni laina sasao e mafai ona e tusia i le va o nei vaega e lua: le Tusi Paia ma le Tusi a Mamona? E na o le tasi lava. E na o le tasi le faauigaga o aoaoga faavae a Keriso e mafai ona i ai ona o le molimau a nei molimau e lua.

“Ma ua faafia ona fai le Tusi a Mamona ma se molimau faamaonia, faamanino, ma autasi o aoaoga faavae na aoaoina i le Tusi Paia.”

Elder Tad R. Callister o le Au Peresitene o Fitugafulu, “O Le Tusi a Mamona—o se Tusi mai le Atua,” *Liahona*, Nov. 2011, 75.



AUAI I LE TALANOAGA



I le masina atoa o Aperila o le a outou suesue ai i le Liliuese ma le Toefuataiga i au vasega o korama o le perisitua ma Tamaitai Talavou ma le Aoga Sa (pe afai ua i ai i lau uarota po o le paranesi ia lesone fou i lau gagana). O le oo mai o le Tusi a Mamona o se vaega taua lea o le Toefuataiga. A uma ona faitau le tusiga lenei, mafaufau pe ua faapefea ona ese lou olaga ona ua ia te oe le Tusi a Mamona. E mafai ona e tusia i lalo ou lagona i lau api talaaga ma mafaufau e faasoa atu i isi e ala i le molimau atu i le aiga, i le lotu, po o luga o faasalalauga faaagafesootai.

“O le pogai autu lava ua tatou maua ai le Tusi a Mamona ona e ala mai i fofoga o molimau e toalua pe toatolu e faavaeina ai mea uma. (Tagai i le 2 Kori. 13:1.) Ua ia i tatou le Tusi Paia; ua ia i tatou foi le Tusi a Mamona.

Ua i ai ni leo se lua—voluma e lua o tusitusiga paia—mai ni nuu anamua e matuai eseese, ua taufai molimau mai i le paia o le Alii o Iesu Keriso.”¹ Na faaopoopo mai Peresitene Ezra Taft Benson (1899–1994), “E le tatau ona galo ia i tatou o le Alii lava Ia na tuuina mai le Tusi a Mamona o Lana molimau autu.”²

O Le Atoatoaga o le Talalelei

Ua tatou iloa o “mea manino ma pele . . . na aveesea mai” le Tusi Paia i le aluga o taimi (1 Nifae 13:40). O le Tusi a Mamona o loo faamanino mai ai aoaoga faavae a Keriso ma toe aumai ai le atoatoaga o le talalelei i le lalolagi (tagai i le 1 Nifae 13:38–41). Mo se faataitaiga, o le Tusi a Mamona e fesoasoani ia i tatou e iloa ai o le papatisoga e ao ona faataunuaina i le faatofu (tagai i le 3 Nifae 11:26) ma o tamaiti laiti e le manaomia ona papatisoina (tagai i le Moronae 8:4–26).

Tutotonu i le Ekalesia Toefuataiina

Sa molimau mai Iosefa Samita e faapea, o le Tusi a Mamona “o le maa’au’au o la tatou tapuaiga.”³ Talu ai ua tatou iloa lenei mea, e le foliga mai ai o se mea faafuasei le faavaeina O Le Ekalesia a Iesu Keriso o le Au Paia i Aso e Gata Ai i le aso 6 o Aperila, 1830, i le na o le 11 o aso talu ona

uluai maua le Tusi a Mamona mo le faatauina i tagata lautele i le aso 26 o Mati, 1830. Sa le’i faavaeina le Ekalesia seiiloga e maua lona maa’au’au o le tusitusiga paia mo ona tagata.

O Se Faamanuiaga i o Tatou Olaga

E faatatau i le Tusi a Mamona, sa aoao mai ai Iosefa Samita e faapea “e sili foi ona latalata atili atu ai o le tagata i le Atua i lona ola ai i ona mataupu, nai lo se isi lava tusi.”⁴ O loo i ai le mana e suia ai olaga—e aofia ai oe ma i latou e te faasoa atu i ai le Tusi a Mamona. Ua molimau mai Peresitene Henry B. Eyring, Fesoasoani Muamua i le Au Peresitene Sili, “O le aafiaga o le Tusi a Mamona i lou tagata, malosi, ma le lototele e avea ai o se molimau mo le Atua e mautinoa lava. O le aoaoga faavae ma faataitaiga totoa o loo i lenei tusi o le a siitia, taitaia, ma uunaia ai oe. . . . O le suesue ma le agaga tatalo i le Tusi a Mamona o le a atiina ae ai le faatuatua i le Atua le Tama, i Lona Alo Pele, ma i Lana talalelei. O le a atiina ae ai lou faatuatua i perofeta a le Atua, i aso anamua ma aso nei. . . . E mafai ona e latalata atili atu ai i le Atua, nai lo se isi lava tusi. E mafai ona suia ai lou olaga mo le lelei sili atu.”⁵ ■

FAAMATALAGA

1. Mark E. Petersen, “Evidence of Things Not Seen,” *Ensign*, Me 1978, 63.
2. *The Teachings of Ezra Taft Benson* (1988), 204.
3. Iosefa Samita, i le faatomuaga o le Tusi a Mamona.
4. Iosefa Samita, i le faatomuaga o le Tusi a Mamona.
5. Henry B. Eyring, “O Se Molimau,” *Liahona*, Nov. 2011, 69–70.



**TUPUTUPUA'E I
ELEELE LAFULEMU:
TALAVOU FAAMAONI I**

Saunia e Cindy Smith

UGANDA



Ina ua latou talia ma ola i le talalelei a Iesu Keriso, ua vaaia e le autalavou i Uganda le tuputupua'e o le faatuatua ma le faamoemoe ia i latou uma.

I le fatu o Aferika i Sasae, ua faamanuiaina ai le atunuu matagofie o

Uganda i mauga faataamilo o tolo ma fa'i—faapea ma tagata talavou ua saunia e talia ma ola i le talalelei a Iesu Keriso.

O le uluai siteki i Uganda sa faavaeina i le 2010. Ua vave le tuputupua'e o le Ekalesia, faatasi ai ma le toatele o alii ma tamaitai talavou i uarota taitasi ma paranesi.

Sisiina A'e o se Tagavai, Avea ma se Faataitaiga

Sa musuia ni tamaitai talavou o se tasi o uarota i aoaoga a Sister Elaine S. Dalton, peresitene aoao o Tamaitai Talavou, e uiga i le mama: “O le taimi lenei mo i tatou taitoatasi e tulai ae ma faailoa atu se tagavai i le lalolagi ma valaau atu mo se toe foi i le mama.”¹ Sa sopo tamaitai talavou i se mau-puepue e vaai ifo ai i le aai ma sisi ae tagavai auro ua faatusa i la latou tautinoga ia avea ma faataitaiga o le mama. Sa latou usuina faatasi le “I Luga o Mauga” (Viiga, nu. 5).

Ua sii a'e e nei tamaitai talavou o latou tulaga faatonuina patino o le amiotonu. O lo latou usiusitai ua faamalositia ai a latou molimau ma uunaia ai isi. Ua saunoa Sister Dalton, “Aua ne'i taufaatauvaaina le mana o au uunaiga amiotonu.”² Ma e pei o se tagavai, o le faataitaiga a nei tamaitai talavou ua talotalo atu i le lalolagi atoa.

E pei o le toatele o tamaitai talavou i Uganda, o Sandra e savali atu i le silia ma le maila i le lotu, fesoasoani e tapena le falelotu i Aso Faraile, ma auai i le seminare i Aso Toonai. I le aluga o le vaiaso, e ala o ia a o le'i taina le 5:00 i le taeao, e faitau ana meaaoga, ona savali lea i le aoga, foi mai i le fale i le te'a o le 6:00 i le afiafi. Sa ia misia se tausaga aoga ona o faigata tautupe, ae sa ia faafetauia ana luitau ma se uiga faaalila lelei: “O le talalelei ua matuai fesoasoani ia te au ou te tumau ai ma le le mafaagaetia.”

E na o Sandra lava le tagata o le Ekalesia o lona aiga, ae e lagolago lava e ona matua o ia i ana auaunaga

Sandra



Luga: *O le autalavou o loo auai faatasi i se faeasaite a le siteki.*

Luga ae: *O Susana (ogatotonu), o se tagata sulufai i Uganda, ua mauaina le toafilemu i le talalelei ma ua aumaia nei nai ona tei ma isi tamaiti i le lotu.*

Ogatotonu: *O tamaitai talavou o lenei uarota e fialia e galulue i le Alualu i Luma o le Tagata Lava Ia.*

Taumatau: *Sa faataatiaese e Tenisi se avanoa i se au soka faapolofesa ina ia talai atu le talalelei. O ia ma isi alii talavou o le korama a ositaulaga ua ositaulagaina ma faatoilaloina luitau ina ia auauna atu i ni misiona.*

i le Ekalesia, e pei o le fesoasoani pe a tapena e le uarota ia lotoa o se fale i le lotoifale mo tamaiti matuaoti. Ua vaaia e lona aiga le ala ua fesoasoani ai le talalelei ia te ia ia malosi, e tusa lava pe feagai ma ni faafitauli e le mafai ona foiaina. O le manatunatu i ai i le puna o lona malosiaga, fai mai Sandra, “A ou alu i le lotu, ou te lagona e pei lava o loo ou ofuina le ofutau o le Atua” (tagai i le Efeso 6:11–17).

O Susana e le'i leva ona liliu mai, ae e alofa i le Ekalesia. O lo latou aiga

e malaga mai i Sudan i Saute, ma sa sosola ese mai lona aiga ona o tulaga faigata ma sa faamanuiaina i le mauaina o faifeautalai i Uganda. I le avea ai ma se tagata sulufai, sa ia maua ai le toafilemu ma le puipua i totonu o le talalelei. O Aso Sa e sau ai ma aumai nai ona tei i le lotu, e oo lava i le toa 10 o isi tamaiti e le o ni tagata o le Ekalesia. Ina ua mavae le maliu faafuasei o se tagata o lona aiga, sa toe foi atu ai i Sudan i Saute, lea o loo faatalitali ai mo le faatuina o le Ekalesia i lana eria. Sa feagai uma Susana ma Sandra ma ni luitau, ae sa la faalagolago i le Atua ma fialia i fua o le ola ai i le talalelei a Iesu Keriso (tagai i le Alema 32:6–8, 43).

Ositaulaga e Auauna Atu i se Misiona

O alii talavou i Uganda e amata ona taaalo soka a o laiti lava, e faa-aoga ai ni fasilaau ua saisi mau e fai ma polo. A o laitiiti lava o ia, sa maua ai e Tenisi se meaalofo mo le taaloga, ma sa tuuina atu ai e lana aoga maualuga ia te





ia se sikolasipi e taalo ai mo le latou au. Ina ua uma lana aoga mauualuga, sa ofo atu e se au faapolofesa ia te ia se totogi, potu, ma le tupe e totogi ai lona potu. Sa o se miti ua taunuu, ae sa iloa e Tenisi o lenei mea e ono faalavelave ai i ana fuafuaga e alu i se



misiona i se taimi mulimuli ane o le tausaga.

Sa matuai malosi le manao o Tenisi e fai le mea sa finagalo lona Tama Faalelagi na te faia, o lea sa le manao ai ia tofotofoina o ia e nofo i le au pe a oo mai le taimi e alu ai o ia e au-auna atu i se misiona. Sa toatele tagata sa fesiligia lenei filifiliga, ae ua mautinoa lelei e Tenisi ua ia faia le filifiliga sa'o—mo ia ma isi. "O o'u uso laiti e toalua ma lo'u tuafafine laitiiti na faatoa papatiso lava," o lana tala lea. "Ou te le'i manatu lava o le a faalogo lo'u tuafafine i le talalelei. A ou vaai i le faia e le Atua o vavega i lo'u aiga, e aumai ai ia te a'u se faamoemoe susulu mo lo'u lumanai."

I le uarota a Tenisi e suesue ai e alii talavou le *Talai La'u Talalelei* i vaiaso taitasi. Ua avea i latou e faapei o se au, e galulue vavalalata ma faifeautalai faamisiona ma aumai uo i sauniga o le

Aso Sa ma isi gaoioiga, e aofia ai taaloga pasiketipolo ma soka i le vaiaso. Ua papatisoina e ositaulaga ni uo ma isi sa latou fesoasoani e aoao faatasi ma faifeautalai. I le aluga o ni tausaga, o lenei au o alii talavou ua faamalosia le uarota atoa, ma o le toafa o i latou e aofia ai Tenisi, ua maua ni valaauga i le Misiona a Kenya Nairobi.

Ua latou mulimuli i le fautuaga a Elder David A. Bednar o le Korama a Aposetolo e Toasefululua ina ia "avea ma faifeautalai a o le'i taitai tuuina i totonu au pepa o le misiona."³ Sa latou faia lea e ala i le galulue faatasi o se korama, o se au e sili atu nai lo se isi lava [au].

Sa faatoilaloina e faifeautalai uma e toafa ni luitau ina ia mafai ona latou auauna atu. Sa faamatala mai e Wilberforce, "Sa toetoe lava a leiloa atu lo'u faamoemoe mo le faia o se misiona [ona o le taul], peitai sa ou faitau i le Mataio 6:19–20: 'Aua tou te toloai oa mo outou i le lalolagi . . . a ia outou toloai oa mo outou i le lagi.' O lea faatasi ai ma le maelega ma le tautino atu, sa mafai ai ona ou ausia la'u sini o le auauna atu o se faifeautalai faamisiona. E leai se mea e sili atu le lelei nai lo le saili muamua o le malo o le lagi."

Faamoemoe mo le Lumanai

O loo fesoasoani le autalavou i Uganada e atiina ae le malo o le Atua iinei, faatasi ai ma le faamoemoe sili mo le lumanai. E ui ina leai se malumalu i Aferika i Sasae, ae o loo tulimatai pea le autalavou i le taimi o le a latou faaipoipo ai i se malumalu mamao. O se tasi o gaoioiga faalesiteki sa taulai atu i le saunia e ulu i le

malumalu, ma i le faaiuga, sa tuuina atu ai e se tasi o le au peresitene o le siteki lana molimau. "E alofa le Atua ia te outou. O outou o le lumanai o le Ekalesia i Uganda." O nei talavou amiotonu ua i ai sa latou uunaiga maoae.


Ua ositaulagaina e alii ma tamaitai talavou o Uganda ia mea o le lalolagi mo faamanuiaga o le a tumau e faavavau. Ua latou totoina le fatu o le faatuatua ma o loo latou tausia ma le faaeteete (tagai i le Alema 32:33–37). E pei o se laau ua tumu i fua (tagai i le Alema 32:42), ua faasoa atu ai e le autalavou le olioli o le talalelei i lenei laueleele lafulemu. ■

Sa nofo Cindy Smith i Uganda a o faigaluega ai iina lona toalua, ae o lea ua nonofo nei i Iuta, ISA.

FAAMATALAGA

1. Elaine S. Dalton, "O Se Toe Foi i le Amiolele [Mama]," *Liahona*, Nov. 2008, 80.
2. Elaine S. Dalton, *Liahona*, Nov. 2008, 80.
3. David A. Bednar, "Avea ma se Faifeautalai," *Liahona*, Nov. 2005, 45.





O Le a le Mea e Ta'u o le UO MONI?

Saunia e Elaine S. Dalton

O Le Peresitene Aoao o Tamaitai Talavou

O le faauigaga o se uo ua suia i aso nei i se lalolagi ua fesootai i auala faatekinolosi. O aso nei atonu tatou te manatu faapea ua toatele a tatou “uo.” E sa’o: tatou te fiafia i le mafai ona logoina ma tumau pea le iloa o mea o loo tutupu i olaga o le toatele o a tatou paaga faapea ma a tatou uo o loo i ai ma sa i ai e faapena foi i tagata tatou te le’i feiloai i ai o e ua tatou ta’ua o a tatou uo.

I le anotusi o faasalalauga faaagafesootai, o le upu “uo” e masani ona faaoga e faamatala ai *tagata e fesootai* nai lo *sootaga*. Ua ia te oe le tomai e auina atu ai i au “uo” se savali, ae

e le tutusa lea ma le i ai o se sootaga faafesaga’i na o oulua.

O nisi taimi o lo tatou popolega o le *i ai* o ni uo. Atonu e tatau ona tatou taulai atu i le *avea* ma se uo.

E tele faauigaga o le mea e ta’u o le avea ma se uo. O le a le galo ia te au le faalogo atu ia Elder Robert D. Hales o le Korama a Aposetolo e Toasefululua o saunoa e uiga i le mea e ta’u o le avea ma se uo ma le faatosinaga malosi a uo i o tatou olaga. O lana faauigaga ua i ai se aafiaga tumau i lo’u olaga. Na saunoa o ia, “O uo o tagata ia latou te faafaigofieina le ola

ai i le talalelei a Iesu Keriso.”¹ I lenei agaga, o le sailia o le mea e aupito sili ona lelei ai le isi tagata o le aano lea o faauooga moni. O le faamuamua o le isi tagata. O le amiosa’o, faamaoni, ma le nofomama a’ia’i i amioga uma. Atonu o le upu *tautinoga* e matala ai le uiga moni o le faauooga.

Ina ua 15 tausaga o la’u tama o Emi, sa ia faia ai se filifiliga e uiga i le ituaiga o uo o le a ia sailia. O se tasi taeao sa ou matauina ai lana kopi o le Tusi a Mamona sa susue i le Alema 48. Sa ia faailogaina ia fuaiupu na faamatalaina ai le Taitaiu o Moronae: O Moronae o se tagata malosi ma tautaua tele; o ia o se tagata ua atoa-toa le malamalama. . . . Ioe, ma o ia o se tagata sa mausali i le faatuatua ia Keriso” (fuaiupu 11, 13). I autafa sa ia tusia ai, “Ou te fia tafao faamasani ma faaipoipo i se tama e pei o Moronae.” A o ou mataituina Emi ma ituaiga alii talavou sa latou fegalealeai faatasi ma mulimuli ane tafao faamasani ai ina ua atoa lona 16, sa mafai ona ou iloa sa ia faataitaia foi na lava uiga ma fesoasoani i isi ia ola e tusa ai ma o latou faasinomaga o ni atalii o le Atua, o e umia le perisitua, ma o ni tamā ma ni taitai i le lumanai.

O uo moni latou te faatosinaina i latou o e latou te fegalealeai ina ia “tutu maualuga teisi a’e [ma] ia lelei



teisi atu.”² E mafai ona outou fesoasoani i le tasi ma le isi, ae maise lava alii talavou, ia outou saunia mo, ma auauna atu i ni misiona faamamaluina. E mafai ona outou fesoasoani i le tasi ma le isi ia tumau le ola mama. O a outou faatosinaga amiotonu ma faauooga e mafai ona i ai se taunuuga e faavavau e le gata i olaga o i latou o e tou te faifaimea faatasi ae faapea foi i augatupulaga a sau.

Sa ta’ua e le Faaola ia Ona soo o Ana uo. Na Ia fetalai:

“O la’u poloaiga lenei, ia outou fealofani, e pei ona ou alofa atu ia te outou.

“E le sili lava le alofa o se tasi i lenei alofa, ia tuuina atu e se tasi lona ola e sui ai ana uo.

“O a’u uo outou, pe afai tou te faia mea uma lava ou te fai atu ai ia te outou.

“Ou te le toe ta’ua outou o auauna; aua e le iloa e le auauna mea e faia e lona alii: a ua ou ta’ua outou o uo; aua ua ou faailoa atu ia te outou mea uma na ou faalogo ai i lo’u Tama” (Ioane 15:12–15; ua faapoopo le faamamafa).

A o e ola ma faasoa atu le talalelei a Iesu Keriso, o le a e tosina atu tagata ia te oe o e o le a mananao e avea ma au uo—ae le na o se [tagata] e fesootai i luga o site o faasalalauga faaagafesootai ae o le ituaiga o uo na faataitaia e le Faaola e ala i Ana fetalaiga ma Ana faataitaiga. A o e taumafai ia avea ma se uo i isi ma ia faasusulu atu lou malamalama, o au uunaiga o le a faamanuia ai olaga o le toatele o le a

outou fegalegaleai. Ou te iloa a o e taulai atu i le avea ma se uo i isi, e pei ona faamalamalamaina mai e perofeta ma faataitaiga i tusitusiga paia, o le a e fiafia ma o le a avea oe ma se uunaiga mo le lelei i le lalolagi ma o le a i ai se aso e te maua ai le folafolaga matagofie ua ta’ua i tusitusiga paia e uiga i faauooga moni: “O lea lava matufaga ua i ai ia te i tatou iinei o le a i ai ia te outou iina, ae o le a na o na faatasia ma le mamalu e faavavau” (MF&F 130:2). ■

FAAMATALAGA

1. Robert D. Hales, “This Is the Way; and There Is None Other Way,” i le *Brigham Young University 1981–82 Speeches* (1982), 67.
2. Gordon B. Hinckley, “O Le Tulimataiga mo le Mea Silisili,” *Liahona*, Sete. 1999, 8.

MANATU TAUA E UIGA I FAAUOOGA

“Filifili uo o e tutusa o outou tulaga faatauaina ina ia mafai ona faamalositia e le tasi le isi e ola ai i tulaga faatonuina maualuluga.

“Ina ia maua ni uo lelei, ia avea ma se uo lelei. . . .

“A o e saili e avea ma se uo lelei i isi, aua nei fetuunaia ou tulaga faatonuina.”

Mo Le Malosi o le Autalavou (tamaitusi, 2011), 16.

O La'u **VALAAULIA** i le **FAAOLATAGA**

Saunia e Emerson José da Silva

Ao o'u talavou, sa ou asiasi ai i le tele o tapuaiga ma sa ou le mautonu ona sa eseese uma lava faauigaga o mau sa aoao mai e ia tapuaiga taitasi. Ou te le'i maua ni lagona lelei e uiga i le le faaaloalo sa ou iloa i nisi o i latou, o lea na uma ai loa lo'u taumafai e sue se lotu ou te auai.

O ni nai tausaga mulimuli ane sa papatiso ai sa'u uo o Cleiton Lima, i Le Ekalesia a Iesu Keriso o le Au Paia o Aso e Gata Ai. Na te le'i tauina mai ia te a'u lenei mea e ui o i maua o se uo lelei lava, ae a o faasolo pea aso, sa amata ona ou vaaia ni suiga ia te ia. I Aso Sa, sa masani ona ou alu i lona fale i le taeao ina ia mafai ona ma taalo soka, ae sa le mafai ona ou maua o ia i le fale. Sa tupu lenei mea i Aso Sa sosoo e lua pe tolu. Mulimuli ane sa ta'u mai ai e Cleiton ia te au e le mafai ona toe taalo soka i Aso Sa ona



sa ia faamamaluina le aso o le Alii. Sa ou fai atu ia te ia, “O le ekalesia lenei ua e faavalevlea ai.”

Ona valaaulia mai lea e Cleiton a’u ou te alu atu i le lotu. Sa ou fai atu i ai se ‘alofaga faapea sa ou le fiala lava i mea tau tapuaiga. Mo le 10 masina, sa aumai ai e Cleiton ia faifeautalai e aoao a’u, ae sa ou faia lava ni ‘alofaga pe fai atu i ai sa ou pisi tele. Ae sa le fiu ai o ia.

I se tasi aso ia Iuni, sa ia valaaulia ai a’u e auai atu i se siva a le Ekalesia. Sa ou ula ia te ia, “E tele ni meaai mauafua ma e toatele ni teineiti e i ai?” Sa ata ma fai mai ioe!

Ou te tautino atu sa ou toilalo i lo’u manava. Sa ou asiasi i le lotu ma sa ou fiala i ai. Sa faafeiloai au e tagata uma, sa ou ‘aitele, ma sa amata ai ona ou fiala e auai i sauniga. Ina ua ou tau-nuu atu i le lotu i le Aso Sa, sa toatele ni tagata sa ou feiloai i ai ma faalogo i a latou molimau. Sa ou le masani i le Tusi a Mamona, ae sa ou

lagonaina le Agaga o le Alii ina ua molimau mai ni tagata eseese o le Ekalesia, “Ou te iloa e moni le Tusi a Mamona, ma o le Ekalesia lenei a Iesu Keriso, ma o Iosefa Samita o se perofeta sa valaauina e le Atua.” Ou te le’i mauaina muamua ni lagona e sili ona lelei. Ae sa ou le manao lava e feiloai atu i faifeautalai, peitai sa pai mai lena sauniga molimau ia te a’u.

O le vaiaso na sosoo ai, sa toe valaaulia ai au e Cleiton i le lotu. Sa le mafai ona sa i ai isi a’u fuafuaga. Sa ou vaaia le faanoanoa o ona foliga ina ua ou fai atu i ai ou te le’i iloa pe mafai ona ou alu.

Ae peitai, i le taeao o le Aso Sa sa ou ala ae ai ma se naunau e alu i le lotu. Sa ou nofo i luga i le 6:50, o se mea sa faigata ia te a’u, ma ou sauni loa ma faatalitali mo le oo mai o Cleiton. Sa te’i o ia ina ua ia vaai mai ua uma ona ou sauni ma faatalitali atu. O le Aso Sa lena sa aoao mai ai le epikopo e uiga i le perisitua. Sa malosi lo’u lagonaina o le Agaga ma sa ou maua le uunaiga e faapea e tataua ona ou faalogologo i lesonea a faifeautalai. E oo ane i le faaiuga o le sauniga a Alii Talavou, ua ou iloina o le a ou papatiso.

Ina ua tuua le lotu, sa ou fai atu ia Cleiton, “Ua ou fia papatiso!”

Sa faapea o ia o sa’u talaula. Ae sa ia faapea mai, “A ou valaau i alii faifeautalai, e te feiloai atu ia i laua?” Sa ou tali atu ioe.

Sa aoaoina au e ni alii faifeautalai maoae. Ina ua ou faalogo i le savali o le Toefuataiga, sa ou maua foi se faamautinoaga sili atu e tataua ona ou papatiso. Ae sa ou fia iloa mo a’u lava le moni o le Tusi a Mamona. Sa faailoga e alii faifeautalai le Moronae 10:3–5 i totonu o la’u Tusi a Mamona ma fai mai ia te au ou te tatalo ma fesili atu i le Atua pe moni lea.

O le afiafi na sosoo ai, sa ou manatua ou te le’i faitauina lava le Tusi a Mamona. A o amata ona ou faitau, sa ou lagonaina se agaga sili ona malosi. Sa ou tatalo, ma a o le’i uma [la’u tatalo], sa ou iloina e moni le Tusi a Mamona. Ou te faafetai i le Atua mo le taliina mai o la’u tatalo. Sa ou papatiso ia Iulai 2006.

Sa mulimuli ane ou auauna atu o se faifeautalai i le Misiona a Pasila Cuiabá, ae o la’u uo o Cleiton sa auauna atu i le Misiona a Pasila Santa Maria. Sa ma faia le mea sa faia e Cleiton mo a’u: valaaulia tagata ia o mai ia Keriso ma fesoasoani ia latou maua le talalelei toefuataiina e ala i le faaaogaina o le faatuatua ia Iesu Keriso, salamo, ia papatisoina, ma maua le meaalofo o le Agaga Paia. O le auala moni lenei i le faaolataga.

Ia tatou valaauliaina i taimi uma a tatou uo ma aiga ia iloa lenei talalelei, aua sa valaaulia e le Faaola ia tagata uma ina ua Ia fetalai, “O mai ia te a’u” (Mataio 11:28). Ua ou iloa o le Ekalesia lenei a Iesu Keriso, ma o le taimi lenei e valaaulia ai tagata uma ia o mai ia te Ia. ■



O AUALA E SEFULU E ILOA AI UA E LIUA

Saunia e Tyler Orton

Sa ou aoaoina i sauniga perisitua e faapea, o se tasi o faamoemoega o le Perisitua Arona o le fesoasoani lea ia i tatou ia “liua i le talalelei a Iesu Keriso ma ola i ona aoaoga.”¹ Sa ou le mautinoa po o le a le uiga o le “ia liua i le talalelei a Iesu Keriso.” Sa ou fesili atu i o’u matua ma nai ou tei matutua po o a ni o latou manatu i lona uiga, ma sa matou talanoaina faatasi i ni auala e mafai ona e iloa ai ua e liua.

Atonu e i ai foi ni isi auala, ae e 10 ni auala sa matou mauaina. Talu ai o le liua o se faagasologa i le olaga atoa, o lea e le faapea ai ia tatou atoatoa i nei vaega taitasi i le taimi nei, ae e mafai ona fesoasoani tatou te iloa ai pe o tatou alualu i luma.

1. A e liua, e le gata ina e *iloa* le mea e tatau ona e faia, ae e te *manao* foi e fai mea sa’o. E le lava le na ona taumafai e aloese mai le faia o mea sese ona e te fefe i le maua o oe pe faasalaina. A e liua moni, e te manao moni lava e filifili le mea sa’o.

2. O le isi faailoga o le liua o le, ua le toe i ai sou manao e fai mea sese. O Aneti-Nifae-Liae o se faataitaiga sili lea o lenei vaega. Ina ua latou liliu mai i le talalelei a Keriso, sa latou “ulu atu foi i latou lava i se feagaiga ma le Atua e auauna atu ia te ia ma tausi i ana poloaiga” (Mosaea 21:31). E pei o sa Nifae sa aoaoina e le Tupu o Peniamina, sa “le toe i ai so [latou] manao e fai mea leaga” (Mosaea 5:2). Sa latou liliu moni i le

talalelei a Keriso, ma o faaososoga a Satani sa leai so latou mana ia i latou.

3. A e liua, e sili atu lou popole i le mea e finagalo ai le Atua nai lo manatu o isi tagata e uiga ia te oe. I la'u aoga i Initonesia, e matele lava tamaiti aoga ina inu ava malosi. O nisi taimi e taufaaososo lava le o e pati pe afai o loo fai uma e isi tagata ma taufaifai mai ia te oe ona o lou le alu. E tele taimi sa valaaulia ai lo'u uso e inupia ma pati, ae na te le'i faia lava—sa tu atu o ia mo le mea sa ia talitonu i ai. Sa faigata, ma sa ia faaaluina le tele o po e nofo toatasi ai i le fale. Ina ua faamavae ma faatofa tamaiti aoga

i lona faauuga, sa faasoa mai e nisi o tagata ia te ia lo latou maofa i lona mafai ona tetee atu i faatosinaga a le tupulaga ma tumau faamaoni i ona tulaga faatonuina. Sa latou ta'u atu ia te ia le maua luga o la latou vaai ia te ia ona o lona mea. Sa ia faaalia sa liua o ia e ala i le tetee atu i faatosinaga a le tupulaga.

4. A liua, e te taumafai e le aunoa i le mea sili e te mafaia e ola i le talalelei—e le na o Aso Sa po o le pe a talafeagai foi ae o taimi uma lava. E le suia au amioga ona o le tagata o loo oulua i ai faatasi po o le tagata foi o loo ono mata'ia oe. A faa-matala e lau tupulaga se tala tausua

le migao pe manao e matamata se atatifaga leaga, e te le alu atu ai ma oe ona e leai se tasi o vaavaai atu; nai lo lona e te tu atu mo le mea ua e talitonu i ai.

5. A e liua, e sili atu lou agalelei ma le agaalofa i le taulimaina o isi. E te le faamasino atu pe faitio pe faitatala. Ua sili atu lou magafagafa i lagona o isi, ma e ave a se mea masani le vaavaai mo ni auala e auauna ma fesoasoani atu ai. Afai e te savali atu i le faletele o la outou aoga ae toulou ni tusi a se tagata, e te le tau mafaufau po o le a se mea e te faia. E otometi lava ona e tu e fesoasoani atu.




5.



O SE AUALA MAUTINO A I LE FIAFIA

E finagalo le Alii i tagata o Lana Ekalesia ia liua moni i Lana talalelei. Ua na o le pau leni o le auala mautinoa e maua ai le saogalemu faaleagaga i le taimi nei ma le fiafia e faavavau."

Elder Donald L. Hallstrom o le Au Peresitene o Fitugafulu, "Liua i Lana Talalelei e ala i Lana Ekalesia," *Liahona*, Me 2012, 15.



6.



2.

Ina ia faaalia o le a latou faamaoni i a latou feagaiga e ola i le talalelei, sa tanumia ai e sa Lamana na liua a latou auupega (tagai i le Alema 24).



6. A e liua, e faateleina lou nau-nau e tatalo ma e te lagona le pei o loo e matuai fesootei atu i le Atua pe a e tatalo. O le a e faaava-noaina e le aunoa le taimi e tatalo ai e tusa lava pe o a ou lagona po o le a foi se mea o loo tupu i lou olaga. Na ta'u mai e Peresitene Ezra Taft Benson (1899–1994) ia i tatou, “Afai tatou te le fia tatalo, ona tatau lea ona tatou tatalo seia oo ina tatou lagona le fia tatalo.”²

7. A e liua, e te tulimatai atu i le Aso Sa aua o le Sapati. A oo mai le Aso Sa, nai lo le mafaufau, “Oi sole, o le aso e le mafai ai ona matou tafafao ma a'u uo pe o i le tifaga,” e te mafaufau, “Manaia tele, o se aso e mafai ai ona ou alu i le lotu ma taulai

atu i mea faaleagaga ma faaalu le taimi faatasi ma lo'u aiga!”

8. A liua, e te tausia poloaiga ma e te le suea ni 'alofaga, fetuunai amioga, pe taumafai e sue ni itu e faaletonu ai. E te le taumafai e sopo tuaoi; e te tausia lava poloaiga ona e te iloa o le auala sili lea.

9. A e liua, e te tulimatai atu i le totogiina o lau sefuluai. E te vaai i ai o se faamanuiaga ma lagona ai o le 10 pasene e le o se mea telē, ae maise pe a faatusa atu i faamanuiaga ma le lotomalie e te maua. O nei faamanuiaga e sili atu lava nai lo le tupe e te totogiina.

10. Afai ua e liua, e i ai sou nau-nautai malosi e fesoasoani atu i isi ia iloa le upumoni ma le fiafia

ua e maua. O se faataitaiga lelei lava mai tusitusiga paia o le miti a Liae, lea sa i ai sona naunautai malosi ia faasoa atu i lona aiga le fua suamalie o le laau o le ola. Ina ua 'ai o ia i le fua [o le laau], o lona manatu muamua lava sa le o le ave o nisi fua mo ia lava ae ia vaai lona aiga ina ia mafai ona latou tofo i le fua ma maua ai lea lava fiafia e tasi (tagai i le 1 Nifae 8:12).

O le aotelega, e te iloa ua e liua pe a amata ona e ola i le tulafono maua-luga atu, o le talalelei a Iesu Keriso. E te ola i le agaga o le tulafono faapea foi ma mataitusi o le tulafono. E te ola i le talalelei i vaega uma o lou olaga. E te ola i le talalelei i lona atoatoa, e le faapea ona e tatau lava ona e ola ai ae ona e te manao ai. O oe o se tagata ua sili atu lou fiafia ma lou lelei, ma e te manao e ave ma tagata e finagalo le Tama Faalelagi e ave ai oe. E te manao e faapei o Iesu Keriso ma mulimuli i Ana faataitaiga. A e ave e faapei o lona tagata, ua e liua moni lava. ■

O Tyler Orton e nofo i Java, Initonesia.

FAAMATALAGA

1. *Tusitaulima 2: Taitaiina o le Ekalesia* (2010), 8.1.3.
2. Ezra Taft Benson, “Tatalo e Le Aunoa,” *Liahona*, Iuni 1990, 4.

O LE GALUE MALOSI E **TAUIA LELEI**

O le a e maofa i mea e mafai ona
e ausia pe a e taumafai pea.

(Tagai Mo le Malosi o le Autalavou [tamaitusi, 2011], 40–41.)



Faifeautalai

Laititi a Tinamatua Tene

Saunia e Emilia Maria Guimarães Correa

“Pe a tautala atu se tagata e ala i le mana o le Agaga Paia, e molioo e le mana o le Agaga Paia i loto o le fanauga a tagata” (2 Nifae 33:1).

Sa nonofo Vito ma lona tina ma lona tuafafine i le fale o lona Tinamatua o Tene. Sa oo ina ma'i le tinamatua o Vito ma lē mafai ai ona aluese ma lona moega mo le tele o vaiaso. Sa tuua toatasi na o ia i lona potu.

Sa tonu loa ia Vito e mafai ona fai o ia ma uo a Tinamatua Tene. O aso uma lava pe a sau o ia i le fale mai le aoga, na te aveina ai se kopi o le *Liahona* i totonu o le potu o Tinamatua ma faitau atu i ai tala mai le itulau a tamaiti.

Ina ua uma ona ia faitauina atu uma ia kopi o le *Liahona* sa i ai a lona aiga, sa amata ona ia faitau atu ia te ia le Tusi a Mamona ma le Tusi Paia. O Tinamatua Tene sa le o se tagata o le Ekalesia, ae sa fiafia o ia e faalogologo pe a faitau atu Vito ia te ia. Sa fiafia o ia e aoao e uiga i le talalelei.

Sa tele ni fesili sa fesiligia e Tinamatua. Afai sa le'i iloa e Vito ia tali, e fesili atu i lona faiaoga o

le Peraimeri, pe sue foi i tusitusiga paia. Sa ta'u e Tinamatua ia Vito o lana faifeautalai laitiiti.

Sa ta'u atu e Tinamatua Tene ia Vito e tele ni mea sa ia aoaoina mai ia te ia. Sa ia folafola atu o le a la o i le lotu pe a malosi o ia. O le mea sa ia aoaoina sa mafua ai lona manao ia malosi ma suesue atili e uiga i le talalelei.

Ina ua toe manuia Tinamatua, sa tausisi o ia i lana folafolaga. Sa la o atu ma Vito i le lotu e aoao atili ai e uiga i mea sa ia aoao atu ia te ia. Sa le'i umi ae papatiso ma faamauina Tinamatua. Sa fesoasoani Vito ia ona iloa e moni le talalelei.

Ina ua matua Vito, sa avea o ia ma se faifeautalai faamisiona i le Misiona a Boston Massachusetts. A o le'i alu o ia [i le misiona], sa la o atu i le malumalu—ma Tinamatua Tene. ■

O Emilia Maria Guimarães Correa e nofo i le Itumalo Feterale, Pasila.





Saunia e
Elder M. Russell Ballard

O Le Korama a
Aposetolo e Toasefululua

*O sui o le Korama a Aposetolo
e Toasefululua o ni molimau
faapitoa a Iesu Keriso.*

Aisea Ua Soona Umī Ai le Igoa o le Ekalesia?

OIesu Keriso lava Ia sa faa-igoaina le Ekalesia (tagai i le Mataupu Faavae ma Feagaiga 115:4).

O upu *Ekalesia a Iesu Keriso* ua tautino atu ai o Lana Ekalesia lea.

O Aso e Gata Ai ua faamalamala-

maina ai o le Ekalesia lava lea e pei o le Ekalesia sa faavaeina e Iesu Keriso a o soifua o Ia i le lalolagi ae ua toefuataiina i nei aso e gata ai.

Au Paia o lona uiga tatou te muli-muli ia te Ia ma taumafai e fai Lona finagalo.

Ua valaauina o tatou tagata o *Mamona* ona tatou te talitonu i le Tusi a Mamona, ae e tatau ona tatou faaaogaina le igoa atoa o le Ekalesia i soo se taimi e mafai ai. ■

Mai le "O Le Taua o se Igoa," Liahona, Nov. 2011, 79–82.




Saunia e Darcie Jensen

I na ua maea le Malumalu o Sate Leki i le 1893, sa fiafia le Au Paia o Aso e Gata Ai. E 40 tausaga sa latou fauina ai le malumalu. Talu ai ona sa foai e tamaiti ni tupe e fesoasoani ai i le fausiaina o le malumalu, sa faataunuu ai e Peresitene Uilifoti Uutilafi ni sauniga faapitoa se lima o le faapaiaiga mo tamaiti ina ia auai.

O aso nei ua anoanoai malumalu i le lalolagi, ma o loo fesoasoani pea tamaiti e faamanatu le faamaeaina o malumalu. Vaai pe na faapefea ona auai tamaiti i na aso ma aso nei. ■

O Darcie Jensen e nofo i Kalefonia, ISA.

*E sili atu ma le 12,000 tamaiti sa o mai i le **Malumalu o Sate Leki** mo le faapaiaiga. O tamaiti nei mai le Uarota a Sugar House sa o mai i se nofoaafi.*



*O le pepa ulufale lenei na faatagaina ai tamaiti e oo atu i le 16 tausaga ona auai i sauniga faapitoa o le faapaiaiga mo le **Malumalu o Sate Leki**. Sa saunoa atu apose-tolo ma sui o le Au Peresitene Sili i tamaiti i totonu o le malumalu.*



*O nisi taimi e toe faapa-iaina ai malumalu pe a uma ona toefaafouina. Na pepese tamaiti Perai-meri ma tauave ni sulu i le faafiafiaga na faama-natuina ai le toefaapa-iaga o le **Malumalu o Anchorage Alaska**.*



*O vaiaso taitasi a o fausia le **Malumalu o Gilbert Arisona**, ua faatu ai e tamaiti Peraimeri mai le Siteki o Gilbert Arisona Highland se sini e auauna atu i se tagata o loo i ai i a latou uarota.*

Faamanatuina o Malumalu!

*A o fausia le **Malumalu o San Diego Kalefonia**, sa fai ai e tamaiti Peraimeri mai Mekisiko se fala felanula-nuai mo le malumalu. Sa tutu le Au Pulega Aoao i luga o le fala i le taimi o le sauniga o le maatulimanu i le faapaiaiga.*





O tamaiti Peraimeri i Manitoba, Kanata, e tietie atu mo le tolu itula i le **Malumalu o Regina Saskatchewan** e papai atu i puipui ma tautino e o atu i totonu i se aso.

Sa faafeiloai e tamaiti Peraimeri i le fale tatala o le **Malumalu o Kyiv** lukureini ia tagata asiasi i le lagiina o le pese “Ou Te Fia Vaai i le Malumalu.”



E silia ma le 800 tamaiti Peraimeri mai Aferika i Sisifo sa lagiina le pese “O A’u o se Atalii o le Atua” i le faafiafiaga faaleaganuu a o le’i faapaiaina le **Malumalu o Accra Ghana**.



Sa pepese tamaiti Peraimeri mo Peresitene Gordon B. Hinckley ina ua taunuu atu o ia i le faapaiaaga o le **Malumalu o Abuja Nigeria**.



O malumalu taitasi ua i ai se maatulimanu ua faaalai ai le tausaga sa faapaiaina ai. I le faapaiaaga, e faamauiina ai e Pulega Aoao le maatulimanu i le sima. O Isaac B., 9 tausaga, sa fesoasoani e tuu le sima i luga o le maatulimanu o le **Malumalu o Kansas City Misuri**.

Fesili ma Tali o le Malumalu

Aisea ua fai ai a tatou malumalu?

O malumalu o Le Ekalesia a Iesu Keriso o le Au Paia o Aso e Gata Ai, o ni nofoaga paia ia tatou te aoao ai upumoni e faavavau ma auai i sauniga paia.

E faape'i totonu o le malumalu?

O le malumalu o se nofoaga e toafilemu, faaaloalo ma matagofie. O mea uma o loo i totonu o le malumalu e mama ma faatulagaina lelei. E oofu tagata uma i ofu papae ma e tautatala i ni leo filemu.

O a mea e tutupu i totonu o malumalu?

E mafai ona faamau ai se avā i lana tane, ma e mafai ona faamau ai tamaiti i o latou matua. O le faamauga e mafai ai e aiga ona faatasi

i le faavavau. I totonu o le malumalu, e maua ai foi e alii ma tamaitai se meaalofo o faamanuiaga faaleagaga e ta'ua o le faaeega paia. E mafai foi ona latou maua le faaeega paia ma faamauina mo i latou o e ua maliliu e aunoa ma le osia o feagaiga i le malumalu.

O a isi mea e tutupu i totonu o malumalu?

E ese mai le faamauga ma le faaeega paia, e fai foi isi sauniga i totonu o le malumalu. E mafai ona papatisoina ma faamauina tagata mo i latou o e sa le mafai ona auai i le Ekalesia a o ola. A atoa lou 12 tausaga ma agavaa e ulu atu i le malumalu, e mafai ona e maua le avanoa e papatiso ma faamau ai mo i latou o e ua maliliu e aunoa ma le talalelei.

Ae faapefea pe afai e le'i o lo'u aiga i le malumalu?

E silafia ma e alofa le Tama Faalelagi ia te oe ma lou aiga. E finagalo o Ia ia maua e tagata uma faamanuiaga o sauniga o le malumalu. Ola agavaa e ulu atu i le malumalu. Faatu nei loa se sini e i ai se aso o le a e maua ai le faaeega paia ma faaipoipo i le malumalu. O le a faamanuia oe ma lou aiga e lou Tama Faalelagi. ■



"A'u uo talavou e . . . , ia i ai pea lava pea a outou vaiga i le malumalu. Aua lava nei faia se mea o le a taofia ai oe mai le ulufale atu i ona faitotoa ma 'ai ai i faamanuiaga paia ma le faavavau iina."

Peresitene Thomas S. Monson, "O Le Malumalu Paia—O se Sulu Taiala i le Lalolagi," *Liahona*, Me 2011, 92.

E Mafai na Faavavau Aiga

(Ua Faafaigofie)

Upu na saunia e Ruth Muir Gardner
Fati na saunia e Vanja Y. Watkins

Fiafia ♩ = 80-96

1. E i ai so'u a - iga i la - lo nei. A - lo - lo - fa ia te a'u.
2. I lo - 'u la - i - ti - ti nei, Ou te sau - nia ai le - lei,

Ou te fia mau pea ma i la - tou e fa - a - va - vau.
E u - lu i le ma - lu - ma - lu e faa - mau faa - va - vau.

Tali

E ma - fai na faa - va - va - u a - i - ga I le a - la a le Ta-ma. Ou

te fia mau ma lo - 'u la - va a - i - ga. Ua faa - a - li mai e le A - lii Le

a - la ou te au - sia ai.

Upu ma le fati © 1980 IRI. Fetuunaiga © 2012 IRI. Ua taofia aia tataua uma.
E mafai ona kopiina lenei pese mo gaoioiga laiti e le saili tupe i le lotu po o le aiga.

Na Toefuatai mai e Iesu Keriso Lana Ekalesia i Aso e Gata Ai



E mafai ona e faaogaina le lesa ma le gaoioiga leni e aoao atili ai e uiga i le autu o le Peraimeri i le masina leni.

Vaai faalemafaufau o loo alu se suega oa. O fea e te sue ai le oa? E faapefea ona e mauaina? Mata e i ai se pusa oa? O a ni mea e i ai i totonu?

O nisi pusa oa e i ai ni asoa manaia ma ni tupe siliva taua. Ae peitai, i le avea ai ma ni tagata o Le Ekalesia a Iesu Keriso o le Au Paia o Aso e Gata Ai, ua ia i tatou se oa e sili atu lona taua: o le talalelei a Iesu Keriso.

E toatele tagata latou te le iloa e uiga i leni oa, o lea la o se tasi o o tatou tiute o le faasoaina atu i ni tagata se toatele i se mafai tatou te mafaia ai.

Ina ua maliliu Iesu ma Ana Aposetolo, sa leiloloa pe na suia ai foi nisi o aoaga ma sauniga taua o le talalelei, e aofia ai le papatisoga, pule o le

perisitua, malumalu, perofeta soifua, ma le faamanatuga.

O nei oa uma o le talalelei sa toefuataiina mai e ala i le Perofeta o Iosefa Samita. Sa faaali mai le Tama Faalelagi ma Iesu Keriso ia Iosefa Samita i le Vao Paia ina ua tatalo atu o ia e fia iloa le mea moni.

Mulimuli ane, sa maua ai e Iosefa ia papatusi auro ma faaliliuina ai i le Tusi a Mamona. O le Tusi a Mamona o loo i ai aoaga tatou te teufatuina aua o loo faamalamalama mai ai upumoni sa leiloloa. Ua tatou maua le tele o faamanuiaga ona ua tatou maua nei upumoni o le talalelei.

Oka se taua o nei oa! ■

MAU MA LE PESE

- Mataupu Faavae ma Feagaiga 35:17
- "I Se Taeao Manaia," *Tusipese a Tamaiti*, 57 (po o se isi pese e uiga i le Toefuataiga o le talalelei)

TATOU TALANOA

Faasoa mai pe o faapefea ona faamanuiaina lou aiga i oa o le talalelei a Iesu Keriso.

FAI SE PUSA OA O LE TALALELEI

Tipi ese ma gagau le pusa oa lenei e pei o le ata o loo i le pito i lalo. Otioti ese siliva o loo lisi ai nisi o oa ua tuuina atu e le talalelei ia te oe ma tuu i totonu o le pusa. Vaai i oa o loo i totonu o le pusa e faamanatu atu ai ia te oe ia faamanuiaga o le talalelei.



O Le Nofoaga sa Faavaeina Ai le Ekalesia



Saunia e Jan Pinborough

Mekasini a le Ekalesia

*O mai tatou o e suesue se
nofoaga taua i le talafaaso-
lopito o le Ekalesia!*

A fai e mananao ia Maggie ma Lily E. e sue po o fea sa muamua faavaeina ai le Ekalesia, la te tau le o mamao. E tuaoi tonu lava ma le falesa i Fayette, Niu Ioka, lea la te lolotu i ai i Aso Sa uma!

Sa le'i faavaeina le Ekalesia i totonu o se falelotu, ae o totonu o se fale na fai i ogalaau. Sa sau le

Perofeta o Iosefa Samita e nofo iina i le aiga o Uitimera i le 1829. Ua le o toe i ai le fale sa i ai muamua, ae o le fale ogalaau lenei ua tu ai i le vaega lava lea e tasi.

O le falelotu e lolotu i ai Maggie ma Lily, o loo i ai se nofoaga autu mo tagata asiasi o loo faaali ai mea e uiga i le fale o Uitimera ma mea faapitoa sa tutupu ai iina. ■



1. O iinei sa faamaeaina ai e Iosefa Samita le faaliliuina o le Tusi a Mamona.





2. O fafo, e le mamao lava mai le fale, sa vaai ai ni alii se toatolu i le agelu o Moronae ma papatusi auro. Ua ta'ua i latou o Molimau e Toatolu ona sa latou molimauina, pe vaai, i papatusi. E mafai ona e maua la latou molimau i le pito i luma o le Tusi a Mamona.


PAPATISOGA I ASO LA MA ASO NEI

O Maggie, e 11, ma Lily, e 9, sa papatisoina i se faatanoa e latalata i le nofoaga sa papatisoina ai uluai tagata o le Ekalesia.

Sa matuai fiafia uma nei tamaitai e papatiso. Ina ua oo i le taimi e papatiso ai Lily, sa faia sona faatalanoaga e le epikopo. "Sa ia fesili mai pe na i ai sa'u molimau i le perofeta ma pe sa totogai la'u sefuluai," o le tala lea a Lily,

E tofu teineiti ma mea lelei e manatua e uiga i aso sa la papatiso ai. "Ina ua ou alu ae nai le vai, sa ou maua se lagona e faapea e mafai ona ou faia soo se mea," o le tala lea a Maggie.

E tofu teineiti ma api o talaaga ina ia mafai ona tusi ai o la'ua lagona e uiga i o laua aso faapitoa.



3. I le aso 6 o Aperila, 1830, pe tusa ma le 60 tagata sa o mai i se fonotaga faapitoa. Sa faatulagaina aloaia ai e Iosefa Samita le Ekalesia, ma sa faamanuiaina ma tufatufaina ai le faamanatuga. O le sauniga faamanatuga muamua lenei!



4. O le taimi lava na uma ai le fonotaga, na papatisoina ai loa matua o Iosefa Samita ma nisi o tagata i fafo.

Ua Sefe e Max ma Mia le Aso

Saunia e Chris Deaver, Texas, ISA

A watercolor illustration of a young boy and a young girl playing. The boy, on the left, has blonde hair and is wearing a red shirt, blue pants, and a green cape. He is standing and looking down at the girl. The girl, on the right, has brown hair in pigtails and is wearing a pink and white striped shirt. She is sitting on the ground, playing with a small blue doll inside a purple dollhouse. There are other toys on the ground, including a yellow ball and a small brown animal. The background is a simple blue sky and brown ground.

Sa sauni Max e faatino le tamaautu.
Sa faamaulu lona mitiafu lanumumu.
Sa faamaulu lona pulupulu o le
tamaautu. Ona alu atu loa lea i le
potu o lona tuafafine laitiiti.

“Sau loa, Mia,” o le tala lea a Max. “Ta o e sefe le aso!”



Sa o atu Max ma Mia i le potu malolo. Sa la vaaia ai se ato e tumu i lavalava.

“E mafai ona e fesoasoani mai ia te a’u?” o le fesili lea a Tina.

“Ua lelei,” na fai atu ai Max. “Ona ma o ai loa lea e sefe le aso.”



Sa fesoasoani Max ma Mia ia Tina e gaugau uma lavalava ma teu.

Ona vaai atu lea o Max i ni otaota i luga o le fola o le fale. “Ta o e taalao uma le otaota,” o le tala lea a Max. “Ona ta o ai lea e sefe le aso.”



Sa tamomoe solo Max ma Mia i le fale. Sa la tiaia uma otaota sa mafai ona la maua.

Sa la vaai atu ia Tina o salu le fola o le umukuka. “E mafai ona ma fesoasoani atu ia te oe,” o le tala lea Max.

Sa taofi e Mia le apa e asu i ai le pefu ae salu e Max le fola.



“Ia ta o loa e sefe le aso,” na fai mai ai Max.

Sa tilotilo solo tina i le fale mamā. Ona ia fusi mai lea o Max ma Mia. “Ou te manatu ua uma ona oulua faia!” ■



O IESU O LOO SAVALI I LUGA O LE VAI

“Ua iloa mai e le au soo o ia ua savali i luga o le vai, ona latou atuatuvaile ai lea, ua faapea ane, O le aitu; ona latou uio ai lea i le matatau.

“Ona fetalai atu loa lea o Iesu ia te i latou, ua faapea atu, Ia outou loto tetele; o a’u lava; aua tou te matatau” (Mataio 14:26–27).

TALA FOU O LE EKALESIA

Asiasi i le news.lds.org mo se faaopoopoga o tala fou ma mea e tutupu i le Ekalesia.

Aoaoga mo Taitai i le Lalolagi Atoa—o se Faiga Fou



O le susuga ia Elder L. Tom Perry, Elder Donald L. Hallstrom, ma Epikopo Dean M. Davies e taitaia se felafolafoaiga faavaega i le taua o le faaao-gaina o ki o le perisitua.

masina o lumanai, o le a auai ai tagata o le Ekalesia i le lalolagi atoa i se faiga fou musuia i le Aoaoga mo Taitai i le Lalolagi.

E le pei o fonotaga o aoaoga na faia mua-mua, o le Aoaoga mo Taitai i le Lalolagi Atoa i le tausaga lenei o le a le faasalalauina o se faasalalauga atoa e tasi mo taitai o uarota ma siteki. Ae, o le a vaevaeina i ni vaega pupuu se iva—i luga o se DVD ma luga o le LDS.org—lea e uunaia ai talanoaga mai taitai uma, tagata, ma aiga i lenei tausaga atoa o le a sau ma le lumanai.

O le taulaiga o le aoaoga o le “Faamalolosia o le Aiga ma le Ekalesia e ala i le Perisitua.” I le aoaoga, e tuuina atu ai e sui o le Au Peresitene Sili ma le Korama a Aposetolo e Toasefululua, faatasi ai ma isi Pulega Aoao ma taitai aoao, ni aoaoga musuia i:

- Auala e mafai ai e aiga ona maua le malosi ma le filemu e ala i le mana o le perisitua.
- Auala e fesoasoani ai i aiga uma ia tofo i faamanuiaga o le perisitua.
- Auala e faamalolosia ai e i latou ua umia ki o le perisitua ia aiga ma auaiga.
- Auala e auauna atu ai i auala faaKeriso.
- Auala e tausi ai fanau i le malamalama ma le upumoni.

O le a maua e iunite uma o le Ekalesia ni kopi o le DVD, ma ua talosagaina ia aufono a uarota ma siteki ina ia maimoaina atoa. Ona tataua lea ona latou fefautuaai faatasi i auala e fesoasoani ai i tagata o le uarota ma le siteki ia manuia mai le aoaoga.

I fonotaga ma vasega, e mafai e le au paia ona maimoa ma talanoa i vaega taitasi o le DVD. E mafai e aiga ma tagata taitoatasi ona maimoa i vaega, faatasi ai ma punaoa faaopopo e faaleleia atili ai a latou suesuega, i le www.lds.org.

I tulaga uma lava, o le vaega e sili ona manana o le aoaoga o le a tupu pe a uma ona maimoa se vaega ona amata ai lea o le talanoaga. A o mafau-fau loloto, faasoa atu, ma molimau atu taitai, le au paia, ma aiga e uiga i mea na latou faalogo i ai ma lagonaina, o le a musuia ma aoaoina i latou e le Agaga Paia i le auala e faatatau ai le aoaoga i o latou lava tulaga. E ala atu i nei aafiaga, o le a fesoasoani ai lenei Aoaoga mo Taitai i le Lalolagi Atoa e faamalolosia aiga ma le Ekalesia i le lalolagi atoa. ■

O loo tutu i fafo mai o le maota o le Mary Fielding Smith i le This Is the Place Heritage Park ia, Elder M. Russell Ballard, Linda K. Burton, Elder Ronald A. Rasband, Elaine S. Dalton, Rosemary M. Wixom, ma Epikopo Gary E. Stevenson ma felafolafoai ai i faamanuiaga o le i ai o le perisitua i totonu o aiga uma.



TALI ATU I LE VALAAU MO NI FAIFEAUTALAI SE TOATELE:

Faafaileleina o se Mafaufau Faifeautalai i le Aiga ma i le Ekalesia

Saunia e Heather Whittle Wrigley

Talafou o le Ekalesia ma Mea Na Tutupu

Enopo ia Epikopo Nogales o le Uarota a Parque Chacabuco, Siteki a Buenos Aires Argentina Congreso, i luma o se laupapa o faaaliga ua lilo uma i ata o alii ma tamaitai talavou e 37 o lana uarota. A malaga ese se tasi o i latou mo se misiona, na te tuuina se faamatalaga i autafa o le ata.

Fai mai o ia, “E ese le fiafia o la’u autalavou pe a o mai i totonu o lo’u ofisa ma vaai i ata ma faamatalaga.” “E faaosofia ai i latou ia saunia mo a latou lava misiona.”

O le uarota lenei i Buenos Aires ua faaaliga ai le agaga o le galuega faa-faifeautalai. I uluai masina e ono o le 2012, e toa 19 le autalavou—o le 14 o i latou e liliu mai—ua tuua o latou aiga ina ia auauna atu faamisiona i ni atunuu se valu. E sili atu ma le 80 pasene o talavou agavaa ua tautino atu e faamisiona.

I tausaga e le’i mamao atu, sa fofoga mai ai e taitai o le Ekalesia ni talosaga e manaomia nisi tagata talavou se toatele e auauna atu faamisiona.

I le konafesi aoao ia Aperila 2005, ae le’i leva ona faalauiloa mai e le Ekalesia le *Talai La’u Talalelei: O Se Taiala i le Galuega Faafaifeautalai*, sa fautuaina ai e Elder M. Russell Ballard o le Korama a Aposetolo e Toasefululua ia aiga ma taitai ina ia faafailele se agaga faafaifeautalai ma saunia ni alii ma ni tamaitai se toatele

atu e auauna atu ma le mamalu e ala i le fesoasoani ia i latou ia malamalama pe o ai i latou ma e ala i le aoaoina o i latou i aoaoga faavae (tagai i le “Toe Tasi,” *Liahona*, Me 2005, 69).

Sa fofogaina e Peresitene Thomas S. Monson i le taimi o le konafesi aoao ia Oketopa 2012 e faapea, o le a tuutuu i lalo tausaga faatapulaa, ua avea ma se tasi o faa-manatu ua faanatinati e le Alii ia Lana galuega.

O le taimi nei, ua toatele aiga ma taitai o le Ekalesia ua teufatuina nei savali ma faatulagaina se aga masani anoa o auaunaga faafaifeautalai i o latou eria.

Fesoasoani i le Autalavou ia Malamalama Pe o Ai i Latou

I le tali i le fesili, “Na faapefea ona mafai ona e saunia le toatele o la outou autalavou ia naunau e auauna atu?” Sa tali Epikopo Nogales, “Ina ua valaauina au e avea ma se epikopo, o lo’u popolega muamua lava o tagata talavou o la’u uarota, ma sa ou faailoa manino atu i isi taitai o le uarota, e tataua ona avea i matou ma se vaega o o latou olaga.”

Mo se faataitaiga, o faifeautalai uma lava a Chacabuco sa i ai ni tofiga i le uarota ae latou te le’i malaga ese atu. Sa masani ona valaaulia ia tagata fou liliu mai ma tagata e le toaaga [i le lotu] e avea o ni faiaoga, lea sa

fesoasoani ia i latou e saunia ai e aoao atu le talalelei.

Sa faatulagaina foi e Epikopo Nogales mo le autalavou ia saunia faaleagaga mo se misiona e ala i le galulue faatasi ma faifeautalai faamisi-ona i le lotoifale.

A o tuuto atu taitai o le Ekalesia ma le au paia i le lotoifale i latou lava i le autalavou o le uarota, ua tauia i latou i le vaaia o le tuputupu ae tele o le agaga faafaifeautalai.

O Se Aiga e Mafaufau-Faafaifeautalai

E iloa e Garth ma Eloise Andrus o Draper, Iuta, ISA, le uiga o le i ai o se aiga e mafaufau-faafaifeautalai. E i ai ni fanau tama e toa 17 a le la fanau ua uma ona faia ni misiona, ma o i laua foi ua faaono ona auauna atu faamisiona.

O le faafaileleina o se agaga o le galuega faafaifeautalai i totonu o lou aiga o se mea lea e amata mai lava i le taimi e laiti ai le fanau, o le tala lea a Brother Andrus.

Na ioeina foi e Sister Andrus. “E te le tuua le auauna atu i se misiona o se faamoemoega e gugu, ae e te talanoa atu i lau fanau ma fanau a lau fanau e uiga i ai e pei e le o se fesili—*pe a* e alu i lau misiona, ae le o le *afai*,” o lana tala lea.

O le aoaoina o le autalavou pe o ai i latou i le faia o se faataitaiga o le auauna atu faafaifeautalai e taua foi. Sa taliaina e Uso ma Tuafafine Andrus lo la valaauga muamua i le 1980, i le taimi tonu na alu ai lo la atalii laitiiti i lana misiona.

Sa tusi atu se tasi o atalii a le la tama ina ua ia mauaina se meaalofo sa la auina atu ia te ia e sauni ai mo lana



O Epikopo Victor Nogales o loo tu i le laupapa mo faaaliga o loo faaaliga ai talavou uma o lana uarota, e aofia ai i latou o e o loo auauna atu i le taimi nei i ni misiona.

misiona. “Sa faafetai mai o ia ia i maua [mo le meaalofa], ae na fai mai, ‘Ae e sili lava le taua o le faafetai atu ia te oulua mo le faataitaiga ua oulua faia,’” o le tala lea a Sister Andrus.

Aoao atu o le Aoaga Faavae

“Ua i ai i o tatou tagata talavou se aia tatau e faamoemoe ai ia mautinoa e o latou matua ma taitai o le Ekalesia ma faiaoga ua latou iloa ma malamalama i le talalelei a Iesu Keriso,” o le saunoaga lea a Elder Ballard. “O le a faamautu e le Agaga Paia le upumoni i o latou loto ma o le a tutuina le Malamalama o Keriso i o latou agaga. Ma o le a e maua ai se *isi tasi* o faifeautalai ua saunia atoatoa” (M. Russell Ballard, “One More,” 71).

Pe a ma le 6,000 maila (9,600 km) le mamao mai i Buenos Aires, ua vaaia ai foi e le Paranesi maotua a Horseshoe

Bend e lata i Boise, Idaho, ISA, se faateleina maoae i le galuega faaifeautalai a o faia e aiga ma taitai ni taumafaiga malolosi e aoao atu ai le talalelei i o latou talavou.

Mai se paranesi toagaogao e 75 ona tagata, e toaiva tagata talavou o loo auauna atu faamisiona.

Ua faamamafaina mai e Elder Russell M. Nelson o le Korama a Aposetolo e Toasefululua ia mafuaaga ma faamanuiaga o le auauna atu faamisiona. “O faifeautalai uma . . . e auauna atu ma le faamoemoe e tasi ia faaleleia olaga o isi tagata,” o lana saunoaga lea. “O le faaiuga e auauna atu i se misiona o le a faafuaitino ai le taunuuga faaleagaga o le faifeautalai, o lona toalua, ma a la’ua fanau mo tupulaga a sau. O se manao e auauna atu o se fua faalenatura lea o le liua, agavaa, ma le sauniuniga a se tagata”

(“Fesili i Faifeautalai! E Mafai ona Latou Fesoasoani Atu ia te Oe!” *Liahona*, Nov. 2012, 18).

E ioe foi i ai Martin Walker, o le peresitene o le Siteki a Emmett Idaho. “O le auauna atu i se misiona e tuu ai se tagata talavou i se ala o le a aafia ai augatupulaga,” o lana tala lea. “I le avea ai ma se siteki, matou te faia mea uma matou te mafaia e saunia ai tagata talavou mo le galuega faaifeautalai.”

O se vaega o lona tapenaga e aofia ai le aoao atu i le autalavou o aoaga faavae. O loo maua e le autalavou i le Paranesi a Horseshoe Bend le avanoa i vaiaso taitasi i se vasega e sauniuni ai faifeautalai e faia e se alii sa avea muamua ma peresitene o se misiona—o aoaga e faaopoopo atu i aoaga faaifeautalai e tuuina atu faalemasina e le siteki mo le autalavou i fonotaga e sauniuni ai faifeautalai ma lana Tolauapiga faaletausaga a le Perisitua Arona.

O LaRene Adam—o se tasi o le fanau e toaono a Brother ma Sister Andrus—sa galulue faatasi ma lona toalua, o Simi, i le Misiona a Copenhagen Tenimaka mai le 2007 i le 2009. Sa molimau mai o ia i le taua o le aoao o fanau i le fale e uiga i le talalelei.

“O se tasi o mea e sili ona manaia e mafai ona e faia e fesoasoani ai i lau fanau e fausia se molimau i le galuega faaifeautalai o le faia lea o a outou afiafi faaleaiga ma suesuega faaleaiga o tusitusiga paia,” o lana tala lea. “Afai e te tuu atu ia i latou lona faavae malosi o le suesue i le talalelei ma le malamalama o le talalelei, ua sili atu ona saunia lelei i latou ma iloa le tele o mea e uiga i le talalelei. ■

Maua e Talavou Faamisiona Fesoasoani a le Ekalesia le Olioli i le Auauna Atu

Saunia e Carolyn Carter

Talafou o le Ekalesia ma Mea Na Tutupu

E fai e Elder Ernesto Sarabia se pine lanu uliuli a faifeautalai i aso taitasi o lana misiona. Peitai o lona tofiga faamisiona sa tulaga ese lava mai le toatele o isi—o Elder Sarabia sa auauna atu o se faifeau faamisiona mo auaunaga faale-Ekalesia (FFAE) i le ofisa o le Misiona i Mekisiko Hermosillo.

Na saunoa Elder M. Russell Ballard o le Korama a Aposetolo e Toasefululua, “Ua tatou iloa atonu o le a le o se

mea atamai i nisi
o o tatou alii
ma tamaitai
talavou ona
fetaiai ma
faigata ma
luitau o se
misiona talai.”

Ae o lenei mea,
na ia saunoa ai, e
le faapea o le a le
mafaia ai ona latou
auai i faamanuiaga
o le auaunaga
faafaifeautalai
 (“One More,”
Liahona, Me
2005, 69).

Na saunoa Elder

Russell M. Nelson o le Korama a Aposetolo e Toasefululua, “O le misiona o se faatinoga ofofua o le auaunaga i le Atua ma tagata” (“Fesili i Faifeautalai! E Mafai ona Latou Fesoasoani Atu ia te Oe!” *Liahona*, Nov. 2012, 18), ma e tele auala e ofoina atu ai lena auaunaga.

Mo i latou e faatagaina ma le mamalu ona lē auauna atu faamisiona talai, po o i latou o e e tata lava ona toe talii vave mai i le fale, o le polokalama o le FFAE e mafai ona tuuina atu ai ni aafiaga anoa faamisiona.

Tulaga Manaomia e Auauna Atu Ai

O FFAE e ao ona gafatia faaletino, faalemafaufau, faaleagaga, ma faalelagona e faatino tiute o o latou valaauga, ia e fetaui lelei ma i latou.

O tofiga FFAE e eseese mai le 6 i le 24 masina ma e mafai ona amata mai le auauna atu i ni aso se lua o le vaiaso e oo atu i le faigaluega tumau. O loo i ai foi avanoa e auauna ai i le nuu faapea foi ona auauna atu mai le fale. O tofiga e mafai ona faia i le FFAE e aofia ai suesuega o talafaasolopito o aiga, tekinolosi o faamatalaga, fesoasoani i ofisa o misiona, faleteuoloo o epikopo, ma le anoano o isi mea.

Lagolago a le Aiga ma le Perisitua

O matua, taitai perisitua, ma tagata o le Ekalesia e mafai ona

fesoasoani i FFAE faamoemoeina e sauni e fai ni misiona.

O le aiga o Sister Eliza Joy Young sa avea ma se lagolago malosi mo ia, e momoliina atu ma toe aami mai mai le ofisa o le Ekalesia i Sini, Ausetalia.

Fai mai Elder Michael Hillam, o lē e faigaluega i le Faletusi a le Ekalesia i Hong Kong, “Sa fesoasoani o’u faiaoga seminare o taeao po ma taitai o Alii talavou ina ia ou saunia.”

O Le Ositaulaga e Aumai ai Faamanuiaga

Sa ositaulaga e Sister Young ona aso malolo mai lana galuega faavai-taimi e faamisiona ai mo auaunaga faale-Ekalesia. Fai mai o ia, “ou te lagona le latalata atili i lo’u Tama Faalelagi i le iloa o loo o’u fesoasoani atu ia te Ia.”

E le gata i faamanuiaga faaleagaga, ae o le faafaifeau faamisiona mo auaunaga faale-Ekalesia e tuuina atu ai i faifeau talavou ni avanoa taua faaagafesootai ma faapolofesa. “O la’u misi-ona ua faaali mai ai ia te a’u e mafai ona ou galue i galuega e le manaomia ai se fesoasoani faapitoa,” o le tala lea a Sister Young. (Sa na o galuega e manaomia ai le fesoasoani sa galue muamua ai o ia.)

E ui e le o talavou matutua uma o e e fia auauna atu e mafai ona galulue, ae ua faia se taumafaiga tele ia faaoga ai talavou matutua agavaa uma. O alii ma tamaitai talavou o e fia auauna atu i lenei auala e mafai ona talanoa i o latou epikopo po o peresitene o paranesi, o e e mafai ona sailia ia avanoa talafeagai mo i latou.

Faitau atili i ai i le news.lds.org i le sueina o le “young church-service missionaries.” ■



Ua Malaga Taamilo Taitai Aoao o Tamaitai Talavou ma le Aualofa i le Eria a Asia

Saunia e Brenda Frandsen, tagata faapitoa o ala o faasalalauga o le Eria a Asia

Faatasi ai ma saofaga mai ia David O. Heaps, Paul Stevens, ma Linda Rae Pond Smith

Mo le iva aso ia Novema 2012, sa aoaoina ma musuia ai e Mary N. Cook, fesoasoani mua-mua i le au peresitene aoao o Tamaitai Talavou, ma Linda S. Reeves, fesoasoani lua i le au peresitene aoao o le Aualofa, ia uso talavou ma matutua i le salafa atoa o le Eria a Asia.

O le malaga sa talafeauga lava ma le fofogaina o le toe iloiloaina o mataupu aoaoina a le autalavou o le, *O Mai, Mulimuli Mai Ia Te A'u*, lea o le a amata faaaogaina ia Ianuari 2013, e Alii Talavou, Tamaitai Talavou, ma vasega a le autalavou i le Aoga Sa. O mataupu aoaoina fou ua mamanuina e fesoasoani ai i faiaoga ia aoao atili e faapei ona sa faia e le Faaola ma atiina ae ai sootaga malolosi atu ma tagata o le vasega.

Ina ua mavae le asiasiga a Sister Cook ma Sister Reeves i le Eria a Asia, e toatele le autalavou Asia

I Taiuani, sa feiloai ai Mary N. Cook ma Linda S. Reeves ma taitai o le eria ma taitai perisitua ma le au paia i Taiuani.

ma o latou matua na ta'ua e faapea, ua atili faa-
osofia i latou i le taimi nei ia mama ma toe faa-
tulaga o latou olaga ma avea ma ni faataitaiga i o
latou lava nuu.

I Hong Kong, sa folafola atu ai e Sister Reeves i le autalavou, "Afai o le a e nofo mama i lou olaga, o le a mafai ona e tu ma le mautinoa i luma o soo se tagata!"

O le musuia ai i ana upu, sa faaalua ai e Tang Kak Kei e 12 tausaga le matua ina ua uma le fonotaga, "Ua ou iloa e tataua ona ou faitau i le Tusi a Mamona i aso uma. O le aoao ia salamo ma ola amiotonu o le mea lena na aoao mai e le *Mo Le Malosi o le Autalavou* ia te a'u e fai, ina ia mafai ona ala atu ia te a'u le susulu o le Malamalama o Keriso ma le fafia moni."

I Initia, sa feiloai ai Sister Cook ma le au paia i le falelotu fou i le Itu o Chennai Initia faapea ma tagata o le Siteki fou o Hyderabad Initia ma apo-apoai atu i le autalavou matutua ia saunia mo le humanai. "Ia faagavaa outou lava faaleaoaoga," sa ia uunai atu ai, "i tomai e fesoasoani ia te outou e fausia ai le malo. Ia taulai atu i lou aiga ma mea e mafai ona e faia e faamanuia ai tagata o lou aiga, ma i lou saunia faaleagaga ina ia e agavaa ai mo na uunaiga faaleagaga ma o le a e iloa ai le mea e agai i ai ma le mea e fai."

I Initonesia, sa auai ai Sister Reeves i le uluai konafesi faalesiteki a le Siteki fou o Surakarta Initonesia. "Sa matou lagonaina o latou agaga lotomauualalo ma le agalelei. Ni au paia ina a faamaoni!" na ia fai mai ai.

Ona asiasi atu lea o Sister Reeves i Meleisia, lea sa latou talanoaina faatasi ai ma se vaega o uso o le Aualofa ia faafitauli e sili ona ogaoga mo le Aualofa i le avea ai o se faalapopotoga i Meleisia ma auala e mafai ona tuuina atu ai e le Ekalesia le taitaiga ma musumusuga.

I Taiuani, sa ta'ua ai e Sister Reeves le malosi ma le tuuto o le au paia i le lotofale. "Ua matou fafia lava i le iloa o o latou olaga faamaoni ma le auai pea lava pea i le malumalu. . . . O le au paia o ni faataitaiga lelei i a latou uo ma tuaoi," o lana tala lea. ■



ATA NA PUENA E YANG CHIEH-WEN



O tagata talavou i le lalolagi o loo faaali atu le ala o loo latou tutu ai i nofoaga paia.

Talosaga mo Ata o le Autalavou

O le autu o le Mutuale i le tausaga lenei o le “la outou tutu ai i nofoaga paia, ma aua le masii ese” (MF&F 87:8). Alii ma tamaitai talavou, o loo manaomia e le *Liahona* ni o outou ata o outou tutu i nofoaga paia. O ata o faaalai ai outou o faaaluina o outou taimi faatasi ma o outou aiga, auauna atu, fai le galuega faafaifeautalai, fatuina o ni faatufugaga, suesueina o le talalelei, suesueina o le natura, ma isi mea! O le auala lenei e auina mai ai lou ata:

- la pu’e e se tagata lou ata ao e tu i se nofoaga paia.
- Imeli mai lou ata manino lelei i le liahona@ldschurch.org.
- Faaopoopo i ai se savali pe aisea ua paia ai lenei nofoaga mo oe.
- I lau imeli, faamolemole ia aofia ai lou igoa atoa, aso fanau, igoa o le uarota ma le siteki (po o le paranesi ma le itu), ma se tuatusi imeli a ou matua.

O ata o le autalavou mai le lalolagi atoa o le a faaalai i se lomiga i le lumanai.

Ua Asiasi Atu le Aposetolo i Moroko

Ia Tesema 2012, ina ua maea le faatulagaina o le siteki lona 3,000 o le Ekalesia i Sierra Leone i Aferika i Sisifo, sa faia ai e Elder Jeffrey R. Holland o le Korama a

Aposetolo e Toasefululua se asiasiga faapitoa i se paranesi toagaogao ma taumamao a le Ekalesia i Rapati, Moroko.

I se faigalotu faapitoa i le afiafi o le Aso Sa, sa faasoa atu ai e Elder Holland alofaga o taitai o le Ekalesia mo tagata uma o le Ekalesia i le lalolagi atoa, e tusa lava pe o le a le toagaogao o le fuainumera po o le taumamao i nofoaga latou te i ai.

“E le o faagaloina outou, ma o outou o se vaega o se galuega ofoofogia a o faailoa mai ma faatelevaveina e le Alii le faapotopotoina o Isaraeli i lenei tisipenisione maoae mulimuli,” o lana saunoaga lea.

Ua Faapaia le Malumalu o Tegucigalpa Hondura

I le Aso Sa, 17 o Mati, 2013, ina ua maea se faafiafiaga faaleaganuu ma le tolu vaiaso o maimoaga i le malumalu, sa faapaia ai loa le Malumalu o Tegucigalpa Hondura i ni sauniga se tolu, lea sa faasalalauina i iunite uma o le Ekalesia i Hondura ma Nikarakua.

O le au paia Hondura, o e sa masani ona malaga atu mo ni nai itula i le Malumalu o le Aai o Kuatemala, Kuatemala ua olioli i le vaai o le faapaia o le uluai malumalu a le atunuu. Sa muai fofogaina e le Au Peresitene Sili le malumalu i se tusi i le aso 9 o Iuni, 2006, ma sa suatia le elelee i le nofoaga ua i ai nei i le aso 12 o Setema, 2009.

Ua Asiasi Atu Peresitene Monson i Siamani

I le faaiuga o le 2012 sa malaga atu ai Peresitene Thomas S. Monson i Siamani e feiloai ai ma tagata o le Ekalesia i Hamburg, Berlin, Munich, ma Frankfurt, Siamani, ma sa ia faamalosia atu ia i latou ina ia mulimuli ia Iesu Keriso.

Sa ia ta’u atu i le au paia i Frankfurt, “Sa la aoao mai le faamagalo atu e ala i le faamagaloina. Sa la aoao atu le agalelei e ala i le agalelei atu. Sa la aoao atu le tuuto atu e ala i le ofoina mai o la lava.”

E Aoao A’u E Le Agaga Paia

Talu lava ona auai lo’u aiga i le Ekalesia, ua ou vaaia ai le mana lea e sau mai le faitauina o le *Liahona*. E ala mai i nei upu maoae sa musuia ai a’u e fai se misiona. E tele mataupu o loo talanoaina i le mekasini, ae o le mea sa taua ia te a’u o le mea e aoao mai e le Agaga Paia ia te a’u i taimi taitasi ou te faitauina ai. Ioe, o le a tatou saoloto—e oo lava i le “teritori a le fili” (tagai i le Boyd K. Packer, “Pe Faapefea ona Ola i le Teritori a le Fili,” *Liahona*, Oke. 2012, 24)—a o tatou suesue, faitau, ma faaaoaga mataupu o loo aoao mai ai. O loo soifua le Faola, ua i ai le perisitua i luga o le fogaeleele, ma o loo i ai le Atua i le lagi.

Newton T. Senyange, Uganda

Faasa’oga

O le *Liahona* o Oketopa 2012 na sese ai le faaupuga o ata i le tala “Faatulagaina le Uluai Siteki i Initia” i itulau 76–77. O ata sa pueina e Sister Gladys Wigg. Matou te faamalie atu ona o le sasi.

I le *Liahona*, o Tesema 2012, o le auaiga o Vigil, o loo talanoaina i le tusiga “O Suiga Paia” i le itulau e 24, sa papatisoina ia Iulai 2010, ae le o Iuni 2011. Ma le isi, o Andrea Vigil sa fanau ia Iulai, ae le o Aokuso, 2012.

I le tusi o *Aoaoga a Peresitene o le Ekalesia: Lorenzo Snow*, o loo sese le faamatalaga o le ata o loo i le itulau e 2. O le ata o le atalii o Peresitene Snow, o Oliver Goddard Snow. O le faamatalaga foi o ata o i le itulau e 28, e tataua ona fesui ai ia igoa o Brigham Young Jr. ma Francis M. Lyman.

FEINU MAI LE PUNAVAI

Saunia e Aaron L. West

Faatonu, Tautua o Lomiga a le Ekalesia

Atatou talanoa e uiga i le matagofie o malumu, e masani ona tatou ta'ua tumutumu, faamalama, ma atavali tetele. Tatou te talanoa faaaloalo e uiga i faatanoa o le vai papatisoga, potu o faaeege paia, potu o faamauga, ma potu selesitila.

Ae a faapaia e se perofeta se malumu i le Alii, na te faapaia le maota atoa, ae le na o vaega matagofie e iloa atu e tagata. I le tatalo o le faapaia mo le Malumu o Kansas City Misuri, sa saunoa ai Peresitene Thomas S. Monson: “Tatou te faapaia le laueleele o loo tu ai leni malumu. Tatou te faapaia vaega uma o leni fausaga matagofie, mai fusi faavae e le vaaia e oo i le faatusa mamalu o Moronae ua i le tumutumu o lona vaega aupito maua. ¹ Ina ua fofogaina e Peresitene Iosefa Filitia Samita le tatalo o le faapaia o le Malumu o Ogden Iuta, sa ia faapaia “ia faavae, o puipui, o fola, o taua, o le olo, ma vaega uma o le maota,” ma sa ia tatalo mo le puipui “o vaega uma e faaoga ai masini, o fesootaiga o moli ma totoga, o le faiga e avatu ai le ea fou [i totonu o le malumu] ma lifi, ma mea uma e faatatau i leni maota.” ²

Ou te faafetai ona e musuia e le Alii ia Ana perofeta e faapaia itu uma o malumu uma. E ui lava o se taofi o se faitotoa po o se totoga o



O Iesu Keriso o le punavai o le vai ola.

se moli e mautinoa lava e itiiti sona faamoemoga nai lo se fatafaitaulaga i totonu o se potu o faamauga, o na vaega iti e saofaga uma i le faamoemoga tupito, ma faaeaina o le malumu.

O se tasi o nei vaega itiiti na fesoasoani ou te aoaoina ai se lesa tumau. Sa ou i ai i totonu o le Malumu o Sate Leki i se tasi aso, sa ou sauni e aluese mai le potu e sui ai ina ua uma ona ou auai i se sauniga mo e ua malilili. O lo'u iloa atu o se masini e feinu ai, sa ou iloa ai sa ou fiainu, o lea sa ou punou ifo ai mo se inu faatopetope. Sa oo mai se savali i lo'u mafaufau:

Ua e inu i le vai leni i totonu o le malumu, ae pe ua e inu moni ea i le vai ola o loo maua iinei?


Sa le o se tausala malosi—na o se aoaiga malie lava ma se fesili na ati i lo'u loto.

O la'u tali i lena fesili o le leai. Sa ou le inu atoatoa i le vai ola o le malumu. Ou te tauino atu, sa feosofai solo lo'u mafaufau i minute na muamua atu a o ou mauaina sauniga mo e ua malilili. E ui ina sa ou faia se galuega lelei mo tagata sa manaomia la'u fesoasoani, ae ou te le'i faatagaina a'u lava e maua uma le fesoasoani sa ou manaomia.

O le taimi nei, o soo se taimi lava ou te alu ai i le malumu, ou te vaavaai mo se masini e feinu ai ma ou tu ou te inu. Ou te fesili ifo ia te a'u lava, o le a le tele o la'u inu mai le punavai o le vai ola. O la'u tali: E le o lava lava. Ae ua faateteleina lo'u fiainu. ■

FAAMATALAGA

1. Thomas S. Monson, i le “Kansas City Missouri Temple: ‘Beacon of Divine Light’—an Offering of Hands and Hearts,” *Church News*, Me 12, 2012, ldschurchnews.com.
2. Iosefa Filitia Samita, i le “Ogden Temple Dedicatory Prayer,” *Ensign*, Mat. 1972, 12.



TAUTINOQA ALOAIA

UILIFOTI UTILAFI

Uilifoti Uutilafi sa auauna atu i se misiona i Peretania Tele i le vaitaimi o le 1840. Ona o lana auaunaga, e silia ma le 1,000 tagata sa **papatisoina ai**. Sa avea mulimuli ane Uilifoti Uutilafi o se peresitene o le **Malumalu o St. George Iuta**. A o avea ma Peresitene o le Ekalesia, sa ia uunaia ia avea **Iuta** ma se setete. Sa ia mauaina le faaaliga ma tuuina mai le **Tautinoga Aloaia 1** na faatonuina ai le Au Paia e taofi le faatinoina o autaunonofo.



O loo faaaliala e tagata faatino ata
 tifaga ni vaaiga mai le soifuaga
 o Iesu Keriso mo vitio i le ini-
 toneti o loo maua i le biblevideos.lds.org;
 o nisi o vaaiga mai le vaiaso mulimuli o
 le soifuaga o le Faaola o loo faaaliala i le
 tusiga i le itulau e 26. I le “O Le Misiona
 ma le Auaunaga a Iesu Keriso” (itulau
 e 18), o loo aoao mai ai e Elder Russell M.
 Nelson ni vaega se fa o galuega a le Faa-
 ola lea e mafai ona tatou faataitaia i o
 tatou lava olaga.